

Blair. 182.

AN

CEATHRAMH LEABHAR

AIR SON

NAN SGOILEAN GAE'LACH

A TA

*Air an cumail suas le Comunn Ard-Sheanaidh
Eaglais na h-Alba.*

AN DARA CLODH-BUALADH.

DUNEIDIN :

CLODH-BHUAILTE LE R. INCHES.

1849.

SEOLANNA.

Co luath 'sa ruigeas am foghlumach taobh-duilleig (49,) far am bheil an *Dara Earrann* a' tòiseachadh, cuiridh am Maighstir-sgoile *Leabhar Aithghcarr nan Ceist* na làimh, agus iunnsaichidh e earrann bheag dheth gach là gus an téid e thairis air gu h-ionnlan.

I. M^d.



A' CHEUD EARRANN.

1. THA an ceò a' snàmh air na beanntaibh. Bha iad cruadalach mar an darach nach cios-naich sian a' gheamhraidh. Bithidh a shliochd lìonmhor mar reultaibh nèimh. Phill gaisgeach nam buadh le cliu. Bha an drùchd air an fheur. Chunnaic mi bogha froise sa' ghleann. Bha a dhearg-shùil mar theine nan speur: mar thorran an t-sléibh a ghuth. Am bheil na craobhan fo bhlàth? 'Tha dà chloich air an còmhdachadh le còinich aig ceann uaighe an t-sèoid. Ainnir àillidh nan rosg ciar. Bha an t-òganach ladurna, agus dàn. 'Thug e rabhadh dhoibh a thaobh an cunnairt.

2. An téid thu an urras air gu'n dìol e a chuid féin do na fiachaibh? Ghiulain an duine ud e féin gu mi-shuairce; agus cha ghabh ni air bith do na dh'ainmich e a leithsgeul. Leugh mi gach focal do'n litir a sgrìobh thu d'a ionnsuidh, agus thaitinn i rium gu fìormhaith. Na cuir mi-dhreach air t'eudan. Thréig a theaghlach agus a chairdean e, do bhrìgh

gu'n d'thug e masladh agus mi-chliu air féin. Tha dubhar an anmoich air a shìneadh a mach. Tha ainneart agus creach ri chluinntinn sa' bhaile mhòr a ghnàth. Ghearr iad sìos craobhan, agus thilg iad tòrr an aghaidh a' bhaile dhaingnichte.

3. Dhioghlum iad an t-achadh gu buileach. Chuir iad na fion-dhearcann anns na cliabhaibh. Cha do ghabh iad nàire, ni mò bha rughadh air an gruaidhibh. Leig iad cip-thuislidh an rathad an t-sluaigh, do bhrìgh gu'n robh toil aca cron a dheanamh dhoibh. Cha'n fhaigh esan beannachd a ni bun á briathraibh breugach. Ghluais iad ann an comhairlibh ais-inn-leachdach an droch cridhe féin, agus uime sin thàinig iad gu masladh agus gu bochdainn. Pillidh an t-aingidh g'a shlighe eucorach mar a dhian-ruitheas an t-each chum a' chomhraig. Chualas srannail a chuid each, 'nuair a chaidh e seachad le cabhaig. Thug e litir-dhealaich d'a mhnaoi, agus chuir e air falbh i. Tha an reothadh ro-theann.—(A.) *Taobh-duilleig* 19.

4. Cnuasaich an ni so a'd' inntinn, agus thoir fa'near ciod an fhreagradh a bheir thu seachad. Thug am fear so airgid an coin-gheall d'a charaid. Am bheil na cluas-fhàinnean ro-phrìseil? Tha fuath aig eoin eile do'n chailleach-oidhche. Ghlac crith-ghalar e. Bha an duine cruaidh-chridheach. Am bheil an cruithneachd pailt air a' bhliadhna so? Chaidh sinn do'n mhonadh, agus chruinnich sinn na

dearcana-aiteil. Bhuineadh an deachamh dha do gach nì a dh'fhàs as an talamh. Bha an là doilleir, agus chaidh a' chlann air seacharan. Bu duine eagnuidh an duine ud a bha còmh-radh riut an dé. Cha d' thàinig ealltainn riamh air a cheann.

5. Bha do bhràthair mi-ìomchuidh air son a' ghnòthuich a dh'earb thu ris. Chaidh e a shràid-imeachd san fhàiche. Is mi-lathailteach a chaidh thu an seilbh a' ghnòthuich so. Rinn e leabadh dha féin do'n luachair. Moch an dé chual mi na féidh a' langanaich. Thug iad air falbh làrach an tighe. Tha liath-reoth air srath na dùthcha. Bha e ag oibreachadh le locar-duirn. Thàinig an long-chogaidh do'n chaladh. 'Se mo bharail gu bheil a' chlann ro-charach. Cheangail e a mhàilead air a dhruim. Shuidh iad sìos air reilean beag gorm, agus ghabh iad beachd do'n dùthaich. Tha am biadh mi-bhlasta, do bhrìgh gu bheil e dhìth salainn.

6. Bha am fear so mìodalach agus beulchair. An robh an nigheanag mi-stuama? Ghearr iad sìos a' chraobh ghiuthais, agus shàbh iad i 'na mìribh beaga. Bha a' chailinn ro-ghnìomhach agus thapaiddh. Dean moch-eirigh mhaith chum's gu'm pill thu roimh an oidhche. Nach mòr-chuiseach an duine sin? Chaidh an t-each an sàs sa' mhòintich. Bha a' bhean cridheil agus mùirneach. Nam biodh am maighstir tìom-chridheach, cha bhuaileadh e a sheirbhis.

each sa' cheann. Tha an gille toibheumach agus air bheag nàire; cha ghabh e suim do ni air bith théid a ràdh ris.—(B.) *Taobh-duilleig* 21.

7. Rach do'n tigh-thogalach, agus faic am bheil an liunn air son òl. Cheannaich am feòladair na daimh, agus bhiadh e iad air son an tigh-mharbhaidh. Mharbh na Turcaich an àrd-riaghlair leis a' chlaidheamh. Thàinig Seumas dachaidh, agus e sgèith agus ocrach. Bha mòran do ais-innleachd aig a' chloinn. Thug e an aire gu dùrachdach do gach focal a chaidh a labhairt ris, agus gheall e gu'm bitheadh e faicilleach 'na ghiulan. Am bheil dearbhadh soilleir agad air a' chùis so? Chuir na nithe a labhair thu iongnadh mòr orm. Thàinig iomadh deuchainn 'na rathad, gidheadh cha do leag e sìos a mhisneach.

8. Chaidh na daoine air iomrall. Fhuair iad ionad-tearmunn o'n doininn ann an caladh beag, far an do stiùir iad an loingear. Bi faicilleach air eagal gu'n tig do nàmhaid an anmoich ort. Reic e a bhathar gu follaiseach. Am bheil ughdarras agad air so a dheanamh? Thug iad fear nam fiach a mach air urras, agus theich e co luath 'sa fhuair e cothrom. Dh'aidich e gu follaiseach gu robh e ciontach san ni a chuir iad as a leth. Tha piuthar t'athar ro-thinn, agus cosmhuil ris a' bhàs. Dh'fhalbh e maille ris a' mhòr bhuidhinn chum na féille.

9. Is cireachdail am fiuran gille e. Bha

a' chòmhail sòlasach 'nuair a choinnich na bràithrean a chéile. Tha na gròiseidean ro-phailt air a' bhliadhna so. Nach gruamach aghaidh agus nach fiat sealladh na bana-cheaird? Labhair agus sgrìobh am maighstir-sgoille gu deas-chainnteach. Tha mòran gain-eimh ri taobh na fairge. Rinn e croileag-làimhe do shlatan caoile, agus thug e dhomhsa i mar ghibht. Mharbh e coileach-dubh agus dà mhaighich. Thùch am fuachd e. Fhuair iad nead chonnspeach aig bun na cloiche. Thug na Spainndich braighdean-gill do na Frang-aich.—(C.) *T.d.* 23.

10. Rinn Samson fearas-chuideachd do na Philistich. Tha an talamh nèò-chòmhnard agus doilich a threabhadh. Bha na coin a' donnalaich mu'n cuairt do'n bhaile, do bhrìgh gu'n do chaill iad am maighstir. Ghabh i crònan do'n leanabh, agus luaisg i thairis gu codal e. Bha e eudmhor mu thimchioll a naimhdean. Tha mi am barail gu bheil do bhràthair neo-shaoithreachail. Dhiult do bhràthair comhairle a ghabhail. Tha sùil luaineach 'na cheann: cha'n 'eil e coslach gu'm fuirich e 'na thàmh. 'S e oirleach an dara cuid deug do throidh. Chaidh an seabhag air tòir nan eun, agus ghlac e dithis diubh.

11. Is neo-sheadhar an duine sin mu thimchioll a theaghlaich. Cha b'urrainn an tuath-anach 'fhiachan a dhioladh, agus air an aobhar sin chaidh a chur am prìosan. Am bheil an

saighdear ciurramach no euslainteach? Bha a thrioblaid cràiteach agus do-fhulang. Cha'n earb mi an gnothuch so riut do bhrìgh gu bheil thu màidheannach. Is bean-chinnidh dhomh an tè ud. Leum an t-adharcan-luachrach mu'n cuairt duinn. Ni an gobhlan-gaoithe a nead ann am bruaich bile na h-uaimhe. Sgaoil a' chraobh a meanglain thar an uisge. Bha tuir-eadh coitchionn sa' bhaile, do bhrìgh gu'n robh a' phlàigh 'nam measg.

12. Cuiribh umaibh eudach-saic, agus dean-aibh bròn, oir bheirear gu h-aithghearr am braighdeanas sibh. Chuala mi caismeachd a' chogaidh. Rinn am madadh-alluidh ulurtaich, agus chuir e eagal air an t-sluagh. Thig na gaduichean anns an oidhche, agus creachaidh iad am baile. Bha na h-eacha meanmnach ri sitirich. Bhris agus spealg iad na soithichean, agus chuir iad am bothan ri theine. Chruinnich iad mòran sìl sna tighibh-tasgaidh. Gabhaidh fiadh-bheathaichean na macharach, agus madaidh-alluidh nan coilltean tàmh san fhàsach. Cuiribh suas a' bhratach, agus deanaibh am freiceadan làidir, oir tha 'ur naimhdean dlùth oirbh.—(D.) *T.d.* 25.

13. Chaidh na cinn-fheadhna agus an luchd-riaghlaidh seachad ann an ordugh catha. Bhris iad sìos na geatachan agus na croinn-dhruididh. Suidhichibh luchd feall-fholach agus fir-fhaire an taobh am muigh do'n champ. Tha am bailtean 'nam fàsach, agus 'nan làraich sgaoilte.

Am fac thu ceannard an fhreiceadain? Tha a nighean ri gul gu geur anns an oidhche, agus a deoir air a gruidhean. Bhuin mo chairdean gu fealltach rium,—thréig iad mi ann an là mo theanntachd, agus chuir iad cùl gu tur rium. Chrìoslaich an sluagh iad féin le saic-eudach; agus shuidh iad sìos air an làr.

14. Bha e 'na chùis mhagaidh d'a naimhdibh. Is searbhadas agus domblas bhi cuimhneachadh air m'àmhghar agus air mo thruaighe. Is maith an Tighearn dhoibhsan a dh'fheitheas air, do'n anam a dh'iarraas e. Rannsaicheamaid agus dearbhamaid ar slighean, agus pilleamaid a rìs a dh'ionnsuidh an Tighearna. Is ann do thròcairibh an Tighearna nach 'eil sinn air ar caitheadh, a chionn nach 'eil fàilinn air a thròcairibh. Mharbh iad na naoidheana maotha, na h-òighean, agus an seann sluagh leis a' chlaidheamh. Tha mo shùilean air fàilneachadh le deuraibh; tha mo chom fo thrìoblaid.

15. Cionnus a thàinig smal air an òr, a chaochail an t-òr ro-fhinealta? Bha a agus an ni a chunnaic mi sna speuraibh mar eibhlibh dearga teine. Am fac thu an nathair nimhe? Bha fuaim an sgiathan mar thoirm mhòran uisgeacha. Dh'fhàs cruithneachd, agus eòrna, agus pònair, agus peasair, agus meanbh-pheasair suas san achadh. Tha am boirionnach sin mi-bhanail. Loisgeadh airneis an tighe gu luaithre. Spùin iad na tighean, agus thug iad leo gach ni a ghabhadh giulan. Thog an clachair balla

àrd làidir mu'n cuairt do'n lùchairt. Bha e ro bhràthaireil.—(E.) *T.d.* 27.

16. Bha an lann tarbhach. Cha'n fhaic mi neach eile is déigheil air urram na e. Chuir an sluagh teachdair a dh'ionnsuidh an rìgh, ag iarraidh gu'n cuireadh e an lagh an gnìomh. Is iomadh buaireadh do'm bheil sinn buailteach, agus is iomadh olc a ta 'g iadhadh mu'n cuairt oirnn. Ghearr na léighean a chos deth. Tha an òigh an dà chuid suairce agus caoimhneil. Bu sgiorail a thachair do d' bhràthair. Charn e suas mòran beartais, ach cha do mheal se e. Tha an leth-bhruthlach corrach, agus do-dhìreadh. Mhalairtich e an t-each donn. Ann d'thug thu a' bheag do'n deirceach thruagh? Bha an òg-bhean spòrsail agus riomhach.

17. Tha mòran dhearcagan sa' mhonadh air a' bhliadhna so. Thriall na saighdearan air an turus. Bha an duine ud àrd-inntinneach agus uaibhreach 'na nàdur. Mhi-bhuilich e ceud-faidhean 'inntinn. Am bheil an t-uisge druigh-teach? Is faoin an sgeul a dh'innis thu dhomh; cha'n urrainn domh a chreidsinn. Ghabh an ceannard àireamh an fheachd, agus fhuair e 'nam measg deich mìle fear deas air son cogaidh. Ceangail beul a' choin, air eagal gu'n gearr e thu. Rinn iad ceannairc làidir an aghaidh an rìgh, ach thug esan buaidh orra, agus chuir e gu bàs iad. Cò d'an aithne rùndiomhair an Tighearna?

18. Tha an duine truagh so ciurramach. Thug a' bhanaltrum leatha an leanabh, agus dh'àraich i e le mòr-chùram. Dh'fhàs an callt-uinn suas sa' choille. Tha an darach 'na fhiodh ro-chruaidh agus ro-bhuan. Bha do bhràthair ceann-laidir, agus cha'n éisdeadh e ruinn: gabhaidh e aithreachas an déigh so. Mìnich dhomh brìgh an teagaisg a chuala mi. Bha slat sheilich aig 'na làimh; bha màilead air a dhruim, agus bha e deas gu dol air a thurus. Na dearmad do dhleasdanas car aon mhionaid. Bha Cain 'na fhogarrach agus 'na fhear fuadain air aghaidh na talmhainn. Mharcaich e seachad orm le srann. Thàinig cràdh obann air a dh' fhàg e lag, agus a dhìth misneich.— (F.) *T.d.* 30.

19. Na toir claon-bhreth no breth chealgach ann an cùis air bith. Chaidh na féidh troimh a' bhealach chumhann, agus lean na coin air an tòir. Ghabh e cleit-sgrìobhaidh 'na làimh agus chuir e sìos air paipeir gach ni mar a b'àill leis. Bha mi smuaireanach 'nuair a dh'fhàg thu mi leam féin. Is bradach an sealladh a ta aig an fhear ud. Théid e air imrich aig là cuingeis. Fhuair e mòran neamhnuidean aig foir na h-aimhne. Bì furachair air eagal ciod a thachaireas duit. Tha an neach a's companach duit mi-mhodhail. Am bheil an seirbhiseach 'na fhear-treabhaidh maith? Rinn iad greadhnachas mòr a chionn gu'n do choisinn iad am blàr

20. Rinn iad brochan do'n mhin choirce, agus dheadh-thaitinn e riu. Tha do choimhearsnach beadaidh agus mìodalach le 'theangaidh; seachainn e uime sin air eagal gu'm meall e thu. Ghabh an rìgh àireamh an t-sluaigh o ochd bliadhna deug a dh'aois agus os a cheann. Dh'iomchair e an eallach gu riaghailteach. Rinn an criadhaid mòran shoithichean creadha. Thug e duais da a chionn gu'n do ghiulain e an litir. Thàinig e a m' ionnsuidh aig camhanaich an là. Chaidh gach nì a roimh-orduchadh le Dia. Nam faighinn mo roghainn dh'fhàginn am baile so am màireach. Tha mòran sluaigh a' lomaire nan caorach san fhang.—(G.) *T.d.* 32.

21. Cuir dàil sa' ghnòthuch so gus am fiosraich thu mu thimchioll gach nì a bhuineas da. Rinn e mòran ana-caitheamh. Dh'innis a' bhan-fhàidh roimh-làimh ciod a thachaireadh do'n t-sluagh cheannairceach. Tha innlinn againn do'n spréidh. Buinidh am ministear so do'n chreidimh ath-leasaichte. Shleuchd iad sìos do dhiathaibh bréige, agus dhich-uinnhich iad an Dia sin a chruthaich iad. Thug e earail dhùrachdach dhoibh a thaobh nan nithe a bhuineas do'n sonas siorruidh. Tha an soitheach ceithir-chearnach. Ghiulain e a bhalg-saighead air a léis.

22. Am bheil a' chlann tuasaideach? Tha iad tuasaideach, agus air an aobhar sin is còir an smachdachadh le am pàrantaibh. Bha

comhstri mhòr eatorra, agus chaidh iad a dh'ionnsuidh an lagha g'a chrìochnachadh. Thog e balla dèidin mu'n cuairt do'n chaithir, agus chuir e freiceadain làidir air. Thilg e saighead air tuairmis, agus lot e am fiadh sa' chliaich. Bha an dioghladair neo-bhunntamach an cois a ghnothuich. Ròist e mìr tana do'n mhuic-fheoil. Am bheil na sùidheagan pailt sa' ghàradh? Chaidh na buanaichean do'n mbachair. Gabh ath-bheachd do d' chaithe-beatha. (H.) *T.d.* 33.

23. Dh'éirich deatach mhòr suas gu ruig na neoil. Fhuair an tàinisteir bàs san teasaich. Ath-cheasnuich na fianuisean a dh' fheuchainn am faigh thu an fhìrinn a mach. Dhìt na moirearan-dearg an duine gu bàs a chionn gu'n robh e 'na mheirleach. Fuasgail an cròdh agus leig a mach an spréidh: Greas iad chum an uisge, agus an sin fàg iad gu ionaltradh air an àilean. Rinn e duarman a chionn nach d' thug iad a thuarasdal da. Cuir fa sgaoil am prìosanach. Chruinnich mòran do'n t-sluagh aig an àite-coinneamh, agus cheangail siad iad féin gu dol a chogadh an aghaidh an uachdarain.

24. Chlodh-bhuail e an leabhar an treas uair. Dhealraich 'aghaidh mar sholus na gréine aig àrd-mheadhon là. Fhuair e luach-saoithreach air son a thrìoblaid; gidheadh cha robh e toilichte. Gabh an criadhar agus criadhair an t-eorna. Shéid a' ghaoth air falbh siùil agus acfuinn na luinge. Bha an t-arbhar

malcta. Tha am feallsanach ro-fhoghlumte. Dh'fhògair iad air falbh e gu eilean iomallach. Dh'fhàg iad am fiodh san t-slochd-shàbhaidh. Nach glas-neulach an creutair sin? Is beumnach, agus is olc an teangadh a ta aige. Rinn na fàidhean bréige fàistneachd. Dh'fhàg e am baile gu h-uaigneach.—(I.) *T.d.* 35.

25. Thilg iad a chlosach san teine an déigh dhoibh a mharbhadh. Chaidh e seachad mar phlàth dealanaich. Thilg iad do bhràthair sa' phrìosan iochdarach, a chionn gu'n do dhiult e ùmhlachd do àithne an uachdarain. Chaidh e an sàs san làthaich. Thig urchuid air urchuid, agus tuairisgeul air thuairisgeul; an sin eugaidh dòchas an duine agus bithidh e fo amhladh. Chaidh e steach gu stairsneach an tighe, agus ghlaodh e ris an t-sluagh teachd a mach. Bha an duine a chunnaic thu dol seach air a sgeudachadh le lion-eudach grinn. Iarr airgiod an coingheall o do bhràithribh agus o fhir do dhillseachd. Cladhaich troimh a' bhalla. Ghiulain e eallach air a ghuaillibh san dubh-anmoch. Spairt e an tigh le cré gun oibreachadh, agus lion e gach fròg chum a' ghaoth a chumail a mach.

26. Cha do chàraich iad a' bhearn, ni mò rinn iad suas a' challaid; air an aobhar sin théid an spréidh trompa, agus ithidh iad an t-arbhar. Shonraich ar Slànuighear dà dheisciobul deug, agus thug e cumhachd dhoibh os ceann gach eucail. Tha am fion-chrann maiseach am measg chranna na fridhe. Rinn

thu do sheòmraichean maiseach le dathaibh eag-samhluidh. Chuir e sèud riomhach 'na cluasaibh, agus crùn rioghail air a ceann. Chlach iad am meirleach, agus shàth iad troimh e leis a' chlaidheamh. Ghearr e geug mhaoth o bhàrr meangana òga na craoibhe a shuidhich e. (K.) *T.d.* 38.

27. Dh'fhàs a' chraobh mòr, agus fo dhubhar a geug ghabh eunlaith an athair còmhnuidh. Dh'ith a' chlann dearcan searbha a thug déisinn air am fiac laibh. Cha ghiulain am mac aingidheachd an athar, no an t-athair aingidheachd a' mhic: bithidh fireantachd an fhìrein air féin, agus aingidheachd an aingidh air féin. Tha am fearann tioram agus tartmhor; cha ghiulain e mòran arbhair air a' bhliadhna so. Tha an claidheamh air a gheurachadh, agus tha e air a lìomhadh, gu a thoirt do làimh a' mharbhaiche. Sgapaidh e iad am measg nan cinneach, agus sgàraidh e iad am measg nan dùthchannan, do bhrìgh gu'n robh iad eas-umhal d'a lagh.

28. Dh'fhògair an duine brùideil agus neo-sheirceil ud iad o thìr an dùchais. Thilg iad an t-iarunn agus an t-umha am meadhon na fuirneis. Is iomraiteach an gnìomh a rinn do bhràthair. Chòmhdaich na saighdearan an cinn le ceann-eididh daithte air son a' bhlàir. Thoir goil bhrais air a' choire, agus gradbhruich an fheoil, oir bithidh an luchd-oibre an so air an uair. Carnaibh connadh air an leac-theintinn, agus fadaibh an teine. Cuiridh iad

an innil-cogaidh an aghaidh bhallachan an naimhdean, agus le'n tuaghaibh brisidh iad sios am bàbhuinn. Le airgid, iarunn, stàn, agus luaith rinn iad malairt agus marsantachd sna dùthchannaibh eilthireach. (L.) *T.d.* 40.

29. Tuitidh na maraichean, na fir-stiùraidh, agus an luchd-calcaidh am builsghean na fairge, 'nuair a shéideas a' ghaoth gu làidir agus gu boilsgeach. Ghlac am maraiche an ràmh, agus stiùir e am bàta am meadhon na fairge. Cha robh na craobhan giuthais no na craobhan geannm-chnò cosmhuil ris na craobhaibh daraich. Dh' fhannaich an sluagh air an t-slighe, do bhrìgh gu'n robh iad a dh'easbhuidh arain agus uisge. Air bruaich na h-aimhne bha romhòran chraobh, air an taobh so agus air an taobh eile. Cha b'urrainn do na speuradairibh agus do'n luchd-fiosachd brìgh a bhruadair innseadh do'n rìgh.

30. Fàsaidh na h-aingidh cosmhuil ri moll nan urlar-bualaidh anns an t-samhradh, a bheir a' ghaoth air falbh. Chaochail gnùis an rìgh, agus rinn a smuaintean a bhuaireadh, air chor a's gu'n robh uilt a leasraidh air am fuasgladh, agus bhuaill a ghlùinean an aghaidh a chéile. Leugh an sgrìobhadh so, agus innis domh a bhrìgh. Rinn na cinnich aoradh do dhiathaibh òir, agus airgid, umha, iarunn, fiodha, agus cloiche. Bha spuirean an eoin geur agus làidir. An robh an duine ro-dhiombach air fèin a chiunn gu'n do dhìchuimhnich e a' chùis

a chaidh earbsadh ris? Chunnaic mi òigh mhaiseach a' gabhail seachad; bha a trusgan geal mar shneachdadh. (M.) *T.d.* 43.

31. Shuidhich an rìgh pàilliunna a lùchairtean eadar na cuantan. Thuirling teine agus pronnusg air bailtibh Shodoim agus Ghomorah. Ghabh iad tàmh an teas an là fo na crannaibh daraich, agus crithich, agus cuilinn, a chionn gu'n robh an sgàile taitneach. Bha an àmhuinn air a teasachadh leis an fhuineadair, agus thaoisinn fear-oibreachaidh na taoise chum aran a dheanamh deas do'n t-sluagh. Tha a' cheathairne ri creach agus ri spùinneadh sa' mhachair. Dh'fhàs ionntagach agus droigh-ionn suas far am b'àbhuist pailteas feoir agus arbhair bhi cinneachduinn. Gheibh thu pailteas do'n iteotha ann an claisibh na macharach. Bheir Dia luigheachd do'n aingidh a réir gnìomhara a làmh.

32. Bhuin iad na cuileanan o'n leòmban bhoirionn. Chaidh roth a' charbaid thairis air. Bha am moll air fhuadachadh leis an iomghaoith. Tha an fhionain air tiormachadh suas, agus an crann-fige air seargadh; tha am pomgranat, an crann-pailme fòs, agus an crann-ubhail, eadhon uile chraobha na macharach air seargadh. Thàinig an samhradh, agus tha cluaintean an fhàsaich a' briseadh nios, agus craobhan na macharach a' teachd fo bhlàth. Tha na buailtean spréidhe an airc a chionn nach 'eil ionaltradh aca. Rinn iad claidhean

do na coltraibh, agus sleagha do na corranaibh-sgathaidh. Sàthaibh an corran, oir tha am fogharadh abuich. (N.) *T.d.* 45.

33. Thug e a' bhruid am braighdeanas. Am bheil an carbad luchdaichte le h-arbhar? Ghabh e an t-sreang-riaghailt agus thomhais e am baile. Bha mo cheann air a ribeadh anns an fheamainn. Chaidh sumainnean agus tonnan na fairge thar an loingeis. 'Nuair a shoillsicheas a' mhaduinn éiridh sinn, agus théid sinn air ar turus. Tha an ti a's fearr am measg an t-sluaigh mar dhريس, agus an ti a's ionraice 'nam measg mar phريس droighinn. Tha na gruagaichean a' teachd chum na bainnse. Seachainn luchd-dùsgaidh strì agus aimhreite. Labhair e gnàth-fhocal tàmailteach m'a thimchioll. Luchdaich e an carbad le cré thiugh. Dh'fhalbh iad gu luath, mar an iolar a dheifricheas chum a' chobhartaich.

34. Tha an sluagh sanntachadh droch shainnt, agus air an aobhar sin thig iad gu mìchliu. Is truagh dhasan a mheudaicheas an nì nach leis féin. Tha breitheamhna a' bhaile cosmhuil ri madaidh-alluidh an anmoich. Nì e am baile ceannairceach 'na làraich luim. Bithibh ciùin; iarraibh fireantachd agus macantachd. Tha am boirionnach an-shocrach agus diblidh. Chuir e a thuarasdal ann an spòran tolltach agus chaill se e. Thàinig an sluagh gu amar-bruthaidh an fhiona, ach cha d'fhuair iad a' bheag a chasg an iota. Chaidh ceithir

charbadan seachad; agus ris a' cheud charbad bha eich dhubha; ris an dara carbad eich gheala; ris an treas carbad eich ruadha; agus ris a' cheathramh carbad eich bhalla-dhearg. (O.) *T.d.* 48.

(A.) DLEASDNAS NA H-ÒIGE.

Cuimhnich do Chruithear ann an làithibh t'òige. Thoir fa'near gu bheil gach nì tha thu a' faicinn os do cheann, fodhad, agus mu'n cuairt duit,—gu bheil a' ghrian, a' ghealach, agus na reultan,—na beanntan àrda, agus doimhneachd nan uisgeacha air an dealbh agus air an cumail suas le làimh an Uile-chumhachdaich. Aig 'ordugh-san tha là agus oidhche, maise an earraich, agus glòir an t-samhraidh, fiughantas an fhogharaidh agus doinionn an-rathach a' gheamhraidh a' leantuinn air lorg a chéile. Uaith-san tha na treubhan do-àir-eamh do chreutairibh gluasadach a' tarruing am beatha, agus annsan tha iad a' gluasad agus tha am bith aca. 'Nuair a chuireas e mach a spiorad, cruthaichear iad;—'nuair a dh' fhosglas e a làmh, sàsuichear le maith iad;—'nuair a dh' fholaicheas e a ghnùis, bithidh iad fo amh-luadh,—agus an uair a bheir e uatha an deò, eugaidh iad agus pillidh iad ri'n ùir.

Ach os ceann gach nì cuimhnich Dia mar

do Chruithear féin,—mar t' Athair nèamhaidh a ghairm thu gu bith, agus a thug dhuit gach sochar agus beannachadh tha thu a' sealbhachadh. 'S ann uaithe-san a thàinig do shlàinte, do neart, agus do reusan,—an anail tha thu a' tarruing, agus an solus tha toirt toil-inntinn do d' shùilibh,—an lòn a ta 'gad bheathachadh, an t-eudach a ta 'gad chòmhachadh, agus an fhardoch a ta 'gad dhion agus a' toirt fasgaidh dhuit. 'S esan a dh'orduich dhuit curam do phàranta, agus caoimhneas do luchd-dàimh,—gach eòlas a chaidh dheònachadh dhuit air Dia agus air do Shlànuighear, gach fios a fhuair thu air do dhleasdanas, agus gach mothachadh a ta agad air nithibh spioradail agus siorruidh.

Cuimhnich gu bheil sùilean a' Charaid àluinn agus ghlòrmhoir so an còmhnuidh air an suidheachadh ort; gu bheil e ag amharc air gach gnìomh tha thu a' coimhlionadh, air gach focal tha thu a' labhairt, agus air gach smuain tha 'g éirigh a'd' chridhe; agus a thuilleadh air sin gu'n toir e gu cunntas thu aig là a' bhreitheanais air son gach aoine diubh so. Uime sin cuimhnich gu bheil a làthaireachd a ghnàth mu d' thimchioll. Thigeadh t'urnuigh moch agus anmoch gu cos stòl a rìgh-chaitheach. Cleachd thu féin ri bhi 'g amharc air a chumhachd agus air a ghliocas ann an obair a' chruthachaidh. Naomhaich a shàbaid, agus coisrig gach mionaid do d' bheatha d'a sheirbhis. Bi

a ghnàth a' cnuasachadh na comhairle a thug Daibhidh seachad d'a mhac, “ Agus thusa a Sholamh, a mhic, biodh aithne agad air Dia t'athar, agus dean seirbhis da le cridhe iomlan, agus le inntinn thoilich : oir tha'n Tighearn a' rannsachadh nan uile chridhe, agus a' tuigsinn uile dhealbhadh nan smuain : ma dh'iarras tus' esan gheibhear e leat ; ach ma threigeas tu e, tilgidh e uaith thu gu bràth.”

(B.)—MU MHIONNAIBH.

Is iomadh droch cleachda do bheil clann òg co maith ri seann sluagh buailteach. Agus air aon diubh so tha mionnan mi-naomha 'na chleachda cho gràineil agus truailidh, cho neo-thuigseach agus neo-leisgeulach ri aon air bith air am feud sinn iomradh a dheanamh. Gidheadh is tric a chluinneas sinn mionnan uamhasach am beul na h-òige agus na sear aois. Is tric a chluinneas sinn clann a rugadh o phàrantaibh diadhaidh, gun suim agus gun umhaill, a' toirt ainm Dhé an dìomhanas,—an t-ainm glòrmhor sin nach luaidh Iudhach no Mahometach ach le mòr-urram agus le mòr-mheas. Is tric a chluinneas sinn iadsan tha freasdal do'n eaglais agus do orduighean Dhé, 'nuair a bhios an inntinn air a feargachadh, a' guidhe mhallachd air an ceann féin, no air ceann na muinntir sin a chuir corruich orra. Is tric a chluinneas sinn iad a' gairm air Dia mar fhianuis air na nithibh is faoine agus is

gràineile a's urrainn doibh a labhairt. Agus air uairibh cluinnidh sinn iad ri mionnaibh 'nam fearas-chuideachd agus 'nan sùgradh, agus a' labhairt le mòr-thlachd focail nach bu chòir teachd o bhillibh creutair cruthaichte.

Gun teagamh dh' fheudadh an smuaineachadh a's lugha a nochdadh do'n neach is òige agus is aineolaiche 'nar measg gu bheil an cleachda so an dà chuid ro-amaideach agus ro-aingidh. Is peacadh so an aghaidh mòrachd an Uile-chumhachdaich—an aghaidh an Ti naoimh agus ghlòrmhoir sin a thubhairt ruinn, “Na tugaibh mionnan idir: na tugaibh mionnan air nèamh, oir is e rìgh-chaithir Dhé e. Na tugaibh mionnan air an talamh, oir is e stòl a chos e. Agus na tugaibh mionnan air bhur cinn, oir cha'n urrainn duibh aon fhuiltein a dheanamh dubh no geal.”

Agus air do 'n chleachda so bhi 'na ni gràineil an sealladh Dhé, tha e mar an ceudna 'na ni fuathach do gach creutair subhailceach agus diadhaidh, agus cha cheadaichear e an comunn measail agus urramach air bith. Is e mionnan cainnt nàdurra an duine ain-diadhaidh agus neo-gheamnuidh,—cainnt an t-sluaigh a ta as eugmhais subhaile agus deadh-bheusan; cainnt na muinntir sin a ta cur cùl ris an t-Slànuighcar, agus a ta teachd beò gun Dia agus gun dòchas san t-saoghal so; agus a' chainnt a bhuineas gu h-àraidh do na droch spioradaibh sin a thuit o'n ceud staid, agus do'n deach

duibhre an dorchadais a shonrachadh mar an cuibhrionn shiorruidh.

Air an aobhar sin, a chlann mo rùin, thug-aibh-sa fa'near nach toir sibh ainm an Tighearna bhur Dia an diomhanas, agus nach tig focal mionnan a chaoidh a mach as 'ur billibh. Cuimhnichibh ciod an giulan a ta freagarach do 'ur cor san t-saoghal so, agus do'n staid tha sibh a' miannachadh san t-saoghal ri teachd. Cuiribh cùl ris gach droch chleachda agus ris gach seòl seachranach, agus gnàthaichibh gu h-ìomchuidh gach meadhon a dheònaich freasdal an Tighearna dhuibh, chum sibh féin a dheanamh ni's fearr, ni's naomha, agus ni's ìomchuidh fa chomhair 'ur crìch dheireannaich.

(C.) MU'N GHREIN.

O! thusa féin a shiubhlas shuas
 Cruinn mar làn-sgiath chruaidh nan triath,
 Cia as tha do dhearsa gun ghruaim,
 Do sholus a ta buan, a ghrian?
 Thig thu ann ad àille thréin,
 Is foluichidh réil uainn an triall,
 A' ghealach 'ga dubhadh san speur
 'G a cleith féin fo stuaidh san iar.
 Tha thusa ann ad astar a mhàin,
 Co tha dàna bhi a'd' chòir?
 Tuitidh daraig o'n chruaich àird,
 Tuitidh carn fo aois a's scorr:
 Tràoghaidh agus lionaidh 'n cuan,
 Foluichear shuas an reul san speur;

Tha thusa d' aon a chaidh fo bhuaidh
 An aoibhneas buan do sholuis féin.
 'Nuair dhubhas m' an domhan stòirm
 Le torran borb is dealan bearth',
 Seallaidh tu 'na d' àille o'n toirm,
 Fiamh-ghàir ort am bruailean nan speur.
 Ach dhomhsa tha do sholus faoin,
 'S nach faic mi chaidh do ghnùis,
 Sgaoileadh cùil is òr-bhuidh ciabh
 Air aghaidh nan nial san ear:
 No 'nuair a chritheas anns an iar
 Le do dhearsa ciar air lear.
 'S maith d' fheudta gu bheil thu mar mi féin,
 'S an àm gu treun, 's gun fheum air àm;
 Ar bliadhnaidh a' teirneadh o'n speur
 A' siubhal le chéile gu 'n ceann.
 Biodh aoibhneas ort féin, a ghrian,
 'S tu neartmhor, a thriath, a'd' òige;
 'S brònach mi-thaitneach an aois,
 Mar ghealach fhaoin san speur,
 A' ruith fo neul air raon,
 'S an liath-cheo air taobh nan carn,
 An osag o thuath air an reth;
 Fear-siubhail fo bheud 's e mall.

An d' fhàg thu goirm astar nan speur,
 A Mhic gun bheud is òr-bhuidh ciabh,
 Tha dorsa na h-oidhche dhuit féin,
 Agus pàillion do chlos san iar.
 Thig na stuaigh mu'n cuairt gu mall
 A choimhead an fhir is gloine gruaidh
 A' togail fo eagal an ceann;

Ri d' fhaicinn cò-àille a'd' shuain
 Theich iadsan gu'n tuar o d' thaobh.
 Gabh-sa cadal 'na do chòs,
 A ghrian, is pill an tòs le h-aoibhneas.

(D.) EISEMPLEIR CHRISD.

Tha e air a nochdadh dhuinn le h-aon do na h-abstolaibh “gu'n d'fhàg Crìosd eisempleir againn chum gu'n leanamaid a cheumanna.” Agus gu cinnteach, air dhuinn bhi 'g aideachadh gu bheil sinn 'nar deisciobuil dha, is còir dhuinn, cha'n e mhàin bhi umhal d'a àitheant-aibh, ach mar an ceudna dìchioll a dheanamh gu bhi cosmhuil ris 'nar giulan agus 'nar caithe-beatha. 'Se ar dleasdanas bhi leantuinn eisempleir nan daoine maithe mu thimchioll am bheil cunntas againn sna sgrìobtuiribh, agus nan daoine subhailceach agus deadhbheusach a ta mu'n cuairt duinn. Ach do bhrìgh gu bheil gach creutair cruthaichte buailteach do mhearachd, agus gu minic a' clàonadh o'n t-slighe cheart, cha'n urrainn do neach air bith eisempleir fhoirfe a chur romhainn anns gach cùis. A thaobh Chrìosd tha a' chùis air dòigh eile. Bha esan ceart 'na uile shlighibh, agus naomh 'na uile ghnìomharaibh. Cha d' rugadh e am peacadh cosmhuil ris a' chinne-daoine; ni mò fhuaradh cealg 'na bheul. Uime sin tha an eisempleir a dh'fhàg e aig a shluagh gu h-iomlan foirfe, agus freagarach chum an stiùradh air an t-slighe cheart,

nan triall troimh an fhàsach dhuldaidh dhoirch so.

Ann an eachdraidh nan ceithir soisgeulaiche tha giulan agus caithe-beatha Chrìosd air am foillseachadh dhuinn air dòigh ro-shoilleir, chum ar brosnachadh gu 'eimpleir òirdheircsan a leantuinn anns gach cùis. Ma leughas sinn gu mionaideach cunntas nan Abstol mu thimchioll Iosa, chi sinn air dòigh dò-àicheadh gu'n robh e air a sgeudachadh le maise na naomhachd, agus air ungadh le h-oladh aoibhneis os ceann a chompanach; chi sinn gu'm b'e a bhiadh agus a thlachd toil 'Athar a dheanamh, agus an gnothuch cudthromach a ghabh e fo làimh a chrìochnachadh; gu'n robh e bunailteach 'na urnuigh ri Dia araon am follais agus an uaignidheas, agus a' co-éigneachadh gach neach le a bhriathraibh tlàth agus drùidhteach, gus a bheatha a chaitheadh gu stuama, gu measarra, agus gu diadhaidh san t-saoghal a ta làthair.

Cia cho fhad-fhulangach is a ghiulain e leosan a bha an còmhnuidh 'ga bhrosnachadh le'n gnìomharaibh borb agus aingidh! Cia cho iriosal 'sa bha e 'na ghiulan 'nuair bha cliu agus urram ga leantuinn air gach taobh! Cia cho foighidneach r'a naimhdibh 'nuair a bha iad ga mhaslachadh, agus cia cho cairdeil rìusan a cheus e, 'nuair a thubhairt e, "Athair, thoir maitheanas doibh, oir cha'n 'eil fhios aca ciod tha iad a' deanamh! Cia

cho curamach 'sa bha e chum gach neach a theagasg, agus a threòrachadh san t-slighe cheart! Cia cho faoilidh ris gach creutair a thàinig d'a ionnsuidh a dh' iarraidh còmhnaidh! Cia cho truacant ris na bochdaibh, agus riusan a bha euslaint! Agus cia saoibhir ann an gràdh do'n chinne-daoine 'nuair leig e a bheatha sìos air an son!

Agus do bhrìgh gu'n do chuir Criosd a' leithid so do eisempleir òirdheirc romhainn, is còir d'huinne eadar bheag agus mhòr oidhearp dhìchiollach a thoirt air an eisempleir sin a leantuinn. Chum na crìche so leughamaid gu cùramach agus gu gràdhail gach nì tha am Biobul a' foillseachadh dhuinn mu 'thimchioll. Smuainicheamaid gu suidhichte air gach nì a rinn agus a dh'fhuiling e air ar son. Deanamaid dìchioll gu bhi naomha mar a ta esan naomh, agus iomlan mar a ta esan iomlan; agus biomaid a ghnàth a' guidhe gu'n tugadh Dia gràs duinn chum's gu'm bi sinn air ar deanamh co-chosmhuil ri ìomhaigh a mhic, le bhi air ar cruth-atharrachadh tre ath-nuadhachadh ar n-inntinn, chum gu'n dearbh sinn ciod i toil mhaith, thaitneach, agus dhiongmhalta ar Dé.

(E.) AN COLUMAN.

Tha an columan air aon do na h-eunlaith a thig beò anns gach cearna do'n t-saoghal Gheibhear e anns gach àite san tuinich mac an duine, agus ma bhios pailteas aige g'a chumail

suas, fàsaidh e lìonmhor araon ann an dùthchaibh teth agus fuar. 'Se is biadh dha gach gné shìl, meas fiadhaich, agus bileagan nan luibhean maoth tha fàs sa' mhachair. Tha e am bitheanta iomadh-dathach; ro-sgiamhach 'na dhreach, agus mu'n cuairt do chùig oirlich deug air fad. 'Nuair théid e a dh'ionnsuidh uisge a chasgadh iota, cha'n òl e balgam an déigh balgaim, mar a ni eunlaith eile, ach sluigidh e sìos a dbeoch a dh'aon tarruing, mar a ni beathaiche ceithir-chosach na macharach.

Geibhear iomadh gné choluman san dùthach so,—cuid diubh fiadhaich agus ciud diubh soirbh. Tha'n columan fiadhaich ni's mò na an columan soirbh; a' tomhas an cumantas mu'n cuairt do sheachd oirlich dheug air fad. Cha ghabh e deanamh soirbh no tàladh dh'ionnsuidh baile; ach tuinichidh e sna coilltibh, agus ni e a nead ann an gobhal nan craobh, no ann an sgeiribh nan creag. Cha toir an columan fiadhaich a mach ach aon àl sa' bhliadhna; ach bheir an columan soirbh a mach àl anns gach mìos, ma bhios pailteas bìdh air a sholair air a son; agus air an dòigh so siolaichidh paidhir dhiubh ann an ceithir bliadhna gu bhi 'nan dà mhìle dheug an àireamh.

Anns na sean aimsiribh bha daoine cleachdadh litrichean cabhagach a chur leis a' choluman o aon bhaile gu baile eile. Tha aon seòrsa do'n eunlaith so cho dùchasach is gu'm pill e dhachaidh o àite air bith do'n téid a ghiulan

cho luath 'sa gheibh e comas; agus tha ni éigin 'na nadur g'a stiùireadh dìreach dh'ionnsuidh 'àite-àraich, ged robh e aineolach air an t-slighe, agus ged robh astar fad aige ri dheanamh. Thug daoine na nithe so fa'near; agus 'nuair a bha iad toileach air fios cabhagach a chur o aon bhaile gu baile eile, bha iad a' toirt leo columan o'n bhaile dh'ionnsuidh an robh iad miannachadh fios a chur; bha iad ga ghleidheadh ann an eunadan gus an robh ni sonraichte aca r'a fhoillseachadh; agus an sin bha iad a' ceangal litreach fo aon d'a sgiathaibh agus ga leigeal air falbh. Co luath 'sa bha an columan faotainn a chead, dh'éireadh e gu h-àrd san athair, agus an sin philleadh e dhachaidh, a' siubhal mu'n cuairt do dhà fhichead mìle san uair. Air eagal gu'n tach-airleadh ni éigin da air an t-slighe, bha columan eile air a chur air falbh dà uair 'na dhéigh le dùblachadh na litreach ceudna. Agus air an dòigh so bha naigheachdan cudthromach air an giulan o bhaile gu baile, agus o rìoghachd gu rìoghachd, ann an ùine ro ghoirid.

Tha an columan gu minic air ainmeachadh sna sgrioptuiribh. 'Se aon diubh so a chuir Noah a mach as an àirc a dh'fheuchainn an do thraogh an dìle bhàrr aghaidh na talmhainn. Bha an columan air a mheas 'na eun glan le lagh Mhaois, agus bha e air a shonrachadh gu bhi air a thoirt suas 'na ìobairt do'n Tighearna, a réir mar a chi sinn anns a' cheathramh caib.

deil deug do leabhar Lebhiticus. Ann an leabhar nan Salm tha Daibhidh ag ràdh mu thimchioll an t-sluaigh a fhuair tràcair o Dhia, “Gu’m bitheadh iad mar sgiathaibh columain air an còmhachadh le h-airgiod, agus ’iteagan le h-òr buidhe;” agus tha am fàidh Isaiah ag ràdh mu thimchioll nan Iudhach, ’nuair bha iad air an smachdachadh le Dia air son an aingidheachd, “gu’n robh iad a’ bùirich mar mhath-ghamhuin, agus mar choluman gu’n robh iad ri sìr-chaoirean.” Tha e air a nochdadh dhuinn anns an t-soisgeul a réir Mhata, ’nuair a bhais-teadh Criosd, gu’n d’fhosgail nèamh dha, agus gu’n do thuirling spiorad Dhé mar choluman, agus gu’n do ghabh e còmhnuidh air. Agus an uair a thug Criosd comhairle air a dheisciobluibh a thàobh an giulain am measg an naimhdean, thubhairt e, “Bithibhse glic mar na nathraichibh, agus neo-chronail mar an columan:” a’ ciallachadh gu’m bu chòir dhoibh bhith ro-fhaicilleach mu thimchioll gach nì a theireadh ad, agus oidhearp a thoirt gun chron a dheanamh do neach air bith.

(F.) MU SMUANTIBH IRIOSAL.

Is miann leis gach neach eòlas saoghalta agus cliu dhaoine a mhealtuinn; ach ciod an tairbhe a ta ann an cliu agus am foghlum gun eagal Dé? Is fearr gu deimhin am fear-dùthcha iriosal a ta ri seirbhis do Dhia, na am feallsanach uaibhreach a ta beachdachadh air cùrsa nan

nèamh, is g'a dhearmad féin. An neach d'an aithne e féin gu maith, bithidh e suarach 'na shealladh féin, agus cha tlachd leis cliu dhaoine. Ged b' aithne do dhuine gach foghlum a ta r'a fhaotainn, agus gach lagh a ta riaghladh a' chruinne-ché, ma tha e aineolach air truailleadh-eachd a chridhe féin, agus as eugmhais gràidh do'n Ti sin a chruthaich e, ciod an tairbhe a bhios 'na 'uile eòlas an làthair Dhé, 'nuair a bheirear breth air a réir a ghnìomhara?

Leig dhiot mòr-mhiann air cliu an t-saoghail so, do bhrìgh gu'm faighear an sin mòr chealg agus seacharan inntinn. Iadsan a ta foghlumte is miann leo bhì air am meas agus air an gairm 'nan daoine glìce; agus tha iad gu minic ag iarraidh deadh-ghean dhaoine thar deadh-ghean an Tighearna. Is mì-chiallach an duine sin a chuireas a dhùil ann an nithibh talmhaidh, 'nuair tha e a' dìchuimhneachadh nan nithe sin tha feumail chum beatha agus slàinte. Cha sàsuich mòran fhocal an t-anam; ach tha deadh chaithe-beatha a' toirt fois do'n inntinn, agus coguis ghlan a' toirt seachad mòr-earbsa ann an Dia.

Mar is mò agus is fearr t'eòlas, 's ann o sin is truime a bheirear breth ort mur caithe thu do bheatha a réir laghe Dhé. Uime sin na bì air do thogail suas le eòlas no foghlum air bith, ach bitheadh eagal ort an còmhnuidh nach 'eil thu a' gluasad a réir nan cothromana a chaidh dheònachadh dhuit. Ma chithear leat

gur aithne dhuit mòran do nithibh, agus gu bheil t'èolas a' ruigheachd a dh'ionnsuidh nithe dorch a agus do-thuigsinn; cuimhnich aig an àm cheudna gur lionmhor iad na sin gu mòr na nithe air am bheil thu aineolach. Na bi àrd-inntinneach, ach gu'm b'fhearr leat t'aineolas aideachadh. Na cuir thu féin roimh neach sam bith, agus na dean tàir air aineolas neach eile, 'nuair a gheibhear mòran ni's foghlumte agus ni's glìce na thu féin. Ma's àill leat eòlas agus iunnsachadh feumail fhaghail, bi an comhnuidh a' fiosrachadh do dhleasdais do Dhia, agus 'gad mheas féin neo-fhoghlumte. Cuimhnich gu bheil gach neach lag agus buailteach do mhearachd; agus faic nach meas thu neach air bith ni's anmhuinne na thu féin.

(G.) LAOIDH VII.

- 1 Am bi siol Adhaimh saor o chiont',
No glan am fianuis Dé?
Ma thagras e réir ceartais ruinn
F'a smachd théid sinn do'n eug.
- 2 Gu geur-chuiseach ma thoirhseas e
Gach smuain, is guth, is gnìomh;
Leisgeul, air son aoìn do mhìle ciont'
A dhealbh cha'n urrainn mi.
- 3 Is glìce a chridh' 's is treun a làmh,
'S nach aingidh dàn an sluagh
A thogas ceann an aghaidh Dhia,
Cò riamh thug airsan buaidh?

- 4 Roimh 'fheirg na sléibhte críothnaichidh,
Is clisgidh iad o'm bonn ;
O bhunchar luaisgidh null 'sa nall,
Le garbh-chrith, 'n talamh trom.
- 5 Ma thoirmisgeas e éirigh gréin',
Cha'n éirich grian gu bràth :
Dubh-neulach ni e 'n speur air fad,
'S gach reul théid as 'na smàl.
- 6 Coisichidh Dia san fhairge gharbh,
Carbad do ghaothaibh ni ;
A shlighe àrd co lorgaicheas ?
A cheuma dorch co chi ?
-

(H.) AIMSIREAN NA BLIADHNA.

'Tha ceithir aimsirean sa' bhliadhna,—an t-earrach, an samhradh, am foghar agus an geamhradh. San earrach tha an tuathanach ag ár an fhearainn, agus a' cur an t-sìl san talamh : tha na h-eoin a' deanamh an nead agus a' toirt a mach an àlach ; agus tha na craobhan a' teachd fo bhlàth, agus aghaidh a' chruthachaidh a' fàs ùrar agus gorm. San t-samhradh tha a' ghrian a' dealradh a mach 'na maise, 'na blathas, agus 'na neart ; tha i a' toirt beatha agus fàs do na mìtibh do chreutairibh tha ag éirigh as an dùslach ; agus le a caoinealachd, agus le fàile an uisge tha na craobhan air an còmhachadh le meas,—na gàraidhean air an sgeudachadh le plùranaibh,—agus a' mhachair a' giùlan pailt-

cas sìl air son lòn do dhuine agus do ainmhidh.

San fhoghar tha gach ni a' teachd gu foirfeachd. Tha an t-arbhar, air dha bhi abuich, air a ghearradh sìos, agus air a chruinneachadh a steach do lannaibh agus do shaibhlibh: Tha am meas air a spionadh bhàrr nan craobh, agus air a thasgaidh ann an tighibh stòir: Tha duilleach na coille a' crìonadh, agus gach luibh mhaoth tha fàs sa' mhachair a' nochdadh gu soilleir gu bheil deireadh na bliadhna am fagus. An déigh an fhogharaidh thig an geamhradh a riaghladh na bliadhna. Agus le a theachd fàsaidh an là goirid agus an aimsir fuar; bithidh na neoil air an luchdachadh le sneachd agus cloich-mheallain; agus seargaidh an doinionn anradhach agus a' ghaoth-reòtaidh gach luibh ùrar agus ghorm,—sgapaidh iad an duilleach tha còmhdachadh nan craobh,—agus tionndaidh iad gach ni tha sgeadachadh aghaidh na talmhainn gu coslas agus cruth a' bhàis.

Do'n duine eugnaidh agus ghlic tha aimsirean na bliadhna agus obair a' chruthachaidh gu h-iomlan mar leabhar fosgailte, anns am bheil e a' leughadh maitheis agus mòrachd Chruithfhir na talmhainn. San earrach tha e faicinn a chaomhalachd, 'nuair tha e toirt air blàthas na gréine aghaidh an t-saoghail nàdurra ath-ùrachadh, agus tha e a' lionadh cridhe gach creutair aig am bheil mothachadh le gairdeachas agus gean. San t-samhradh tha

e faicinn glòir agus mòralachd a nàduir, 'nuair tha a làmh thoirbheartach a' sgeadachadh gach ni le maise, agus a' deanamh tigh-stòir do'n chruinne-ché, far am bheil e solar pailteas a shàsachadh miann gach creutair a chruthaich e. San fhoghar tha e faicinn a mhaitheis, 'nuair tha an t-arbhar a' fàs buidhe air na machraichibh, agus tha gach ni air aghaidh a' chruthachaidh a' deanamh eadar-mhìneachadh soilleir air firinn nam briathra so, “ Tha sùilean gach ni a' feitheamh ortsas, o Dhé, agus bheir thu dhoibh am biadh ann an àm iomchuidh: Fosglaidh tu do làmh fhialuidh agus sàsuichidh tu miann gach ni beò.” Agus sa' gheamhradh tha e cluinntinn guth a chumhachd, agus a' faicinn neart a chorruich 'nuair tha e còmh-dachadh an talmhainn le sneachd,—a' sgaoileadh an liath-reothadh mar luaithre, agus a' tilgeadh a mach 'eighe mar ghreamannaibh. Tha gach ni dhiubh sin a' toirt dearbhadh cinnteach dhuinn air cumhachd, air gliocas, agus air maitheas an Ti sin tha 'g orduchadh aimsirean na bliadhna 'nan amannaibh suidhichte, agus a ta riaghladh a' chruinne-ché gu h-ionlan.

(I.)—AN FHAIRGE.

A réir cunntas nam feallsanach tha an fhairge trì uairean ni's mò na an talamh tioram. Is àluinn an sealladh bhi 'g amharc air an fhairge, agus bhi toirt fa'near an dòigh shoilleir air am bheil i a' nochdadh maitheas agus gliocas an

Uile-chumhachdaich. Tha rìoghachdan mòr an t-saoghail so ag éirigh á h-uchd mar a dh' éireas eileanna beaga á uchd lochan; agus shluigeadh i suas iad gu grad ann an doimhneachd a h-uisgeachan, mur biodh i air a cumail air a h-ais leis-san a their rithe le cumhachd “ An fhad so thig thu, agus na tig ni's faide !”

Cha'n 'eil boinne do'n uisge tha tuiteam as na speuraibh nach 'eil air tùs ag éirigh as a' chuan; agus 'se so aon do na reusonaibh cudthromach air son meudachd nan uisgeacha air aghaidh an domhain. Tha na neoil a thaisicheas an talamh le uisge mìn, agus le druchd thlàth, a' tarruing an stòrais gu h-ìomlan o na cuantaibh; agus mur bitheadh na cuantan farsuinn gu leòr chum an sàsachadh le pailteas do dhrùchd, chrionadh gach ni a dhìth uisge, agus bhiodh an talamh tha sinn ag àiteachadh tioram agus neo-thoirteach, amhuil fàsaich Arabia. Tha uisge cho feumail do'n talamh ri teas; agus air an aobhar sin tha an Fhairge agus a' Ghrian air an deanamh nam meadhona chum toradh na macharach a thoirt gu foirfeachd. As eugmhais na Fairge cha bhiodh sùth san talamh chum an luibh mhaoth a bheathachadh; agus as eugmhais na Gréine cha bhiodh teas ann chum am meas agus an t-arbhar a thoirt gu h-abachd.

Cia beartach agus neo-thràigheach an tigh-stòir an fhairge. Innte tha mìlte do iasgaibh

air an orduchadh air son lòn a bheathachadh ar cuirp. Oirre tha iomadh long a' seòladh le marsandachd nan Innsean a fhreasdal do ar n-uile mhiann. Tha i 'na slighe còmhnard agus so-shiubhal gu dòl do dhùthchannaibh fad air astar; agus ann an là a' chogaidh agus a' chruaidh-chais tha i 'na balla-dionaidh dhuinn o ar naimhdibh mi-runach. Ann an uchd na fairge tha cabhlach cogaidh nan rìghrean cumhachdachd a' seòladh; gach aon diubh air a h-armadh le acfuinn-bàis; sgeudaichte le iomadh breid gheal agus craun àrd; daingean gu comhrag mar chaisteal no creug; agus mar mhìol-chu luath gu sìubhal air tòir an namhaid.

Is iongantach oibre an Tighearna. Tha an saoghal so làn d'a mhaithreas, agus tha gach earrann do obair a' chruthachaidh a' gairm gu h-àrd cia òirdheirc a ta e an gliocas agus an cumhachd. 'Nuair a bheachdaich Daibhidh air cumhachd an Tighearna, mar a ta e air a nochdadh ann an dealbh agus an cumail suas nan uisgeacha, thubhairt e, “Iadsan a théid sìos do'n fhairge air longaibh, a ni obair an uisgeachaibh mòra, chi iadsan gnìomharan an Tighearna, agus a bhearta iongantach san doimhne. Oir labhraidh e, agus dùisgidh e a' ghaoth dhoinionnach, agus togaidh i a tonnan. Théid iad suas do na nèamhaibh; théid iad sìos do na doimhneachdaibh; le h-àmhghar leaghaidh an anam. Théid iad thuige agus

uaith, agus tuislichidh iad mar dhuine air mhisg; agus théid as d'an céill uile. An sin glao dhaidh iad ris an Tighearn 'nan airc, agus as an teanntachdaibh bheir e iad. Cuiridh e an doinionn gu fèith, agus bithidh a tonnan 'nan tàmh. An sin bithidh iad ait; agus bheir e iad do'n chaladh a's miannach leò."

(K.)—SLIGHE RIOGHAIL A' CHRANN-CHEUSAIDH.

Measar le iomadh neach gur cruaidh an ràdh so, "Diult thu féin, tog do chrann-ceusaidh, agus lean an Tighearna Iosa Criosd." Ach bithidh e mòran nì's cruaidhe am focal deireannach ud a chluinntinn, "Imichibh uamsa, sibhse a ta malluichte gu teine siorruidh." Oir iadsan a ta a nis a' cluinntinn gu toileach;—iadsan a ta leantuinn briathran a' chrann-cheusaidh, agus tha cur an dòchas ann an Criosd air son fireantachd agus beatha, cha bhi eagal orra gu'n téid am fàgail gu bàsachadh gu siorruidh. 'Nuair thig Criosd chum breitheanais, thig iadsan uile a bha 'nan seirbhisich do'n chrann-cheusaidh, agus a naisg iad féin an coimhcheangal siorruidh r'an Slànuigh-ear, le dànadas 'na làthair, agus their iad ris, "saor sinn air sgàth t'fhìreantachd féin."

C'arson uime sin a bhiodh fiamh oirnn ar crann-ceusaidh a thogail,—gu h-àraidh 'nuair a bheir sinn fa'near gu bheil e a' treòrachadh a dh'ionnsuidh rioghachd? Oir sa' chrann-cheus-

aidh tha slàinte agus beatha a' seasamh; sa chrann-cheusaidh tha fois cogais agus tearmun o gach namhaid; sa' chrann-cheusaidh tha neart na h-inntinn agus gairdeachas an spioraid; agus sa' chrann-cheusaidh tha àirde na subhailce agus iomlaineachd na naomhachd. Cha'n 'eil maitheanas peacaidh, no slàinte an anama, no earbsa na beatha siorruidh ach anns a' chrann-cheusaidh. Uime sin cuir thu féin, mar sheirbhiseach maith agus fireanach Chrìosd, chum crann-ceusaidh do Thighearn a ghiulan, agus guidhe gu dùrachdach gu'm biodh tu a ghnàth bàsachadh do'n t-saoghal so, chum as á so suas nach bi thu beò dhuìt féin, ach dhasan a dh'fhuiling am bàs air do shon, agus a dh' éirich a rìs.

Tha e soilleir gur ann tre thrioblaid is éigin duinn dol a steach do rìoghachd Dhé; agus uime sin tha ar Slànuighear ag ràdh r'a dheisciobluibh agus r'a luchd-leanmhuinn, “ma's àill le neach air bith teachd a'm' dhéigh-sa àicheadhadh se e féin, agus togadh e a chrann-ceusaidh, agus leanadh e mise.” Na diultamaid bhi umhal do'n àithne so; agus thugamaid an còmhnuidh fa'near gur e is cainnt do ar cridhe,

- 1 Cha'n aobhar nàire leamsa Crìosd,
 No 'chùis a dhion gu beachd:
 A crann a cheusaidh ni mi uaill;
 Géilleam gach uair d'a reachd.

- 2 Iosa, mo Dhia ! is eòl dhomh 'ainm,
 Is earbam as gu bràth ;
 Cha nàraich esan m'anam truagh,
 'S cha chum e uam a ghràs.
- 3 Daingean is buan mar chaithir Dhia,
 Gach cian tha gealladh Chrìosd ;
 O ! 's tèaruint' m'anam-sa 'na làimh,
 Gu là a theachd a rìs.
- 4 San là sin fàiltichidh e m' ainm,
 An làthair 'Athar chaoimh ;
 Is sealbh san Nuadh Ierusalem
 Do m'anam bheir le naoimh.

(L.)—MU IONAH.

Thug Dia àithne do Ionah mac Amitai dol gu Ninebheh, àrd-bhaile nan Asirianach, agus a ghuth a thogail an aghaidh an t-sluaigh a bha chòmhnuidh ann, do bhrìgh gu'n robh an aingidheachd air teachd suas 'na làthair. Cha robh tlachd aig Ionah so a dheanamh ; agus uime sin dh'èirich e gu teicheadh o fhianuis an Tighearna. Chaidh e sìos gu Iopa, baile a bha 'n cois na fairge, agus air faotainn luinge dha an sin a bha dol gu Tarsis, dhiol e an luach-aisig agus chaidh e sìos innte. Ach chuir an Tighearna mach gaoth mhòr air an fhairge, agus bha an doinionn buaireasach, ionnus gu'n do shaoil na maraichean gu'm biodh an long air a briseadh. Ghlac eagal mòr iad, agus air dhoibh

am bathar a thilgeadh a mach as an luing chum a h-eutromachadh, thubhairt iad gach aon r'a chompanach, tilgeamaid croinn chum gu'n aithnicheamaid c'ar son a ta an t-olc so air teachd oirnn. Agus air dhoibh croinn a thilgeadh thuit an crannchur air Ionah.

An sin dh'innis Ionah do na seòladaraibh ciod a rinn e, agus cia mar a theich e o fhianuis an Tighearna. Dh'aidich e gu'm b'ann air a shon-san a thàinig an t-olc so orra, agus dh'iarr e gu'n tilgeadh iad san fhairge e chum gu'm fàsadh i ciùin. Cha robh tlachd aig na maraichean so a dheanamh; ach an uair a dh'fhàs onfha na fairge ni bu anradhaich, agus a chunnaic na daoine nach robh dòigh air bith aca air dol as, an sin ghlac iad Ionah, agus thilg iad san fhairge e, agus air ball bha fèith mhòr ann. Ach cha do thréig Dia Ionah 'na theanntachd, oir dh'ulluich e iasg mòr chum a shlugadh suas beò; agus bha Ionah trì làithean agus trì oidhchean ann am broinn an éisg.

'Nuair a smuainich Ionah air a ghiulan ceannairceach rinn e urnuigh ri Dia á broinn an éisg. Mhothaich e nis gu'm bu diomhain an ni cathachadh an aghaidh an Uile-chumhachdaich, agus nach robh e an comas do neach air bith teicheadh o a spiorad, no e féin fholach o a shùile uile-léirsinneach. Thug Dia éisdeachd d'a urnuigh, agus dh'orduich e do'n iasg a thilgeadh a mach air talamh tioram. An déigh na saorsa mìorbhuileach so, dh'éirich

Jonah agus chaidh e gu Ninebheh a réir focail an Tighearna. Thug e rabhadh dhoibh a thaobh an cunnairt air son an droch ghniomhara, agus ghlaodh e am meadhon a' bhaile, "Fathasd dà fhichead là, agus sgriosar Ninebheh." Ach ghabh muinntir Ninebheh aithreachas, agus ghairm iad trasg, agus dh'ìrroslaich siad iad féin an làthair an Tighearna. Air an aobhar sin phill Dia a chorruidh uapa, agus ghabh e aithreachas mu'n olc a thubhairt e gu'n deanadh e orra.

Ach bha Jonah diombach a chionn gu'n do chaomhain Dia muinntir Ninebheh; agus bha e ann an corruich do bhrìgh gu'n do bhreugaicheadh 'fhocal a thaobh nan nithe a labhair e mu'n bhaile mhòir sin. An déigh do Jonah fios a thoirt do mhuinntir Ninebheh air an olc a bha gu teachd orra, chaidh e mach as a' bhaile, agus shuidh e sìos chum gu'm faiceadh e cìod a thachaireadh dhoibh. Thog e bothan d'a féin an taobh a muigh do'n bhaile, agus dh'ulluich Dia luibh-sgàile a thilgeadh dubhar air o theas na gréine. 'Nuair a chunnaic Jonah an luibh-sgàile bha e aoibhneach; ach air maduinn an ath-là bhuail Dia i agus shearg i: an sin bha Jonah an corruich ri Dia, agus thubhairt e, "Is fearr dhomh bi marbh na beò." An sin thubhairt an Tighearna ris, Choigleadh tusa, an luibh-sgàile air son nach do shaothraich thu, ni mò thug thu oirre fàs. Agus nach coiglinn-sa Ninebheh, anns am bheil tuilleadh

agus sè ceud mìle pearsa do nach aithne an làmh dheas seach an làmh chlì ?

(M.) MU ULLUCHADH FA CHOMHAIR BAIS.

A mhic mo ghaoil, is gearr an ùine gus an éigin duit tar a mach as an t-saoghal so. Uime sin faic ciod e staid do chridhe a thaobh Dhé. An diugh tha an duine cridheal agus sunndach sa' bheatha so, agus am maireach siubhlaidh e gu siorruidheachd. Nach mòr ma ta cruas agus antromas cridhe an duine a ta sealltuinn a mhàin air na nithibh a ta làthair, agus nach seall air na nithibh a ta ri teachd. Na dean thusa mar so, a mhic. Ulluich thu féin gach là fa chomhair bàis, breitheanais, agus siorruidheachd. Aig teachd na maidne na abair ri do chridhe gu'm faic thu a' ghrian a' dol fodha aig beul na h-oidhche. Air teachd do'n oidhche na geall dhuit féin solus na h-athmhaidne. Bì a ghnàth deas, agus caithe do bheatha air an dòigh sin, ionnus nach glac am bàs thu gu bràth mi-dheasaichte.

Seall ort féin mar fhear-turuis agus mar choigreach air thalamh, do nach buin ni do ghnothuichibh an t-saoghail so. Cum do chridhe saor agus togta suas ri Dia, do bhrìgh nach 'eil àite-còmhnuidh buan agad air thalamh. Coimhlion a nis ciod air bith a's urrainn duit a dheanamh, do bhrìgh nach aithne dhuit ciod an uair am faigh thu bàs. Iunnsaich a

nis bàsachadh do'n t-saoghal so, chum's gu'n
tòisich thu air a bhi beò maille ri Crìosd ; agus
fàg thu féin gu h-ìomlan an taice ris chum's
gu'n abair thu aig uair a' bhàis,

Chriochnaich mi nis mo chath 's mo réis ;

Is dlùth dhomh eug is uaigh ;

M' anam a choisrig mi do Dhia,

Triallaidh gu nèamh le buaidh.

Le armaibh nèamhaidh chuir mi 'n cath,

Fo bhrataich Chrìosd mo Thriath :

Ruith mi mo réis, mo dhìlseachd dhearbh,

'Sa tha m' earbs' á duais o m' Dhia.

Fa m' chomhair-sa thaisg Dia air nèamh,

Gu tèaruint' crùn na glòir' ;

A chuireas a làmh-san air mo cheann

Air teachd do'n là mhòir.

Mo Dhia cha d'orduich dhomhsa mhàin

An coron so mar dhuais ;

Ach do gach neach le'n ionmhuinn teachd

A mhic, o nèamh a nuas.

O lochd 's o chunnart dìonaidh Crìosd ;

Mo choimhead ni gach uair ;

'S gu tèaruint m'anam trèoraichidh

Gu riogh'chd na glòire shuas.

Bheir mi, le còmhnadh treun mo Thriath,

Dùlan do ifrinn féin ;

Is dhasan gu'n robh glòir an-àrd

Is cliu gu bràth. Amen !

(N.) MU DHANIEL.

An déigh do Dharius Babilon a ghlacadh, agus Belsasar an rìgh a chur gu bàs, thug e leis Daniel maille ris féin gu Media, agus an sin dh'àrdaich se e gu h-urram agus inbhe mhòr, a chionn gu'n d'fhuair e spiorad a' ghliocais ann. Bha so 'na aobhar trioblaid agus geur-leanmhuinn do Dhaniel. Ghabh daoine mòra an rìgh farmad ris do bhrìgh gu'n robh e air àrdachadh os an ceann féin. Ach ghluais Daniel gu faicilleach 'na dhreuchd, agus bha e firinneach anns gach cùis a bha 'n earbsa ris, ionnus nach b'urrainn a naimhdean cionta air bith a chur as a leth. Chuir so mòran campair orra, agus do bhrìgh gu'm fac iad gu'n robh e 'na dhuine coimhlionta agus dìreach, agus air an aobhar sin, nach b'urrainn doibh cealg no eucoir a chur as a leth, dhealbh iad innleachd chum a ribeadh a thaobh a chreidimh.

A' gabhail orra féin mòr-mheas a bhi aca do'n rìgh, chaidh iad d'a ionnsuidh agus thubhairt iad ris gu'n do ghabh uile uachdarain na rìoghachd comhairle le chéile gu reachd rioghail a dhaingneachadh, "ge b' e dh'iarras ath-chuinge air bith air aon Dia no duine ré dheich làithean fichead ach air an rìgh a mhàin, gus n tilgear e an garaidh nan leòmbhan." Cha do thuig an rìgh ciod a bha a dhaoine mòra toileach a choimhlionadh leis an reachd so, agus cha d' thug e fa'near gu'n robh iad a' miannachadh

Daniel a chur gu bàs do bhrìgh gu'n do thog e féin e gu h-àrd os an ceann. Uime sin sheulaich e an sgrìobhadh agus an t-ordugh.

An uair a chual Daniel gu'n deachaidh an sgrìobhadh a sheulachadh, chaidh e chum a thighe, agus rinn e urnuigh, agus thug e buidheachas an làthair a Dhia mar a rinn e roimhe. An sin thàinig na prionnsachan a dh'ionnsuidh Dhariuis, agus chasaid iad Daniel do bhrìgh nach robh e umhal do'n reachd, agus dh'iarr iad gu'm biodh e air a thilgeadh ann an garaidh nan leòmhnan. An sin, 'nuair a chual Darius briathra nam prionnsachan, thuig e ciod bu deoin leo leis an reachd a dhealbh iad, agus bha e ro-diombach air féin a chionn gu'n do sheulaich e i, agus shaothraich e gu dol fuidhe na gréine chum Daniel a thèarnadh. Ach chruinnich na prionnsachan a rìs d'a ionnsuidh, agus thubhairt iad ris, “ O a rìgh, biodh fhios agad gur e iagh nam Medach agus nam Persach, nach feudar ordugh no reachd air bith a dhaingnich an rìgh a chaochladh.” An sin dh'àithn an rìgh, agus thug iad leo Daniel, agus thilg iad e an garaidh nan leòmhnan.

Bha e 'na nì ro-chruaidh ann an sùilibh an rìgh Daniel a thoirt thairis do làimh a naimhde ; ach bha e an dòchas gu'n deanadh an Dia sin do'n robh Daniel ag aoradh a thèarnadh o na leòmhanaibh. Air do'n rìgh a' chlach a bha air beul a' gharaidh a sheulachadh, phill e chum a lùchairt agus thraisg e an oidhche sin.

Air teachd do'n mhaduinn dh' éirich e gu moch, agus thàinig e chum a' gharaidh, agus ghlaodh e le guth muladach ri Daniel, ag ràdh, "Am bheil do Dhia anns an do chuir thu do dhòchas comasach air do thèarnadh o na leòmhanaibh?" An sin dh'innis Daniel dha gu'n do chuir a Dhia 'aingeal maille ris a dhruid beul nan leòmhnan, air chor as nach d' rinn iad a dhochann, do bhrìgh gu'n do ghluais e gu neòchiontach 'na fhianuis. Thug so mòr thoil-inntinn do'n rìgh, agus air ball dh'orduich e gu'n tugadh iad Daniel a nìos á garaidh nan leòmhnan, agus gu'n tilgeadh iad sìos do'n gharaidh cheudna an sluagh a rinn casaid air.

Tha Iosephus ag innseadh dhuinn, 'nuair chunnaic naimhdean Dhaniail nach d' rinneadh dochann air, gu'n d' thubhairt iad gu'n robh na leòmhain air an sàsachadh le biadh mu'n deach a thilgeadh d'an ionnsuidh, agus gur e so bu aobhar nach do thuit iad air agus nach do mharbh iad e. Chual an rìgh an tagradh, agus chum dearbhadh soilleir a thoirt doibh nach b'e so an dòigh air an robh Daniel air a theas-airginn, dh'orduich e na leòmhain a shàsachadh le pailteas bìdh, agus an sin na daoine so, agus am mnathan, agus an clann a thilgeadh d'an ionnsuidh. Ach cha do chaomhain na leòmhain iad mar a rinn iad Daniel, oir thug iad buaidh orra, agus bhris iad an cnàmhan 'nam bloighdibh mu'n d' ràinig iad iochdar a' gharaidh.

(U.) LAOIDH MHAOIS, AN DEIGH DO DHIA NA
H-EIPHITICH A BHATHADH SA' MHUIR
RUAIDH.

Canaidh mise do'n Tighearn, oir thug e buaidh gu glòrmhor: an t-each agus a mharcach thilg e san fhairge. 'Se an Tighearn mo neart, agus mo dhàn, agus tha e 'na shlàinte dhomh; is esan mo Dhia-sa, agus ni mi àite-còmhnuidh dha; Dia m'athar agus àrdaichidh mi e. Is fear-cogaidh an Tighearn; is e an Tighearn a's ainm dha. Carbadan Pharaoh, agus 'armailt thilg e san fhairge; agus tha roghadh a cheannardan air am bathadh san fhairge ruaidh. Dh' fholaich na doimhneachdan iad; chaidh iad sìos do'n aigean mar chloich.

Rinneadh do dheas làmh, O Thighearna, glòrmhor ann an cumhachd; bhris do dheas làmh, O Thighearna, an namhaid 'na bhloighdibh. Agus am meud t'òirdheirceis chlaoidh thu iad-san a dh'éirich suas a'd' aghaidh: chuir thu t'fhearg a mach, loisg i suas iad mar asbhuan. Agus le anail do shròine chruinnicheadh na h-uisgeacha; sheas na tuitte suas mar thòrr, chruaidhich na doimhneachdan am meadhon na fairge. Thubhairt an namhaid, leanaidh mi, beiridh mi orra, roinnidh mi a' chreach: sàsuichear mo mhiann orra; rùisgidh mi mo chlaidheamh, sgriosaidh mo làmh iad. Shéid thu le d' ghaoith, chòmhdaich an fhairge iad,

chaidh iad fodha mar luaidh anns na h-uisgeachaidh làidir.

Cò a's cosmhuil riut-sa am measg nan Déa, a Thighearn? Co tha cosmhuil riut, glòrmhor ann an naomhachd, uamhasach ann am moladh, a' deanamh nithe iongantach. Shìn thu mach do dheas làmh, shluig an talamh suas iad. Threòraich thu ann ad thròcair an sluagh so a shaor thu; thug thu iad ann ad neart gu àite-còmhnuidh do naomhachd.

AN DARA EARRANN.*

1. Is còir do gach neach Dia a ghlòrachadh. Cha'n 'eil an duine sud a' mealltuinn deadh shlàinte. Tha do bhràthair air fàilneachadh gu mòr. Fhuair e a chuibhrionn féin do'n spùinn. Cha'n aithne dhomh aon neach a ghabhas coimeas ris. Ciod an riaghailt a thug e dhuibh gad sheòladh sa' chùis so? Tha sgriop-

* Co luath 'sn thòisicheas am foghlumach air an "Dara earrann" do'n leabhar so a leughadh cuiridh am maighstir-sgoile *Leabhar aithghearr nan ceis* 'na làimh, agus iunnsaidh e earrann deth gach là gus an téid e troimh.

tuirean an t-seann tiomnaidh agus an tiomnaidh nuaidh a' foillseachadh dhuinn ciod e ar dleas-danas do Dhia agus dhuinn féin. Leag e bunait an tighe, agus thòisich na clachairean air a thogail. Shnaidh e clach-chinn na h-oisinn.

2. Chaidh am Biobul a dheachdadh le spiorad an Uile-chumhachdaich. Thoir spreige dha air son a dheanadais. Fhuair e a dheadh oilein, ach cha d' thug e deadh-bhuil as. Chuir an rìgh d'a ionnsuidh samhladh na h-altarach. Bha a' chraobh fallain, ùrar, agus gorm. Tha Dia neo-chrìochnach agus neo-chaochluidheach. Cha'n urrainn domh greim fhaghail do mheanglan na craoibhe daraich. Tha Dia o bith-bhuantachd gu bith-bhuantachd; maille ris-san cha'n 'eil sgàile tionndaidh. Cha d' thàinig atharrachadh air bith air cruth an duine so. Tha an duine iochdmhor 'na dhuine gràsmhor. (P.) *T.d.* 58.

3. Is còir do gach neach bhi foighidneach agus fad-fhulangach. Bha eusaontas agus cùlsleamhnachadh an t-sluaigh ro-mhòr. Bha an dà bhràthair ionnan 'nan nàdur. Bhaist am ministear an leanabh. Is iomadh cinneach tha air aghaidh an domhain. Thug e ordugh daingean seachad dha gu bhi sìochail, ach dhi-chuimhnich e gach ni chaidh a ràdh ris. Chaidh gach ni a' roimh-orduchadh o shiorruidheachd. Tha Dia ag oibreachadh nan uile nithe a réir comhairle a thoile féin; cha'n urr-

ainn neach air bith a làmh a bhacadh, no a ràdh ris, Ciod a ta thu a' deanamh?

4. Tha cumhachd Dhé air fhoillseachadh gu soilleir ann an oibribh a' chruthachaidh agus an fhreasdail. Cha'n 'eil luchd-àiteachaidh nan talmhainnean teth comasach air fuachd nan dùthchanna tuathach fhulang. Bha a' mhad-uinn grianach agus am feasgar ciùin. Chruthaich Dia an duine a réir a choslais féin, ann an eòlas, am fireantachd, agus an naomhachd; agus thug e uachdaranachd dha os ceann uile oibre a làmh. Chaidh na firionnaich agus na boirionnaich a chuireadh chum na féisde. Feumaidh ar nàdur bhi air ath-nuadhachadh mu'm bi sinn air ar deanamh iomchuidh air son rioghachd nèimh. (Q.) *T.d.* 62.

5. Chaidh eunlaith nan speur, agus gach ni beò a ghluaiseas air an talamh chur fo smachd mhic an duine. Is iongantach oibre a' chruthachaidh; tha iad a' nochdadh gu bheil Iehobhah glic ann an gnìomh. Rinn an gealbhonn a nead an tulachainn an tighe. Cha toir mi cùig feorling dhuit air son do bhuannachd sa' ghnothuch so. Thoir misg an léigh do d' bhràthair bhi 'g òl fiona, no dìbhe làidir air bith eile. Is iomadh innleachd tha mac an duine a' dealbhadh. Tha beatha shubhailceach luachmhor, agus air an aobhar sin is còir do gach neach a' miannachadh. Lomnochd thàinig sinn do'n t-saoghal so, agus lomnochd pillidh sinn a ris. Rinn mi coimhcheangal ris.

6. Air tùs thugadh àithne do'n chinne-daoine iad a shiolachadh agus a bhi lionmhor. Tha truailidheachd nàduir an duine ro mhòr. Bha an gille so eas-umhal d'a phàrantaibh, agus air an aobhar sin bha fuath aig gach neach dha. Dhealbhadh an cinne-daoine ann an euceartaibh agus ann am peacaibh. Chuir an sluagh gadachd, fianuis-bhréige, agus toibheum as leth a' chis-mhaoir. Tha sinn buailteach do iomadh trioblaid sa' bheatha so, agus, as eugmhais fireantachd an t-Slànuighir, buailteach do phianntaibh ifrinn gu siorruidh. Tagh a' chuid a's fearr do na h-ubhlaibh, agus thoir do d' charaid iad. (R.) *T.d.* 64.

7. Tha am firean agus an t-aingidh teachd beò cuideachd san t-saoghal so, ach bithidh iad eadar-dhealaichte gu siorruidh san t-saoghal ri teachd. Bha an t-àrd shagart am measg nan Iudhach air a sgeudachadh le eudach riomhach, gach uair a bha e toirt suas ìobairt air son an t-sluaigh. An déigh 'aiseirigh o na marbh-aibh, chaidh Criosd suas do nèamh, agus tha e nis 'na eadar-mheadhonair air ar son aig deas làimh Dhé. Chuir e an gnìomh dreuchdan na h-oifig a ghabh e os làimh le mòr-chreideas da féin. Dean eadar-ghuidhe air mo shon, chum is gu'm faigh mi deadh-ghean a rìs ann an sùilibh an rìgh. Tha a chreuchdan air an slànuchadh.

8. Biodh ceannsal agad an còmhnuidh air do spiorad féin. Phaisg iad an leanabh ann

am brat-speilidh. Tha beatha an duine doilgheasach agus neo-chinnteach. 'Se a' mhucmhara an t-iasg a's mò a ta chòmhnuidh san fhairge. Feumaidh gach neach bhi iriosal 'na ghiulan leis am miann a bheatha a chaithe gu reusonta san t-saoghal so. Bha iad air an dlùth-cheangal ri chèile le bannaibh gràidh. Cha'n 'eil comh-chomunn aig dorchadas ri solus, ni mò tha comh-chomunn aig olc ri maith. Am bheil tiodhlacan agad do'n righ? Rinn e comh-oighre d'a mhic. Tha mòran do shochairan a' sruthadh o fhìreantachd, o uchdmhacachd, agus o naomhachd. (S.) *T.d.* 66.

9. Dhealraich a' ghrian air aghaidh na talmhainn. Dheasaich iad croicionn nan caorach, agus rinn iad brògan deth. B' éigin da a chionta aideachadh gu folleiseach. Sgrìobh Maois cùig leabhraichean d'an ainm Genesis, Ecsodus, Lebhiticus, Aireamh, agus Deuteronomi. Pillidh mi gu h-aithghear do m' dhùthaich féin, agus gairmidh mi mo thuiteirean gu cunntas. Sgrìobh Iosephus eachdraidh nan Iudhach, agus thug e seachad mìn-chunntas air gach ni a thachair dhoibh gus an t-àm an do sgrios Titus baile Ierusalem. Is iongantach an sgeul a chuala mi. Rinn na cinnich dealbhan snaidhte agus ìomhaighean gràbhailta, agus thug iad aoradh dhoibh.

10. Choimhlion do bhràthair a ghnothuch gu suilbhireach. Bha an duine ud eudmhor mu thimchioll giùlain ciataich. Tha àrd-uach-

daranachd aig Dia os ar ceann, agus tha sealbh-chòir aig annainn. Mhi-ghnàthaich sluagh na rìoghachd so gach deadh-chothrom, agus gach tiodhlac phrìseil a chaidh dheònachadh dhoibh. Tha a' chlann ri cluiche agus ri sùgradh. Ge b'e inbhe no dàimh sam bi thu, coimhlion gach dleasdanas tha mar fhiachaibh ort. Biomaid teo-chridheach r'a chéile le gràdh bràthaireil, agus thugamaid urram gach aon d'a chéile. Ioc cìs dhasan d'an dlighear cìs, agus eagal dhasan d'an dlighear eagal. (T.) *T.d.* 68.

11. Is còir do gach neach dichìoll laghail a dheanamh chum a bheatha féin agus beatha a choimhearsnaich a choimhead. Cha bhi an geocair agus am mi-stuama fad-shaoghalach. Eiridnidh gach duine glic a chlann le mòr-churam, agus altrumaidh e iad ann an oilein agus ann an teagasg an Tighearna. Dean ceartas do'n bhoichd agus do'n dilleachdain, agus teasairg an truaghan agus an t-ainnis o làimh an luchd-reubainn. Na biodh comh-chomunn agaibh ri oibribh neo-tharbhach an dorchadais. Tha comhradh amaideach agus baoth-shùgradh neo-iomchuidh do dhuine crionna. Feudaiddh duine gach meadhon laghail a ghnàthachadh chum maoin agus saoibhreas fhaotainn agus a mheudachadh dha féin.

12. An ti a leanas daoine diomhain, bithidh bochdainn gu leor aige. Is diomhain do dhuine ionmhasan fhaotainn le teangaidh bhreugaich. Seachainn comhluadar an ti a ni cùl-chàineadh

le 'theangaidh, agus a thogas droch sgeul air a choimhearsnach. Cha robh rùn ceart no seirceil 'na chom. Na biodh eagal ortsa 'nuair a ni na h-aingidh uaill is ràiteachas, oir cha mhair an uabhar ach ùine ro-ghoirid. Smachdaich gach togradh agus rùn ea-cneasda tha 'g éiridh suas a'd' chridhe. Cnuaisichidh an duine glic a shlighean. Ge b'e neach a bheachdaicheas gu dùrachdach air a shlighe féin bithidh e 'na bhuannachd dha. (U.) *T.d.* 69.

13. Thaisg an luchd-éisdeachd suas a bhriathra 'nan cridheachaibh. Bha thu dearmadach air do dhleasdanas. Shònraich Crìosd dà dheisciobul dheug chum an soisgeul a shearmonachadh. Chaidh an luchd-comanaich a cheasnachadh a thaobh an eòlais air a' chreidimh Chrìosduidh. Is còir dhuinn ar n-uile iarrtus a dheanamh aithnichte do Dhia le urnuigh agus asluchadh, maille ri breith-buidheachais. Tha riaghailtean sònraichte air son ar caithebeatha air an cur sìos anns na sgrioptuiribh. Thog e suas ballachan na caitheach, agus dhaingnich e a turaitean. Fhuair thu cuibhrionn chuimseach do nithibh maithe na beatha so. Guidheamaid 'nar n-urnuigh gu'n cumadh Dia sinn o pheacaibh dànadais, chum's nach bi àrd-cheannas aca oirnn.

14. Tha an òigh bruidheach. Thionail e na broileigean bhàrr nam preas. Bhriosg e suas gu h-eallamh. Am bheil an t-àilean air a chòmhdachadh le buidheagaibh? Rinn na

burrui mòr-chron air an fhochann. Cha'n 'eil ni air bith sa' bheatha so buan-mhaireannach. Dh' fhàs an calltuinn suas gu dìreach deas. Bha a h-eudach cho geal ris a' chanach. Bha am boirionnach ceanaile agus aoidheil. Is cearbach a chaidh thu mu'n cuairt do d' ghnòthuch. Bhiadh e na cearcan-frangach le h-eorna. Leum an clannhan-gobhlach air na h-coin, agus mharbh e dithis diubh. Thilg e clach bheag astar thri cheud slait le crann-tabhuill. Chuir an tuathanach cruaidh-chuing air a sheirbhisich. (V.) *T.d.* 72.

15. Tha ceann an leinibh cuachaineach. Am bheil am fearann deiseireach? An cluinn thu an dranndan a ta aig na seilleinibh? Chuir a dheanadas mòran doilichinn air a chairidibh. Na biodh faicheas ort, oir tionndaidh an ghnòthuch mach ni's fearr na tha thu am barail. Bha an cùman fionn-sgiathach. Ann am fionnuaireachd an fheasgair thàinig na féidh a mach as na coilltibh. Ràinig e garbh-chrìoch-an Alba. Bha an nigheanag gorm-shuileach. Bha na druidhean a' cleachdadh bhi sealltuinn air grealach nan ainmhidhean a bha iad ag ìobradh, chum's gu'm faiceadh iad ciod a bha gu tachairt an deigh-làimh. Streap an iath-shlait suas gu bàrr na craoibhe. Mharbh e dà liath-chearc leis an aon urchair.

16. Chunnaic na maraichean tein'-oidhche air aghaidh nan stuadh. Bha fiamh-ghàire an còmhnuidh air aghaidh do bhràthar. Bha

fuaim an t-sluaigh mar thoirm ceud sruth mòr o'n aonach. Chual mi sgreadan nan sgiath mu'n cuairt domh. Chòmhdaich còineach na clachan, air achd is nach b'urrainn duinn an sgrìobhadh a leughadh. Shoillsich e mach mar dhealradh na gréine. Am bheil an ceathach ag éirigh o'n t-sliabh? Thoir am fiodh do'n tuairneir agus ni e an soitheach. Trusalaich gu grad gach ni tha sinn gu thoirt leinn. Chuir an trom-lighe mòran miallachd air. Bha na coin a' tathunnaich ré na h-oidhche. Cò e am fear ud tha sràid-imeachd sa' ghàraidh. Bhruilich e an teine agus dh'éirich sradan suas. Dh'fhuin i a' mhin san sgàladh. (W.) *T.d.* 74.

17. Tha gruaidhean an leinibh ruiteach dearg. Sgrìobh an rùn-chléireach mionadain a' chomuinn. Am fac thu an reul-ghriglean? Chaidh an dealanach seachad am platha na sùla. Tha an loth peallagach agus bochd. 'Nuair thig an nollaig bheir e an tuarasdail d'a sheirbh-isich. Is neo-tharbhach an gnothuch a ghabh thu fo làimh. Tha an òigh moghar agus ciùin. Rinn a' chlann muc-shneachda mhòr, agus chuir iad car dì ris an leithead. Cha toigh leam a mhoiteileachd, agus a mhi-shuairceas. Dh'fhàs an liath-lus ro-thiugh san achadh. Chog na h-Albannaich ris na Lochlannaich, agus dh' fhuadaich iad as an dùthaich iad. Chaidh an duine truagh air iomroll air a' mhonadh. Bha an sluagh ro-iomlaideach 'nan nàdur. Dh' fhàs na clachan-crìche glas-liath.

18. Chunnaic mi àrd-riaghladair a' bhaile 'na shuidhe an caithir a' bhreitheanais. Sholair e innlinn do'n spreidh. Bha do mhac maidheanach anns gach cùis a bha 'n earbsa ris. Roimh-bharalaich do bhràthair ciod a thach-airleadh do'n fhear ud. Rinn an criadhadair slige chreadha, agus lìon e i làn uisge. Bha an sluagh air dhiobhail céille 'nuair a rinn iad an gnìomh ud. Chaidh a' bhana-mhorair seachad 'na carbad. Tha am bealach cumhann, agus an t-uchdach cas. Chuire oladh sa' chrùisgein agus shoillsich se e. Thuit e agus chaidh e bhàrr falman a' ghlùine. Rùnaich e an dùth-aich fhàgail do bhrìgh gu'n do thog iad droch sgeul air. Bha an duine so neo-stuama 'na ghiulan. Dhorchaidh an là agus chòmhdaich sgàile na lì-oidhche aghaidh na talmhainn. (X.) *T.d.* 77.

(P.) EACHDRAIDH IOSEIPH.

Tha eachdraidh Ioseiph 'na dearbhadh soil-leir air freasdal àraidh an Tighearna: agus tha i mar an ceudna a' nochdadh ciod an dòigh air an riaghail Dia corruich an duine, agus ciod an dòigh air an tionndaidh e trioblaidean na beatha so chum maith dhoibhsan a chuireas an dòchas ann. A thaobh Ioseiph, that e air inns-eadh dhuinn gu'n do ghràdhaich 'athair e,

agus gu'm bu docha leis e na a mhic uile, do bhrìgh gu'm b'e mac a shean aois e. Bha an gràdh so 'na aobhar trioblaid do Ioseph, oir thog e farmad dha am measg a bhràithrean, agus thug e orra gu'n do bhuin iad gu coimheach ris. Bha fuath aca dha do bhrìgh gu'n robh e cho prìseil aig 'athair; agus bhrosnuich e féin iad, agus dh'fhàg e iad ni bu mhi-run-aiche d'a thaobh, le e bhi 'g aithris nan aislingean a chunnaic e,—aislingean a bha ciallachadh gu'n tigeadh 'athair, agus a mhàthair, agus a bhràithrean fathasd gu iad féin a chromadh sios gu làr da.

Air uair àraidh chaidh mic Iacoib a dh'ionaltradh treud an athar gu Sechem; agus air dhoibh bhi ùine fhad air falbh, chuir Iacob Ioseph a dh'fhaicinn an robh iad gu maith. 'Nuair a chunnaic a bhràithrean e fada uatha, thubhairt iad r'a chéile, "Tha an t-aislingiche so a' teachd. Thigibh a nis ma ta agus marbhamaid e, agus tilgeamaid e ann an slochd éigin, agus their sinn, Chuir droch bhéisd éigin as da: agus chi sinn ciod gus an tig 'aislingean." Air do Ioseph teachd d'an ionnsuidh, rug iad air, agus bhuin iad a chota deth, agus thilg iad beò do shlochd e, a chionn nach leigeadh Reuben leo a mharbhadh. Aig an àm sin bha cuideachd do Ismaelich a' dol sìos le marsandachd do'n Eiphit; agus air do bhràithrean Ioseph am faicinn, tharruing iad nios as

an t-slochd e, agus reic iad e ris na h-Ismaelich air son fichead bonn airgid : agus ghiulain iadsan e mar thràill do'n Eiphit. An sin ghabh a bhràithrean an cota a bhuin iad do Ioseph, agus mharbh iad meann do na gabhraibh, agus thum iad an cota san fhuil. Agus chuir iad an cota dh'ionnsuidh an athar, agus thubhairt iad ris, “Fhuair sinne so; aithnich an e so cota do mhac, no nach e.” Dh'aithnich Iacob gu'm b'e an cota iomadh-dathach cota a mhic, agus thubhairt e, Chuir droch bhéisd as da; agus rinn e bròn air a shon mòran do làithibh.

Air do na h-Ismaelich Ioseph a thoirt sìos do'n Eiphit, reic iad an sin e ri Potiphar, oifigeach le Pharaoh. Ann an tigh Photiphair dh' éirich Ioseph gu bhi os ceann a sheirbhiseach uile, agus dh'fhàg a mhaighstir a thigh air a chùram, agus chuir e gach ni a bha aige fo a làimh. An déigh sin thog bean Photiphair droch sgeul air, agus le a cuilbheartan chaidh a dhreuchd thoirt uaith, agus e féin a thilgeadh am prìosan. Ach bha Dia maille ris 'na theanntachd, agus dh' orduich e 'na fhreasdal gu'm biodh an t-eas-urram agus an cruaidh-chas so fadheoidh chum mòr-bhuannachd dha. Aig ceann dà bhliadhna an déigh dha bhi air a thilgeadh am prìosan, chunnaic rìgh na h-Eiphit aisling a dli' fhàg a spiorad fo bhuair-eachadh : Agus air dha a dhrùidhean a chruinneachadh, dh'innis e an aisling doibh; ach cha b'urrainn iadsan a brìgh a mhìneachadh dha.

An sin dh'innis an t-àrd bhuidealair do Pharaoh mu thimchioll Ioseph, agus mar a mhìnich e a bhruadar da féin agus do'n àrd-fhuineadar, 'nuair a bha iad ceangailte maille ris sa' phrìosan. Sa' cheart uair sin chuir Pharaoh fios air Ioseph as a' phrìosan, agus dh'innis e dha na h-aislingean a chunnaic e. Agus dh' eadar-mhìnich Ioseph brìgh nan aislingean do'n rìgh, agus chomhairlich e dha ulluchadh a dheanamh fa chomhair nan nithe a bha gu tachairt, a chionn gu'n d' fhoillsich Dia dha ann am bruadar gu'm biodh seachd bliadhna pailteis, agus an déigh sin seachd bliadhna gorta, ann an tìr na h-Eiphit.

Le mìneachadh nan aislingean chunnaic Pharaoh gu'n robh spiorad Dhé an Ioseph, agus uime sin dh'àrdaich se e os ceann a thighe agus a rìoghachd, agus thug e cumhachd dha chum gach nì a riaghladh mar bu toil leis. An sin chaidh Ioseph a mach air feadh tìre na h-Eiphit, agus chruinnich e sìol ré nan seachd bliadhna pailteis mar ghaineamh na fairge, agus thaisg e suas e ann an tighibh-stòir. An déigh sin thàinig seachd bliadhna gorta air an talamh, agus do bhrìgh na goinne, bhrùchd mòr-shluagh do'n Eiphit a cheannach sìl o Ioseph. 'Nam measg so thàinig clann Iacoib a cheannach bìdh d'an teaghlaichibh; agus chunnaic Ioseph a bhràithrean, agus dh' aithnich e iad, ach cha d'aithnich iadsan esan. Air dhoibh teachd d'a ionnsuidh an dara uair rinn

se e féin aithnichte dhoibh; agus air dha fios a chur air 'athair agus air a theaghlach uile, shuidhich e iad am fearann Ghosein, agus bheathaich e iad le pailteas ré na gorta.

Tha freasdal Dhé ro-fhaicsinneach anns gach nì a thachair do Ioseph. Chuir esan a dhòchas an Dia, agus fhuair e saorsa uaith o gach gàbhadh agus cunnart san do thuit e. Dh' éirich e o bhi 'na thràill gu bhi 'na riaghlair air tìr na h-Eiphit, agus bha e air a shonrachadh gu bhi 'na mheadhon air 'athair agus a bhràithrean a ghleidheadh beò sa' ghorta.

(Q.) MU LETH-AINMIBH.

(*Co-chainnt eudar Seumas agus Tearlach.*)

Seumas. Innis dhomh ciod a bha thu a' leughadh, chum gu'm faic sinn ciod is còir dhuinn iunnsachadh uaith.

Tearlach. Bha mi a' leughadh anns an dara caibdeil do dhara Leabhar nan Rìgh, mu thimchioll na cloinne a rinn fanoid air an fhàidh Elisa, agus mar a thàinig dà mhath-ghamhain bhoirionn a mach as a' choille, agus mar a reub iad dà fhichead is a dhà dhiubh.

Seumas. Is sgeul iongantach sin; ciod do bharail deth? No am bheil thu tuigsinn gu soilleir ciod is brìgh da?

Tearlach. Is e mo bharail gu bheil e a' teagasg dhuinn gu'n robh a' chlann ro-aingidh, agus gu'n do nochd Dia a chorruich 'nan aghaidh 'nuair a cheadaich e do'n dà mhath-

ghamhuin àireamh co mòr dhiubh a reubadh nam bloighdibh.

Seumas. Ghabh thu beachd ceart air a' chùis sin. Am bheil cuimhne agad ciod a thubhairt a' chlann ris an fhàidh?

Tearlach. Tha;—ghlaodh iad ris, “Gabh suas, fhir mhaoil; gabh suas fhir mhaoil.”

Seumas. Ro cheart. Ach ciod an cron a bha ann ge do thubhairt iad so; oir bha e fìor, a réir cosmhuil, gun robh am Fàidh maol?

Tearlach. Tha mi am barail gu'n robh an giulan cronail, cha'n ann do bhrìgh gu'n d' thubhairt iad “Gabh suas, fhir mhaoil,” ach do bhrìgh gu'n robh iad ag ràdh so chum toibheum a thoirt do'n Fhàidh.

Seumas. Gu cinnteach. B'e am miann masladh a thoirt do'n duine naomh so, agus air an aobhar sin rinn iad fanoìd air, (ni a ta clann òg an còmhnuidh ro-dheas gu dheanamh,) a thaobh fàilinn nach b'urraìnn da a leasachadh. Ach chronuich Dia iad air son aingidheachd an giulain, agus rinn e eisempleir diubh chum clann òg a theagasg gu'n iad a thoirt toibheum do neach air bith le bhi 'g ainmeachadh gaoid no fàilinn a ta an déigh a nàduir.

Tearlach. Cha d'fhàinig e riamh a'm' aire a' bhuil so a dheanamh do'n chùis so. Ach tha mi ag aideachadh gu bheil sinn uile ro-dheas gus ar corruich a nochdadh an aghaidh an t-sluaigh sin a chuireas campar oirnn le bhi g' ràdh gu bheil iad maol, no crotach, no fìar-

shuileach ; no le bhi 'g ainmeachadh gaoid air bith eile a ta an déigh an nàduir. Tha mi nis a' tuigsinn, o na nithibh a labhair thu, gu bheil giulan mar so ro-pheacach, agus gur e dleasdanas gach aoin againn bhi ro fhurachar 'na aghaidh.

Seumas. Gun teagamh tha e ro-pheacach. Is ni faoin agus neo-thoinisgeach bhi toirt maslaidh do neach air bith air son gaoid nach urrainn da a leasachadh. Agus a thuille air sin, tha iadsan a ni magadh air duine do bhrìgh gu bheil e crotach no bacach, a' toirt maslaidh do Dhia a chruthaich e air a' mhodh sin. Nan seallamaid air a' chùis so le rùn ceart inntinn, chitheamaid gu bheil e 'na aobhar taingeileachd do gach aon againn nach d'fhàg Dia sinne bacach, no dall, no ciùrramach, cosmhuil ri mòran do ar co-chreutairibh, agus uime sin an àite bhi deanamh ball-magaidh do shluagh eile, bheireamaid buidheachas do Dhia a dhealbh sinn gu h-iomlan, agus a ghleidh sinn tèaruimte gu ruige so.

(R.) FULANGAS CHRIOSD.

'Se fulangas mo Shlànuighir

A ta mo dhàn a luaidh,

Mòr-irioslachd an àrd-Rìgh sin

'Na bhreith 's'na bhàs ro chruaidh.

'Se 'n t-iongantas bu mhiorbhuilich

Chaidh innseadh riamh do shluagh,

An Dia bha ann o shiorruidheachd
Bhi fàs 'na chiochran truagh.

Rugadh an stàbull ìosal e
Mar dhilleachdan gun treòir ;
Gun neach a dheanadh cairdeas ris
No bheireadh fardoch dha.

Mu'n gann bha fios gu'n d' thàinig e,
Do dhùisg dha naimhde mòr :
B'éigin teich do'n Eiphit leis,
Roimh Herod bh'air a thòir.

Bha tuill aig na sionnaichibh
Ga'm folachadh o theinn ;
Bha nid aig na h-eunlaith
An geugaibh àrd' nan crann ;

Ach esan a rinn uile iad,
'S gach ni sa' chruinne-ché,
Bha esan féin 'na fhògarach,
Gun chòmhnuidh aig fo'n ghréin.

Am feadh 'sa ghabh an Slànuighear
Mar ionad tàmh an saogh'l,
Bha e 'na léigh ro-fhabhorach
A leigheas chlann nan daoin' :

An eucail sin bu ghàbhaidh bh'ann,
'S gach galar cràiteach geur,
Do thionndaidh e chum slànuchadh
'Nuair labhradh e o 'bheul.

Thug teangadh do na balbhanaibh,
'S do 'n bhacach mhall a lùgh,

Do'n bhodhar thug e 'chlàistineachd,
'S do dhaoinibh dall an iùl.

Na lobhair bhreun do ghlanadh leis,
Cur fallaineachd 'nam feoil :
Gach eucail anama leighis e,
'S na mairbh do thug se beò.

Do shearmonaich an soisgeul leis.
Do dhaoinibh bochda truagh' ;
Is gheall e saorsa shiorruidh dhoibh
Bha 'n glais fo chis ro-chruaidh :

Nan gabhtadh ris an fhìrinn leo,
Le creidimh fhiorghlan beò,
'S gu'm biodh iad air an iompachadh
O ghnìomharaibh na feol'.

(S.) RIAGHAILTEAN AIR SON SLUAIGH ÒGA.

A mhic mo rùin, biodh eagal Dé ort a ghnàth, agus biodh do dhòchas annsan a mhàin; oir annsan tha sinn uile beò, agus uaith-san tha teachd gach tiodhlac mhaith agus iomlan tha deanamh ar beatha taitneach agus so-ìomchar. Naomhaich an Tighearna do Dhia ann ad chridhe, agus bi ullamh a ghnàth chum freagradh a thoirt do gach uile dhuine a dh'ìarras reuson an dòchais a ta annad. Cuimhnich mar an ceudna gu bheil an Tighearna maith, agus iochdmhor, agus pailt an trò-cair dhoibh-san uile a ghairmeas air, agus gur

e do dhleasdanas thu féin agus gach ní a bhuineas duit fhàgail an taice r'a fhreasdal.

Tha iadsan a ta beò gun urnuigh beò gun Dia agus gun dòchas san t-saoghal so: Uime sin lùb do ghlùn ann an urnuigh ri Dhia gach maduinn agus feasgar. Guidh air gu'n tugadh e dhuit a spiorad naomh a thogail do chridhe o nithibh talmhaidh chum nithe spioradail agus siorruidh; agus gu'n deònaicheadh e dhuit co-chomunn a bhi agad a ghnàth ris féin, agus r'a mhac Iosa Criosd. Thoir mar an ceudna buidheachas do Dhia an ainm an Tighearna Iosa Criosd air son gach sochair tha thu a' mealltuinn; a' cuimhneachadh a ghnàth gur i urnuigh a' chreidimh a ta taitneach 'na làthair.

A chionn nach 'eil là a' dol seachad anns nach feudar leat fhaicinn gu bheil “an duine triall d'a chòmhnuidh bhuan, agus gu bheil an luchd-cumaidh a' dol mu'n cuairt sna sràidibh,” iarr, tre ghràs Dé, t'aimsir a dheadhbhuileachadh mar chreutair bàsmhor. Agus do bhrìgh nach aithne dhuit c'uin no cionnus a ghairmeas mac an duine ort;—co aca is ann le bàs obann, no le euslaintibh cràiteach agus fadalach, bi a ghnàth air t'fhaicill agus a ghnàth ullamh. Iarr nach bi thu air do chumadh ris an t-saoghal so. Socraich t'aighe air na nithibh a ta shuas, agus biodh sùil agad ri tròcair an Tighearna Iosa Criosd chum na beatha maireannaich. Cuimhnich gu bheil e air ord-

uchadh do na h-uile bàs fhaotainn aon uair, agus an déigh a' bhàis gu'n feum iad bhi air an nochdadh an làthair caithir bhreitheanais Chrìosd, chum gu'm faigh gach neach na nithe a rinn e sa' choluinn, a réir an nì a rinn e, ma's maith no olc e.

(T.) MU FHEUMALACHD MI-SHOIRBHEIS.

Is maith an nì mi-shoirbheas agus trioblaid fhulang air uairibh; do bhrìgh gur tric leo an duine ghairmeadh air ais a dh'ionnsuidh a chridhe féin, agus a nochdadh dha nach 'eil e ach 'na fhear-turuis san t-sacghal so, agus uime sin nach buin da a dhòchas a shuidh-eachadh air nithibh talmhaidh. Is maith duinn gu'm fulangamaid ainneart air uairibh, agus gu'm biodh aig daoineibh barail olc no bheag dhinn, an uair tha sinn a' rùnachadh agus a' coimhlionadh nan nithe sin a ta ionmholta. Cuidichidh so sinn gu minic chum irioslachd inntinn, agus dìonaidh e sinn o ghlòir dhiomhain. Oir tha sinn air ar brosnuchadh gu dol a dh'ionnsuidh Dhé, ar fianuis o'n leth stigh, 'nuair a mheasar sinn o'n leth muigh le daoineibh air bheag luach, agus a chreideas iad gach droch nì gu breugach mu ar timchioll.

Uime sin bu chòir do dhuine e féin a dhaingneachadh ann an Dia air an dòigh sin, chum as nach bitheadh feum aig uair air bith air comhfhurtachd o dhaoineibh. 'Nuair tha duine fo thrioblaid, no air a ghiulan chum an uile le 'chridhe cealgach, an sin tuigidh e cia

mòr am feum a ta aige air Dia chum 'aighe truailidh a smachdachadh, agus a chridhe cealgach a naomhachadh; tuigidh e cia mòr am feum a ta aige air an Spiorad naomh chum a ghiulan air aghaidh o cheum gu ceum, agus o ghràs gu gràs; agus tuigidh e nach 'eil ach diomhanas am beartas, agus cràdh agus doilgh-eas spioraid ann an nithibh talmhaidh. An sin bithidh e sgìth do'n t-saoghal so; agus miannaichidh e am bàs chum gu'm bi e air fhuasgladh o eallaich na beatha, agus gu'm faigh e bhi maille ri Crìosd. An sin mothaichidh e nach 'eil dìon iomlan, agus làn-shìochaint r'am faotainn sa' bheatha so, agus iarraidh e gu dùrachdach sealbh fhaghail air an ionad sin far nach truail an reudan agus nach cladh-aich am meirleach a chaoidh.

(U.) MU MHIODAL.

Bha aon do uachdaranaibh Shasunn, do'm b'ainm Canute, 'na rìgh àrd agus cumhachdach. Le a ghiulan glic agus seòlta dh' fhàs e mòr ann an cliù agus am beartas; thug e buaidh air a naimhdibh gu h-iomlan; agus dhaingnich e a rìgh-chaithir le laghanaibh cothromach a thoirt d'a iochdaranaibh, agus le ceartas a dheanamh eadar duine agus duine. Thachair e gu'n robh uaislean an rìgh so ro-mhiodalach ris. Bha iad ga àrdachadh ann an inbhe os ceann gach creutair cruthaichte, agus 'nan am-aideachd bha iad ag ràdh gu'm buineadh an

talamh agus an fhairge dha, agus gu'n robh gach ni sa' chruinne-ché gu h-iomlan f'a cheannsal.

Mhi-thaitinn am miodal so ris an righ ; agus chum achmhasan a thoirt doibh, dh'orduich e a righ-chaithir a shuidheachadh air traigh na fairge 'nuair a bha an làn-mara air traoghadh. An sin chaidh e dh'ionnsuidh na traighe, agus air dha suidh sìos 'na chaithir rioghail, agus a dhaoine mòra uile 'nan seasamh mu'n cuairt da, thubhairt e ris an fhairge. “ Cuimhnich, O chuain ! gu bheil cumhachd agam-sa os do cheann, agus gu'm feum thu bhi umhal do gach focal a labhras mi. Tha mi 'g ràdh riut na tig nì's faide agus na fliuch cosan do mhaighstir.” An déigh dha so a ràdh thòisich an làn mara ri teachd a mach a lion beagan is beagan ; bhual na tonnan gu làidir agus gu buaireasach air an righ-chaithir, agus b' éigin do'n righ teicheadh as an rathad, chum's nach sluigeadh na h-uisgeachan suas e. An sin thionndaidh e r'a uaislibh agus thubhairt e riu, “ Tha sibh a' faicinn nach 'eil a' mhuir umhal do m' ghuth, agus nach 'eil tuille suim aice dhìom na bhiodh aice do'n duine a's truaighe agus a's aimbeartaiche e ta chòmhnuidh a'm' rìoghachd. Cuimhnichibh á so suas gur esan a mhàin a ta airidh air cliu agus urram a chaisgeas tonnan uaibhreach na fairge, agus a their rithe le cumhachd, “ an fhad so thig thu, agus na tig nì's faide.”

Tha an duine miodalach an còmhnuidh 'na

dhuine cealgach. Dealbhaidh e aimhleas 'na chridhe do bhrìgh nach 'eil suim aig do fhìrinn no do cheartas; agus bheir e air a theangaidh snas a chur air gach nì tha e a' coimhlionadh chum's gu'n dall e sùilean an t-saoghail so, agus gu'm faigh e cliu agus urram o dhaoineibh. Labhraidh e ris an neach a's mò agus a's cumhachdaiche na e féin le briathraibh miodalach chum's gu'n dean e buannachd dheth. Gun churam air bith aig do staid a chridhe giulainidh se e féin gu faicilleach am fianuis dhaoine; agus cosmhuil ris an Phairiseach chealgach, glanaidh e an taobh am muigh, 'nuair tha an taobh a stigh dheth làn do reubainn agus do aingidheachd. Uime sin ma tha mhiann oirnn gu'm bi Dia air ar crann, feumaidh sinn teangadh mhiodalach a sheachnadh, agus an fhìrinn a labhairt anns gach cùis, agus ris gach neach. Tha e an còmhnuidh mar fhiachaibh oirnn a thoirt fa'near nach ann a réir barail dhaoine a théid breth a thoirt oirnn, no a réir meas ar co-chreutaire a bhios ar gnìomhara air an cothromachadh. Tha ar cridhe rùisgte an làthair Dhé. Is léir dha gach smuain do'm bheir sinn toirt caidreamh. Sgrudaidh e airnean ar cridheacha, agus bheir e breth oirnn agus luigheachd dhuinn a réir ar toillteanais.

Air an aobhar sin na tugamaid mòr-aire do bharail sluaigh eile mu ar timchioll; ach rannsaicheamaid ar cridheacha féin le mòr-churam; cothromaicheamaid ar gnìomhara a réir lagha

fhiorghloin Iehobhah ; thugamaid fa'near gu bheil sinn ag iarraidh bhi foirfe agus coimhlionta 'nar giulan ; agus 'nar n-urnuigh ri Dia abradh gach aon againn gu dùrachdach, “ Rannsaich mi, a Dhé, agus aithnich mo chridhe ; dearbh mi agus tuig mo smuainte. Agus amhaire am bheil slighe olc air bith ann-am, agus treòraich mi anns an t-slighe shiorruidh.” Gluaiseamaid air an dòigh so, agus an sin saoraidh Dia sinn o chridhe cealgach, agus o theangaidh mhiodalaich ; stiùraidh e sinn san t-slighe san còir dhuinn imeachd, agus bheir e fadheoidh sinn a dh'ionnsuidh rìoghachd na glòire.

(V.) URNUIGH.

O Thighearn is a Dhia na glòir',
 An t-àrd rìgh mòr os ceann gach sluaigh,
 Cia dana nì air t'ainm ro-mhòr
 Le bilibh neoghlan bhi a' luaidh !
 Na h-aingle 's àirde rinneadh leat,
 Cia lag an neart ! 's cia dall an iùl !
 Cia aineolach air t'oibribh mòr !
 'S cia goirid air do ghlòir an cliu !
 Am beachd do shùile fìorghloin féin,
 Cha'n 'eil na reulta 's àirde glan :
 'S cha'n 'eil na h-aingle 's naomha 'n glòir,
 An làthair do mhòrachd-sa gun smal.
 Ach, O an dean thu d'isleach' féin,
 A dh' éisdeachd enuimheag anns an ùir !

Fuidh stòl do chos a' gabhail tàimh,
'S nach faic ach sgàile bheag do d' ghnùis.

Na lasadh t'fhearg, O Dhé nan dùl,
Am feadh ni mise urnuigh riut :
Mo pheacadh aidicheam a'd' làth'r,
'S an trsaill'eachd ghràineil san do thuit.
Mo chiont' tha mar na sléibhtibh mòr' ;
Is leòn iad mi le h-iomadh lot :
Ta m'anam bochd le'n cudthrom brùit
'S o m' shùilibh fàsg nan deura goirt.

Ged fhàs na nèamha dubh le gruaim,
'S mo bhual le tairneanach do neart ;
Ged thilg thu mi gu ifrinn shìos,
Gu siorruidh aidicheam do cheart.
Gidheadh am feud an lasair threun
A sgoilteas as a chéil' an tuil,
Drùghadh orm tre umhlachd Chrìosd,
'S mi gabhail dìon a steach fuidh 'fhuil ?

An fhuil a dhìol do cheartas teann,
'Sa dhòirteadh air a' chrann gu làr,
'S ann aisd' tha m' earbsa, O mo rìgh !
Nach dìt thu m'anam air a sgàth.
Dean m'ionnlad glan, O Dhia na sìth' !
San tobar iocshlaint bhruchd á thaobh ;
A bheir dhomh beatha o an bhàs,
'S o m' thràilleileachd a ni mi saor.

Daingnich mo chreidimh ann a bhàs,
Is beothaich gràdh a'm' chridhe stigh,

Is neartaich mi chum ùmhlachd dha,
An uile àitheantaibh naomh a lagh.

O dean mo phlanndach ann an Criosd,
'S mo chrionach brisidh mach le blàth;
Is bidh gach subhaile 's naomha gleus,
Mar mheas a' lùb mo gheug gu làr.

MU DHAOINIBH ALMHARRA.

A mhic mo rùin, chaidh do chuir a dh'ionnsuidh na sgoile chum gu'm faigheadh tu eòlas agus fòghlum, agus gu'm biodh tu air t'àrdachadh chum na h-inbhe sin a dh'orduich Dia fa chomhair a chreutaire reusonta. O eòlas tha sruthadh cuid do na beannachdaibh a's àirde agus a's prìseile a chaidh dheònachadh dhuit. 'Se eòlas tha 'g àrdachadh an duine os ceann bheathaiche na macharach, agus a tha deanamh an t-eadar-dhealachadh mòr a ta ri fhaicinn eadar daoine foghlumte agus daoine almharras agus aineolach. Uime sin chum's gu'n tuig thu luach nan sochairean prìseil tha thu a' sealbhachadh, agus gu'm bi thu taingeil dhoibhsan tha toirt cothrom dhuit foghlum fhaghail, beachdaich car aon mhionaid air staid luchd-àiteachaidh nan dùthchanna sin far am bheil duibhre aineolais a' gabhail còmhnuidh.

Ged tha e 'na nì iongantach r'a aithris, tha mìltean do chreutaire cho aineolach is nach do dhealbh iad innleachd nì's fearr air son àite-còmhnuidh dhoibh féin, na uamha na carraig, no toll fo'n talamh. Tha cuid do shluagh r'a

fhaotainn a shìneas iad féin air an àilean ghorm 'nuair thig an oidhche orra, agus a choidleas an sin gun chòmhachadh o'n fhuachd, agus gun dhion o bheathaichibh allta. Tha cuid do shluagh a' teachd beò gun chòmhachadh air bith air an corp, agus cuid eile a' ceangal craicionn aoin do na beathaichibh a mharbh iad mu'n cuairt d'am meadhon no d'am muineal; agus air an dòigh so a' ruith fiadhaich anns na coilltibh.

Cha'n 'eil na daoine fiadhaich so ro-mhodhail mu thimchioll an itheannaich, no ro-chùramach chum lòn a sholair fa chomhair an droch là. Tha iad am bitheanta a' teachd beò air luibhibh na macharach agus air meas fiadhaich, —air iasg a ta iad a' glacadh sna sruthannaibh uisge, agus air sithionn a ta iad a' marbhadh sna coilltibh agus sna monaidhibh timchioll orra. Air feadh an t-samhraidh glacaidh iad pailteas a shàsachadh uireasbhuidh an nàduir, ach air feadh a' gheamhraidh tha iad gu minic a' bàsachadh le gorta. Ann an cuid do dhùthchannaibh cha'n 'eil iad a' dragh ri'm biadh a dheasachadh le teine, ach ithidh iad an fheoil agus an t-iasg amh. Cho luath 'sa mharbhas iad beathach air bith, grad-shùgaidh iad an fhuil as, agus òlaidh iad i. Ithidh iad luchaidh, radain, agus beathaichean gràineil eile; agus air uairibh marbhaidh iad na priosanaich a ghlac iad an cogadh, agus thig iad beò orra.

Tha an diadhachd, am modhanna, agus an

caithe-beatha ro bhrùideil agus aineolach. Air dhoibh bhi gun eòlas air an Dia bheò, tha iad ag aoradh do'n ghréin, agus do'n ghealaich,— do stocaibh agus do chlachaibh na macharach ; agus tha an aoradh agus an urnuighean ag éirigh cha'n ann o ghràdh, ach o eagal agus o bhall-chrith roimh na h-ìodholaibh do'm bheil iad a' strìochdadh. 'Nuair thig gorta no plàigh 'nam measg, tha iad am barail gu bheil an diathan an corruich riu, agus chum na corruich so philltinn air falbh ìobraidh iad air uairibh eadhon am mic agus an nigheana air an altair-ibh fuileachdach. Anns na talmhannaibh shìos tha ìodhola mòra aca a ta iad a' giùlan air carbadaibh, agus chum meas agus urram a thoirt doibh, tilgidh cuid do na creutairibh truagha tha 'g aoradh dhoibh iad féin sìos fo rothaibh nan carbad gus am bruthar gu bàs iad. Loisgidh mnathan iad féin gu minic air cruach-adhlacaidh an daoine. Cuiridh pàrantan an naoidheana òga gu bàs ma dhiultas iad a' chioch a dheothail, no ma their an druidhean agus an luchd-fiosachd riu gu'n d'rugadh iad air là mi-shealbhar. Agus air an làimh eile cuiridh clann am pàrantan gu bàs 'nuair tha iad a' teachd gu bhi breòite, aumhunn, agus eu-comasach air iad féin eiridinn.

A mhic mo rùin, 'nuair a smuainicheas tu air staid nan creutaire diblidh agus aineolach so, smuainich mar an ceudna air na nithibh mòra a rinn Dia air do shonsa ann an cuibhrionn nì's

fearr a thabhairt duit; agus cuir an céill le gràdh agus taingeileachd spioraid feartan cumhachdach an Ti sin a ghairm á dorchadas thu chum a sholuis iongantaich féin. Thoir cliu agus moladh dha a chionn nach d'orduich e do chrannchur dhuit ann an ionadaibh dorchana talmhainn; agus nach d' fhàg e thu a'd' chreich do aineolas, do fhòirneirt, agus do na seòlannaibh gràineil sin tha deanamh an duine nì's isle, agus nì's brùideile na beathaiche na macharach. Coimeas do bheatha féin ri beathia nan daoine aineolach a ta gun Dia agus gun dòchas, agus foghlumbhithaingeil. Thoir buidheachas *Dhasan* a dh'fhàg mòran do'n t-saoghal ann an duibhre an dorchadais, ach a thug air Grian na fireantachd soillseachadh ortsa, agus a thug air dol mach na maidne agus an fheasgair gairdeachas a dheanamh os do cheann. Agus ann ad urnuigh ri Dia moch agus anmoch, guidh gu'm fuadaicheadh e air falbh aineolas nan cinneach a ta fathasd ann an sgàile a' bhàis, gu'n craobh-sgaoileadh e eòlas Chrìosd air feadh gach earrann do'n domhain, agus gu'n tugadh e gach creutair cruthaichte o éirigh gu ruig luidhe na gréine, chum eòlas a ghabhail air féin, agus air an Tighearn Iosa Crìosd.

(X.) TURUS GHAIRBH AGUS DHUAIL.

Dh'imich Garbh mac Stairn agus Dual a dh' fhaicinn Fhinn agus a threun fheara colg-

ach, iomraiteach ann an gnìomharaibh arm. Bha Fionn san àm sin 'na thigheadas samhraidh am Buchanti. 'Nan turus d'a ionnsuidh; ghabh iad beachd air gach gleann agus faoin mhonadh, air gach allt agus caol choirean. Ghabh iad sgeul do gach coisiche agus gach fear a thachair 'nan còir. Ann an gleann nan cuach agus nan lon, chunnaic iad bùth taobh sruthain; chaidh iad a steach; dh'iarr iad deoch. Dh' éirich ribhinn a b' àluinn snuadh a dh' fhàilteachadh an turuis le sìth. Thug i biadh dhoibh r'a itheadh, dibhe r'a òl; agus dh'iarr i an sgeul le cainnt thlà. Bhual gaol o a sùil an Garbh borb, agus dh' innis e cia as doibh. “Thàinig sinn o thìr nan crann, far an lionmhor sonn;—mac rìgh Lochlainn mise—m'ainm Garbh, nam b'àill leat;—esan Dual, o thìr nam beann, a thuinich an Albainn o thuath;—a ghabhail cairdeis gun sgàth agus aoidheachd o'n àrd-rìgh Fionn; sud fàth ar turuis, a chiabh na maise;—ciod am bealach am buail sinn? Seòl ar cos gu teach F'hinn, bi dhuinn mar iùl, is gabh duais.”

“Duais cha do ghabh mi riamh,” ars' an nighean bu bhlàithe sùil 's bu deirge gruaidh; “cha b'e sud àbhaist Theadhaich nam beann éilde, 'gam bu lionmhor dàimheach 'na thalla—'gam bu tric tathaich o thuath;—ni mise dhuibh iùl.”

Gu gleann-sìth tharladh na fir; gleann an tric guth féidh is loin; gleann nan glas charn

is nan scor ; gleann nan sruth ri uisge 's gaoith. Thachair orra buaghar bhò, is rinn dhoibh iùl ; thug dhoibh sgeul air dùthaich nan creag, air fir agus air mnaibh, air fàs shliabh agus charn, air neart feachd, air rian nan arm, air miann slòigh, agus air craobh-thuinnidh nam Fiann.

AN TREAS EARRANN.

AN TUATHANACH AGUS AM MADADH.

Chaidh tuathanach air là àraidh a mach do'n achadh a charadh bearn ann am balla ; agus air dha philltinn fhuair e a' chreadhal san d' fhàg e a leanabh 'na chodal air a tilgeadh bun os ceann, an t-eudach a bha mu'n cuairt da reubtadh agus dearg le fuil, agus am madadh a bha gleidheadh an tighe 'na luidhe làimh ris a' chreadhal agus a cheann còmhdaichte le fuil mar an ceudna. Smuainich an tuathanach gu'n do mharbh an madadh an leanabh, agus 'na corruich thog e tuatha a bha 'na làimh agus chuir e an t-eanchainn as. Ach air dha a' chreadhal a thionndadh fhuair e an leanabh slàn beò, agus nathair mhòr 'na luidhe air an urlar, a mharbh am madadh 'nuair thug i ordhearp air streapadh ris a' chreadhal. Chunnaic an tuathanach a nis amaideachd a

dheanadais: thug e fa'near gu'n do theasairg am madadh dileas agus tairis beatha an leinibh, agus gu'm b'e a dhleasdanas bhi ro thaingeil da, an àit a chur gu bàs ann an corruich agus ann am fraoch feirge.

Tha an sgeul so a' teagasg dhuinn gu bheil esan a ta toirt sréin d'a chorruch an còmh-nuidh buailteach do mhearachd, agus gu bheil e ealamh air an ni sin a dheanamh a chuir-eas campar air an déigh làimh.

AN TUATHANACH AGUS AM FEAR-LAGHA.

Thàinig tuathanach a dh'ionnsuidh fear-lagha àraidh bu choimhearsnach da, ag aithris gu'n robh e ro-dhoilich air son sgiorradh a dh' éirich do aon d'a spreidh. Chaidh damh leatsa, thubhairt an tuathanach, a mharbhadh le droch tharbh a bhuineas dhomhsa, agus b' àill leam fios fhaotainn ciod a dhìolas mi dhuit air a shon. Tha thu do dhuine còir agus cothromach, thubhairt am fear-lagha, agus air an aobhar sin tha mi am barail nach meas thu e 'na ni cruaidh aon do d' dhaimh féin a thoirt domh 'na àite. Tha sin ro-cheart, ars' an tuathanach; ach ciod a thubhairt mi? Chaidh mi gu tur mearachd, oir is e tarbh leatsa a mharbh damh leamsa, agus uime sin tha mi am barail a réir do bhreith féin gu'n toir thu dhomh damh eile 'na àite. Tha sin ag athar-rachadh na cùise, thubhairt am fear-lagha; feumaidh mi fiosrachadh mu thimchioll a'

ghnothuich so, agus ma thachair.—Agus *ma thachair*, thubhairt an tuathanach; tha mi faicinn gu'm biodh an gnothuch air a chur gu taice gun agadh air bith nam biodh tusa cho deas gu ceartas a dheanamh do shluagh eile is a ta thu gu ceartas a dheanamh dhuit féin.

AN TUATHANACH AGUS A MHIC.

'Nuair a chunnaic seann tuathanach beartach gu'n robh a shlàinte air fàilinn, agus e féin a' dlùthachadh ri 'chrìch dheireannaich, ghairm e a chuid mac gu taobh a leapach. Mo chlann ghràdhach, thubhairt an duine euslaint riu, tha mise nis fagus do'n bhàs, agus is e mo chomhairle dheireannach dhuibh gun sibh a dhealachadh ris an fhearann so a bha aig ar teaghlach o cheann sè fichead bliadhna air ais: oir, gu ni diomhair, a chuala mi o m' athair, fhoillseachadh dhuibh, tha ionmhas air fholach ann an ionad éigin do'n fhearann, ged nach d' fhuair mise riamh a mach ciod an t-àite dheth. Co luath 'sa ghiulainear an t-arbhar bhàrr an achaidh, na caomhnaibh saothair air bith 'ga iarraidh, oir tha fios cinnteach agam nach bi 'ur saothair an diomhain.

Cha bu luaithe a chaidh an seann duine a thasgaidh san uaigh, agus a thàinig an t-àm a dh'ainmich e na thòisich a mhic air an talamh a ruamhar. Thionndaidh iad gach troidh do'n achadh le mòr-churam; agus ged nach d' fhuair iad an t-ionmhas a bha iad ag iarraidh

gidheadh thug am fearann a mach mòran tuille toraidh na thug fearann an coimhearsnaich. Aig ceann na bliadhna 'nuair bha iad a' cunntadh am buannachd mhòr, thubhairt aon diubh bu gheire na càch, Cuiridh mi geall gur e so an t-ionmhas a bha ar n-athair a' ciallachadh. Tha aon ni cinnteach, agus mhothaich sinn e 'nar fiosrachadh féin, gu bheil saothair 'na ionmhas agus 'na bhuannachd, agus gu'n dean làmh nan dìchiollach an còmhnuidh beartach.

AN T-EACH.

Tha an t-each an dà chuid 'na ainmhidh maiseach agus 'na sheirbhiseach feumail do'n duine. San dùthaich so tha na h-eich soirbh agus tigheil, ach ann an dùthchaibh eile tha iad fàs fiadhaich agus a' falbh cuideachd 'nan iomanaibh mòra. Chithear air uairibh ceithir no cùig ceud diubh ag ionaltradh san aon achadh. Tha iad ro-sgàthach mu thimchioll an duine, agus air an aobhar sin, 'nuair théid iad a dh' ionaltradh, cuiridh iad aon do an àireamh air freiceadan, chum 's nach leig e le neach air bith teachd an an-fhios an còir doibh. Ma chi am freiceadan duine air bith teachd am fagus do'n treud, théid e gu dàna 'na chomhdail, agus gabhaidh e beachd air. Ma philleas an duine air slighe eile tha gach ni ceart; ach ma dhlùthaicheas e ris an treud, bheir am freiceadan caismeachd dhoibh le

'shrannraich, agus an sin togaidh iad orra agus falbhaidh iad 'nan cruaidh-ruith as an rathad.

Ged tha na h-eich so luath agus fiadhaich, tha mòran diubh air an glacadh le innleachd an duine. Tha seòl aig air lub-rithe a thilgeadh m'am muineal, agus m'an cosaibh, agus air an dòigh so tha e gan ribeadh agus a' deanamh greim orra. 'Nuair théid aon diubh a ribeadh ceanglar e ri craoibh no ri post làidir air bith, agus fàgar an sin e car dà là gun bhiadh gun deoch. Aig ceann na h-aimsir sin tha e fàs fann agus so-riaghladh, agus an sin tha e air fhuasgladh o'n chraoibh,—air a thoirt dachaidh dh' ionnsuidh pàilliuin an neach a ghlac e, agus le caoimhneas agus deadh eiridinn tha e ann an ùine ghoirid a' fàs cho soirbh ris na h-eich a ta againn san dhùthaich so.

Ann am fàsach Arabia gheibhear na h-eich a's maisiche agus a's grinn a ta san saoghal. Tha iad cho luath agus cho eòlach is nach 'eil e furasd greim a dheanamh orra. 'Nuair théid an t-Arabach g'an sealgadh cuiridh e inneal-glacaidh am folach sa' ghaineamh, agus bheir e oidhearp air an ruagadh a dh' ionnsuidh an àite a shonraich e air an son. Ma théid aon diubh an sàs san inneal-glacaidh an sin thig an sealgair gu dlùth 'na dhàil chum a mharbhadh, (oir tha na h-eich so air dhoibh bhi òg air am meas 'nan deadh bhiadh,) no chum a ghleidheadh gu marcachd agus gus gach obair eile a ta air a chur fa chomhair. Cha'n 'eil an

t-Arabach a's aimbeartaiche as eugmhais aon do na h-eich so. Cha bhuail se e ach ro ainmig. Labhraidh e gu caomhneil ris, agus gabhaidh e mòr-churam deth amhuil a dheanadh e d'a charaid. Air an dòigh so tha an t-each a' fàs suas mar aon do'n teaghlach, agus tha e mu dheireadh cho soirbh is gu'n cluich a' chlann m'a mhuineal agus mu'n cuairt da, mar a dheanadh iad mu'n cuairt do mhadadh.

Do'n fhear-fearainn tha an t-each 'na ainmhidh ro-fheumail. 'S ann leis tha e ag àr an talmhainn, agus a' deanamh gach ni a bhuineas do thuathanachas; agus as eugmhais cha b' urrainn e leth na h-oibre ata an taice ris a choimhlionadh. Tha an t-each ro-ìomchuidh gu marcachd: siubhlaidh e ro-luath, agus giulainidh e eallach mhòr astar fad mu'm bi e air a sgìtheachadh. Tha e mar an ceudna 'na ainmhidh glic agus so-theagasg; ma bhitheas a shealbhadair caomhneil ris, bithidh toil aig dha, agus ni e gach ni a's urrainn da air a shon. A thuilleadh air obair tuathanachais tha an t-each air iunnsachadh gu cogadh, agus tha e féin agus a mharcach air uairibh a' deanamh mòr-sgathadh sa' chomhraig,—gu h-àraidh 'nuair a bhriseas iad sìos sreathan an naimhdean agus a chuireas iad an ruaig orra.

Ann an leabhar Iob tha e air a ràdh mu thimchioll an eich-chogaidh, “An d' thug thusa a neart da? an d' eudaich thu a mhuineal le tairneanaich? An dean thu gealtach e

mar an leumnach-uaine? is uamhasach glòir a chuinneine. Bùraichidh e le 'chois anns a' ghleann, agus nì e gairdeachas 'na neart : théid e air aghaidh an coinneamh an airm. Nì e magadh air eagal, agus cha bhi uamhunn air, agus cha phill e air ais o fhaobhar a' chlaidheimh. Nì am balg-saighead torman 'na aghaidh, an t-sleagh loinreach agus an gath. Le gairge agus feirg cladhaichidh e an talamh; agus cha chreid e gur i fuaim na trompaid a ta ann. Am meadhon fuaim na trompaid their e, Ha, ha ! agus fad as gabhaidh e fàile a' chatha, tairneanaich nan ceannard agus na h-iolaich."

AN LEOMHAN.

Tha an leòmhan treun agus cumhachdach os ceann gach beathach eile, ionnus gu'm feudar a ràdh gur rìgh e san dìthreabh. Siubhlaidh e gu h-uaibhreach troimh gach tiugh-choill agus feadh gach àrd-mhonadh, saor o cheannsal agus o eagal. 'Nuair a bheuchdas e, agus a cho'-fhreagras mac-talla nan creag, tha an toirm mòr agus uamhasach mar thoirm tairneanaich; agus 'nuair a chluinneas beathaiche eile nan coill i, teichidh iad roimh le h-eagal agus le ballchrith. Tha cumadh an leòmhain ro-dheas, a' nochdadh a spionnadh agus a luathas; agus tha an dà chuid misneach agus mòralachd r'am faicinn 'na ghnùis. Tha 'aghaidh leathan agus a shealladh uaibhreach :—tha a shùilean dearg,

agus 'nuair a chuirear fearg air, lasaidh iad cosmhuil ri teine; tha a dhath ciar-bhuidhe, agus am bitheanta tha e ochd troidhean air fad agus ceithir troidhean air àirde.

Cha'n 'eil sealladh an leòmhain maith san là, agus air an aobhar sin 'se a' mhaduinn, no am feasgar, no druim na h-oidhche is docha leis gu dol an tòir air creich. 'Nuair thig e dlùth d'a chobhartaich, grad-leumaidh e oirre, agus reubaidh e i 'na bloighdibh le 'fhiaclaibh. Am bitheanta roghnaichidh e 'àite-tuinnidh dlùth do shruth uisge, no aig bruaich aimhne, far am bi comas aige teachd gun fhios air na fiadh-bheathaichibh a bhios tathaich an sin chum an ìota a chasgadh.

Tha'n leòmhan àrd-inntineach agus uaibhreach 'na ghné; dìleas agus caoimhneil mur cuirear corruich air, no mur bi e air a theannadh le ocras. Air dha earbsa bhi aige á threise féin, amhaircidh e le tàir air a naimhdibh gu h-iomlan. Gidheadh ni an Tiger comhrag ris, agus air uairibh feudaidh e tachairt gu'm buadhach e air, gu h-àraidh ma bhitheas an leòmhan òg no fann. Is iad na h-ionada is teoithe do Asia agus do Africa àite-comhnuidh an leòmhain. Ann an Africa tha e fàs ro-mhòr agus ro-gharg. Siubhlaidh e am fàsach mar ghaisgeach misneachail, agus 'nuair a bheucas e, bheir e air an talamh crith, agus teichidh gach beathach o a làthair.

A' MHUC-MHARA.

Cha'n 'eil cunntas cinnteach againn air beathach air bith a's mò agus a's treise na a' mhuc-mhara. Anns na cuantaibh tuathach tha i a' fàs co mòr is gu'n tomhais i trì fichead troidh 'sa deich air fad 'nuair tha i teachd gu a làn-meudachd, agus fichead troidh air leud. Tha cnàimh a peircill ro mhòr, an cumantas o chùig troidhean deug gu fichead troidh air fad, agus o dhà gu trì troidhean mu'n cuairt. 'S ann 'na h-earball tha a spionnadh a' seasamh; agus tha an spionnadh so cho mòr is gu'n cuir i bata no eathar eile 'na sgealbaibh le h-aon bhuille dheth.

Is iongantach an sealladh bhi 'g amharc air na h-iasgairibh a' glacadh na muice-mara. 'Nuair a ruigeas iad an t-àite sin far am bheil dùil aca gu 'm bi an t-iasg so lionmhor, ceanglaidh iad an loingeas ri h-aon do na mill mhòr eighe a ta an còmhnuidh sna fairgibh tuathach, no tilgidh iad mach an acraichean ma tha-chaireas iad air grunn gainmheachaidh agus rèidh. Cuiridh iad an sin an innil-glacaidh an ordugh, agus théid iad a mach anns na bàtaichibh beaga air freiceadan a dh' fheuchainn ciod a chi iad. Tha sè bàtaichean an lorg gach loingeis a ta air a gnàthachadh sa' ghnòthuch so, agus fa chomhair gach bàta tha sè maraichean chum iomraimh, agus aon fhear-bualaidh aig am bheil sleagh gheur agus fhriolasgach 'na làimh. Ris an t-sleagh so tha cord fada air

a cheangal, agus tha an cord so air fhilleadh le mòr-churam aig deireadh a' bhàta, chum's 'nuair théid an t-sleagh a shathadh san iasg, agus a theicheas e air falbh leatha, gu'n ruith an cord gun phrabadh a mach 'na dhéigh.

'Tha cuid do na h-iasgairibh an còmh-nuidh air freiceadan anns na bàtaichibh, astar beag air falbh o'n loingeas; 'nuair chi iad muc-mhara théid iad gu grad an tòir oirre, agus ma's urrainn doibh sàthaidh iad an t-sleagh 'na cliathaich mu'n téid i fodha. Co luath 'sa mhothaicheas a' mhuc-mhara gu bheil i air a bualadh snamhaidh i gu grad air falbh. Air uairibh théid i dìreach fodha gu grunnd na fairge; agus air uairibh eile, air dhi dol beagan fo'n uisge, siubhlaidh i seachad le luathas saighid. Aig ceathramh gach uaire feumaidh i éirigh gu uachdar an uisge chum a h-anail a tharruing; agus an sin tha na maraichean g'a cuairt-eachadh agus g'a lotadh leis na sleaghaibh, gus am bheil i a' sruthadh fola, agus a' togail cobhair air an uisge le a h-iomairt. 'Nuair a gheibh i bàs tionndaidh i air a druim; agus an sin ceanglaidh na maraichean cuird mu'n cuairt di, tairngidh iad i dh'ionnsuidh na loingeis, no chum na traighe,—gearraidh iad i 'na miribh beaga, agus taisgidh iad suas i ann an soithichibh a ta aca san loingeis fa chomhair a' ghnothuich so. 'Nuair a bhitheas na soithichean làn do bhlongaig na muice-mara pillidh iad dachaidh leis an loingeis.

AN CAMHAL.

Buinidh an camhal do na h-ionadaibh is neothortaiche agus is fiadhaich do Africa. Tha e ro fheumail do luchd-tuineachaidh an àite sin chum am fàsaichean tioram agus gainmheachaidh a shiubhal; agus as 'eugmhais cha b' urrainn doibh còmhnuidh a ghabhail san dì-threabh a ta iad ag àiteachadh. Tha an camhal cho feumail do na h-Arabaich 'sa ta na féidh do mhuinntir Lapland. 'Nuair tha e òg tha 'fheoil taitneach agus beathachail; tha e ro-ìomchuidh air son eallach a ghiulan, agus tha 'fhionna air a dheanamh 'na eudach do'n t-sluagh, agus 'na chòmhdach do na pàilliunaibh sam bheil iad gabhail tàimh.

Chum's gu'n tuig sinn mòr-luach a' chamhail do na h-Arabaich, feumaidh sinn smuaineachadh air dùthaich gun fheur gun uisge,—far am bheil teas na gréine a' tiormachadh suas sùth an talmhainn, agus a' togail iota do-chasgaidh do'n t-sluagh,—far am bheil fàsaichean gaineimh air an sìneadh a mach cho fhad 's a's urrainn an t-sùil sealltuinn,—agus far nach 'eil luibh ghorm r'a fhaicinn, no ionad-fasgaidh ri fhaotainn o theas agus o thiormachd na gréine. 'Se so nàdur nan àiteacha sin tha na h-Arabaich a' sealbhachadh. Cha'n iongnadh ma ta ged sheall iad air a' chamhal a ta deanamh am beatha so-ghiulan doibh anns na h-ionadaibh fiadhaich so, mar thiodhlac phrìseil o nèamh.

Ann an Arabia, ann am Persia, agus san

Eiphit tha an luchd-ceannachd agus reicidh a' giulan am bathar o dhùthaich gu dùthaich le camhalaibh. Cha'n 'eil ainmhidh air bith a's soirbhe agus a's umhal na'n t-ainmhidh so. Lùbaidh e a ghlùin agus luidhidh e sios gus an luchdaich a mhaighstir e; agus 'nuair a chuirear tuilleadh 'sa chòir do luchd air, gearainidh e gu goirt, ach geillidh e cho fhad 's a's urrainn da. Aig an àm cheudna cumaidh e cuimhne air an an-ìochd a nithear air, agus ma ni am fear-greasaidh foirneart air car fada cha bhi e furasd dha mu dheireadh dol as o 'dhioghaltas.

'Nuair bheachdaicheas sinn air dealbh a' chamhail chi sinn gu soilleir gu bheil e air orduchadh agus air a dheanamh iomchuidh fa chomhair nam fàsaichean sam bheil e air àrach. Tha a chosan air an deanamh freagarach air son na slighe tha e siubhal. Cha'n urrainn da falbh air rathad clachach, no e féin a chumail suas air talamh crèachaidh agus fliuch; ach tha crodhan a chosan son-raichte gu greim a ghabhail do'n ghaineamh, agus gu siubhal troimh an dì-threabh thioram agus theth. Ach is e an ni a ta deanamh a' chamhail ro-iomchuidh do na h-Arabaich gu bheil e comasach air astar fad a shiubhal as eugmhais uisge. 'Nuair a thig e gu tobar uisge òlaidh e a dhiol; agus a thuille air sin lionaidh e sporan a ta aige aig ìochdar a ghoille, agus as an sporan so tairngidh e beagan is beagan a

fhliuchadh a bhìdh a réir 'fheuma. Leis an innleachd so tha e comasach air siubhal car iomadh là gun uisge a bhlasadh troimh na fàsaichibh sin anns am bàsaicheadh ainmhidh air bith eil a dhìth uisge agus innlinn.

'Nuair a bheachdaicheas sinn air a' chumhachd a chruthaich, agus air a' ghliocas tha riaghladh an domhain,—'nuair a sheallas sinn air an dòigh san deach gach nì a shonrachadh fa chomhair a chrìche féin, agus cia cho freagarach 'sa ta an t-iomlan fa chomhair uireasbhuidh an duine, chì sinn gu bheil na h-uile air an orduchadh ann am maithneas agus an tròcair do chloinn nan daoine. Anns gach earrann do'n domhain gheibhear am meas agus na luibhean tha feumail chum corp an duine a bheathachadh san earrann sin—na h-ainmhidhean tha feumail chum seirbhis a dheanamh dha,—an còmhdach tha feumail 'ga dhìonadh o theas no o fhuachd, agus na nithe sin tha comasach air toil-inntinn a thoirt da agus a bheatha dheanamh taitneach agus so-ghiulan. As eugmhais an Fhéidh cha b'urrainn do mhuinntir Lapland teachd beò anns na dùthchaibh fuar sin a ta air an còmhdachadh le h-eighe agus le sneachd. As eugmhais a' chamhail cha b'urrainn do na h-Arabaich am fàsaichean tioram agus teth a shiubhal ;—agus mur orduicheadh Dia na nithe tha feumail do'n duine anns gach earrann tha e ag àiteachadh bhiodh a bheatha 'na h-callaich agus 'na trioblaid dha.

AN LEBHIATAN.

Annas na sgrioptuiribh tha iomradh air a dheanamh gu minic air an Lebhiatan ; agus o'n chunntas a ta air a thoirt seachad an sin mu thimchioll tha e soilleir gu'n robh e ro-làidir, iargalt, agus chronail. Cha'n urrainn duinn a ràdh le cinntas ciod am beathach a ta air a chiallachadh leis an ainmhidh so, oir a ta an t-ainm a nis air a mhùthadh. Tha mòran am barail gur ionnan an Crocodile agus an Lebhiatan, do bhrìgh gu bheil an uile-bheisd so a' cordadh gu mòr ris na nithibh sin a labhair Iob mu thimchioll an Lebhiatain. A réir cunntais luchd-siubhail tha an Crocodile air uairibh deich troidh fichead air fad,—Tha a dhruim air a còmhdachadh le lannaibh air nach druidh ach gann sleagh gheur no peleir guna. Cha phill e air ais o chreutair air bith, agus cha chaomhain e duine no ainmhidh a thig 'na chòir. A thuilleadh air sin thig e beò san uisge agus air talamh, agus tha a spionnadh cho mòr is gu'n tilg e thairis bàta le buille d'a earr.

'Se so cuibhrionn do na nithibh sin a ta air an aithris mu thimchioll a' Chrocodile, agus tha iad a' mìn-chordadh ris a' chunntas sin tha Iob a' toirt air an Lebhiatan anns an aon chaibdeil thar dà fhichead d'a Leabhar, far am bheil e ag ràdh mu thimchioll “ Is iad a lannan 'uail, dùinte suas le chéile mar le seula daingean ; aon air a cur ri h-aon eile, air chor a's nach tig

deò eatorra. Tha iad air an tàthadh ri chéile, tha iad a' dlùth-leantuinn ri chéile agus cha ghabh iad dealachadh. Le a shìtrich soillsichidh solus; agus tha a shùilean cosmhuil ri rosgaibh na maidne. As a bheul théid leusan; leumaidh sradan teine a mach. A cuinneanaibh a shròine thig deatach a mach, mar á poit air ghoile no coire. Lasaidh 'anail gual, agus théid lasair a mach as a bheul. 'Na mhuineal còmhnuichidh neart, agus roimhe ruithidh bròn.

Tha filleachan 'fheòla a' leantuinn ri chéile; tha iad daingean annta féin; cha ghabh iad gluasad. Tha a chridhe cruaidh mar chloich, cruaidh eadhon mar chloich-mhuilinn iochdarach.

An uair a thogas se e féin suas bithidh na cumhachdaich fo gheilt: air eagal brisidh glanaidh siad iad féin. Cha seas claidheamh an ti a bheanas ris; an t-sleagh, an gath, no an lùireach. Measaidh e mar chonlaich an t-iarunn, mar fhiodh grod an t-umha. Cha toir an t-saighead air teicheadh; 'nan conlaich tionndaidhear leis clachan a' chroinn-tabhuill. Mar chonlaich measar gathan; agus ni e gàire ri crathadh sleaghla. Fuidhe tha clacha geura: sgaoilidh e nithe geura air an làthaich. Bheir e air an doimhne bhi air ghoil mar choire: An fhairge ni e mar phoit olaidh-ungaidh. 'Na dhéigh bheir e air a shlighe soillseachadh:

saoidh neach an t-aigean a bhi liath. Air thalamh cha'n 'eil a shamhuil, a rinneadh as eugmhais eagail. Chi e gach ni àrd : tha e 'na rìgh os ceann uile chloinne an uabhair."

CUMHACHD AGUS UACHDARANACHD DHE THAR
UILE OIBRIBH A LAMH.

Tha e air fhoillseachadh dhuinn sa' Bhiobul 'nuair a thug Iob a chùis an làthair an Tigh-earna, gu'n do labhair Dia ris as a' chuairt-ghaoithe, agus gu'n do nochd e dha anmhuinn-eachd, agus aineolas, agus truailidheachd a nàduir. Dh' fheuch e dha gu'n robh an dòigh air an deach an saoghal a chruthachadh air tùs an an-fhios air,—gu'n robh e gun eòlas air nàdur nan ainmhidhean a bha 'g ionaltradh air aghaidh na talmhainn, agus as eugmhais neart g'an riaghladh agus g'an cumail suas. Air do Dhia a chumhachd miorbhuileach féin fhoillseachadh do Iob, a réir mar a ta e air a nochdadh 'na uachdaranachd os ceann uile bheathaiche na macharach, thubhairt e ris, "An sealg thusa cobhartach do'n leòmhan bhoirionn, agus an sàsuich thu ciocras nan leòmhan òga; 'nuair a chrùbas iad 'nan garaidh, a dh'fhanas iad ann an sgàile chum feall-fheitheamh? Cò a sholaireas do'n fhitheach a lòn? an uair a dh'éigheas an t-àl òg aige ri Dia, théid iad air iomroll a chion bìdh."

“ An aithne dhuitse an t-àm anns am bheir gabhair fhiadhaich na carraig? an toir thu fa’-near c’uin a bheireas na h-eilde laoigh? An urrainn thu na miosan àireamh a choimhlionas iad, agus an aithne dhuit an t-àm anns am beir iad? Cromaidh siad iad féin, beiridh iad an àl, tilgidh iad dhiubh an do-bhròn. Tha an àl an culaidh mhaith, tha iad a’ fàs suas anns na cluanaibh; théid iad a mach, agus cha phill iad d’an ionnsuidh.”

“ Cò a chuir a mach an t-asal fiadhaich saor, agus cò a dh’fhuasgail ceanglaichean an asail fhiadhaich? D’an d’rinn mi a thigh do’n fhàsach, àite-comhnuidh do’n fhearann neo-thorach. Ni e tarcuais air mòr-shluagh a’ bhaile; ri éigheach an fhir-ghreasaidh cha’n éisd e. Rannsaichidh e na sléibhtean chum ionaltraidh, agus siridh e an déigh gach ni uaine. Am bi an t-aon-adharcach toileach air seirbhis a dheanamh dhuit? Am fan e aig do phrasaich? An ceangail thu an t-aon-adharcach le ’chuing anns a’ chlais? No an cliath e na gleanntan a’d’ dhéigh? An earb thu as, a chionn gur mòr a neart? No am fàg thu t’obair dha? An creid thu gu’n aisig e do shiol, agus gu’n cruinnich se e do d’ urlar-bualaidh?”

Au tusa thug sgiathan breagha do na peucaibh? No sgiathan agus iteach do’n struth; a dh’ fhàgas a h-uibhean san talamh, agus a bhlàthaicheas iad san duslach, agus a dhich-

uimhnicheas gu'm feud cos am bruthadh; no fiadh-bheathach na macharach am briseadh? Cruaidhichear i an aghaidh a h-àlaich, mar nach bu leatha iad: dìomhain tha a saor gun eagal; a chionn gu'n do dhiult Dia dhi gliocas, agus nach do roinn e tuigse rithe."

An sin fhreagair Iob an Tighearn, agus thubhairt e, "Tha fhios agam gur urrainn thusa gach ni dhiubh so a dheanamh, agus nach ceilear smuain air bith ort. Cò esan a cheileas comhairle gun còlas? Uime sin chuir mi an céill nithe nach do thuig mi; nithe tuille 's iongantach air mo shonsa, nach b'aithne dhomh."

EARRAINNEAN DO NA SGRIOP- TUIRIBH NAOMHA.

LUCAS.

- 26 CAIB. I.—Agus anns an t-seathamh mìos
chuireadh an t-aingeal Gabriel o Dhia,
gu caithir do Ghalile, d'am b'ainm Nasaret,
27 Dh'ionnsuidh òigh a bha fo cheangal-pòs-
aidh aig fear d'am b'ainm Ioseph, do thigh
Dhaibhidh; agus b'e ainm na h-òigh Muire.
28 Agus air dol a steach do 'n aingeal d'a h-
ionnsuidh, thubhairt e, Fàilte dhuit, o thusa
d'an do nochdadh mòr dheadh-ghean, a ta
an Tighearna maille riut; is beannaichte
29 thu am measg bhan. Agus an uair a chunn-
aic i e, bha i fo thrioblaid inntinn air son a
chainnte, agus a' reusonachadh ciod a' ghnè
30 altach-beatha dh'fheudadh bhi 'n so. Agus
thubhairt an t-aingeal rithe, Na biodh eagal
ort, a Mhuire: oir fhuair thu deadh-ghean
31 o Dhia. Agus feuch, gabhaidh tu a'd'
bhroinn, agus beiridh tu mac, agus bheir
32 thu Iosa mar ainm air. Bithidh e mòr,
agus goirear Mac an Ti a's ro-àirde dheth;
agus bheir an Tighearna Dia dha righ-chai-
33 thir 'athar féin Dhaibhidh. Agus bithidh

e 'na Rìgh air tigh Iacoib gu bràth, agus cha bhi crìoch air a rìoghachd.

- 34 Agus thubhairt Muire ris an aingeal,
Cionnus a bhitheas so, do bhrìgh nach 'eil
35 aithne agamsa air duine? Agus fhreagair
an t-aingeal agus thubhairt e rithe, Thig
an Spiorad naomh ort, agus cuiridh cumh-
achd an 'Ti a's àirde sgàil ort: uime sin
an ni naomh sin a bheirear leat, goirear
36 Mac Dé dheth. Agus, feuch, do bhan-
charaid Elisabet, a ta ise féin torrach air
mac 'na sean aois; agus 's e so an seathadh
mìos dh'ise d'an goirteadh bean neo-thorr-
37 ach. Oir cha 'n'eil ni sam bith do-dheanta
38 do Dhia. Agus thubhairt Muire, Feuch ban-
oglach an 'Tighearna, biodh e dhomhsa réir
t'fhocail. Agus dh'fhalbh an t-aingeal uaiphe.
39 Agus air éirigh do Mhuire sna làithibh
sin, chaidh i le cabhaig do dhùthaich nam
40 beann, gu baile do Iuda. Agus chaidh i
steach do thigh Shechariais, agus chuir i
41 fàilte air Elisabet. Agus tharladh an uair
a chual' Elisabet beannachadh Mhuire, gu'n
do leum an naoidhean 'na broinn: agus
lìonadh Elisabet leis an Spiorad naomh.
42 Agus ghlaodh i mach le guth àrd, agus
thubhairt i, Is beannaichte thu am measg
bhan, agus is beannaichte toradh do bhronn.
43 Agus cionnus a dh'éirich so dhomhsa, gu'n
tìgeadh màthair mo 'Thighearna a m' ionn-
44 suidh. Oir feuch, co luath 's a thàinig

fuaim do bheannachaidh a'm' chluasaibh,
bhriosg an naoidhean le h-aoibhneas ann
45 mo bhroinn. Agus is beannaichte ise a
chreid: oir coimhlionar na nithe a labhradh
rithe leis an Tighearn.

46 Agus thubhairt Muire, A ta m'anam ag
47 àrd-mholadh an Tighearn. Agus a ta mo
spiorad a' deanamh gairdeachais ann an Dia
48 mo Shlànuighear: Do bhrìgh gu'n d'amh-
aire e air staid ìosal a bhanoglaich: oir
feuch, o so suas goiridh gach linn beann-
49 aichte dhiom. Do bhrìgh gu'n d' rinn an
Ti a ta cumhachdach nithe mòra dhomb,
50 agus is naomha 'ainm. Agus a ta a thrò-
cair-san o linn gu linn, do'n dream d'an
51 eagal e. Nochd e neart le 'ghairdean, sgap
e na h-uaibhrich ann an smuaintibh an
52 cridhe féin. Thug e nuas na daoine cumh-
achdach o'n caithrichibh rìoghail, agus dh'-
53 àrdaich e iadsan a bha ìosal. Lìon e'n
dream a bha ocrach le nithibh maithe, agus
chuir e uaith na daoine saoi bhir falamh.
54 Rinn e còmhnaidh ri Israel 'òglach féin, ann
55 an cuimhneachadh a thròcair. Mar a labh-
air e r'ar n-aithrichibh, do Abraham agus
d'a shliochd gu bràth.

-
- 1 CAIB. II.—Agus tharladh sna làithibh
sin, gu'n deachaidh ordugh a mach o Cheas-
ar Augustus, an domhan uile a mheas.
2 (Agus rinneadh an ceud mheas so 'nuair a

- bha Cirenus 'na uachdaran air Siria.)
- 3 Agus chaidh iad uile chum a bhi air am meas, gach aon fa leth d'a bhaile féin.
- 4 Agus chaidh Ioseph mar an ceudna suas o Ghalile, á baile Nasaret, do Iudea gu baile Dhaibhidh d'an goirear Bet-lehem, (do bhrìgh gu'n robh e do thigh agus do
- 5 shliochd Dhaibhidh,) chum gu biodh e air a mheas maille ri Muire a bha fo cheangal
- 6 pòsaidh dha, agus i mòr-thorrach. Agus tharladh, am feadh a bha iad an sin, gu'n do choimhlionadh làithean a h-inbhe, chum
- 7 i bhi air a h-aiscad. Agus rug i a ceud ghin mic, agus phaisg i e ann am brat-speilidh, agus chuir i 'na luidhe am prasaich e, do bhrìgh nach robh àit aca san tigh-òsda.
- 8 Agus bha anns an dùthaich sin buachaillean a' fantuinn a muigh, agus a' dean-
- 9 amh faire-oidheche air an treud. Agus, feuch, thàinig aingeal an Tighearn orra, agus dhealraich glòir an Tighearna mu'n
- 10 timchioll; agus ghabh iad eagal mòr. Agus thubhairt an t-aingeal riu, Na biodh eagal oirbh: oir feuch, a ta mi 'g innseadh dhuibh deadh sgéil mhòir aoibhneis, a bhitheas
- 11 do'n uile shluagh. Oir rugadh dhuibh an diugh Slànuighear, ann an caithir Dhaibh-
- 12 idh, neach is e Criosd an Tighearn. Agus bithidh so 'na chombara dhuibh: Gheibh sibh an naoidhean paisgte ann am brat-
- 13 speilidh, 'na luidhe am prasaich. Agus air

- ball bha maille ris an aingeal cuideachd mhòr
do armaitibh nèimh, a' moladh Dhé, agus
14 ag ràdh, Glòir do Dhia anns na h-àrd-
aibh, agus air talamh sìth, deadh-ghean do
15 dhaoinibh. Agus tharladh, 'nuair a dh'-
fhalbh na h-aingil uatha do nèamh, gu'n
dubhairt na buachaillean r'a chéile, Ra-
chamaid a nis eadhon do Bhethlehem, agus
faiceamaid an ni so a rinneadh, a dh'fhoill-
16 sich an Tighearna dhuinne. Agus thà-
inig iad gu grad, agus fhuair iad Muire
agus Ioseph, agus an leanabh 'na luidhe
17 sa' phrasaich. Agus 'nuair a chunnaic iad
sin, dh'aithris iad an ni a dh'innseadh dhoibh
mu thimchioll an leinibh so.

MARCUS.

- 1 CAIB. I.—Toiseach Soisgeil Iosa Crìosd
2 Mhic Dhé: A réir mar a ta e sgrìobhta
anns na fàidhibh, Feuch, cuiream mo theach-
daire roimh do ghnùis, a dh'ulluicheas do
3 shlighe romhad. Guth an ti a dh'éigheas
anns an fhàsach, Ulluichibh slighe an 'Tigh-
4 earna, deanaibh a cheumanna dìreach. Bha
Eoin a' baisteadh anns an fhàsach, agus a'
searmonachadh baistidh an aithreachais,
5 chum maitheanais pheacanna. Agus chaidh
a mach d'a ionnsuidh tìr Iudea uile, agus
luchd-àiteachaidh Ierusalem, agus bhaist-
eadh leis iad uile ann an amhainn Iordain,
ag aideachadh am peacanna.

- 6 Agus bha Eoin air eudachadh le fionna
chàmhal, agus crios leathair m'a leasraidh :
agus bu bhiadh dha locuist agus mil fhiadh-
7 aich. Agus shearmonaich e, ag ràdh, A
ta neach a' teachd a'm' dhéigh a's cumh-
achdaiche na mise, neach nach airidh mise
air cromadh sìos agus barr-iall a bhròg
8 fhuasgladh. Bhaist mise gu dearbh sibh
le h-uisge: ach baistidh esan sibh leis an
9 Spiorad Naomh. Agus tharladh anns na
làithibh sin, gu'n d'thàinig Iosa o Nasaret
Ghalile, agus bhaisteadh e le h-Eoin ann an
10 Iordan. Agus air ball an uair a chaidh e
suas as an uisge, chunnaic e na nèamhan air
am fosgladh, agus an Spiorad mar choluman
11 a' teachd a nuas air. Agus thàinig guth o
nèamh, ag ràdh, Is tusa mo Mhac gràdhach,
am bheil mo mhòr thlachd. ,

LUCAS.

- 20 CAIB VI.—Agus thog Iosa suas a shùilean
air a dheisciobluibh, agus thubhairt e, Is
beannaichte sibhse a ta bochd: oir is libh
21 rioghachd Dhé. Is beannaichte sibhse ta
ocrach a nis: sàsuichear sibh. Is beann-
aichte sibhse ta caoidh a nis: oir gàiridh
22 sibh. Is beannaichte sibh 'nuair a bheir
daoine fuath dhuibh, agus a chuireas iad
as an cuideachd sibh, agus a bheir iad
cainnt mhaslach dhuibh, agus a thilgeas

- iad a mach bhur n-ainm mar ole, air son
 23 Mhic an duine. Deanaibh-sa gairdeachas
 san là sin, agus leumaibh le h-aoibhneas :
 oir feuch, is mòr bhur duais air nèamh :
 oir is ann mar sin a rinn an aithriche air
 24 na fàidhibh. Ach is an-aoibhinn duibhse
 ta saoibhir ; oir fhuair sibh bhur sòlas.
 25 Is an-aoibhinn duibhse ta sàitheach : oir
 bithidh ocras oirbh. Is an-aoibhinn duibhse
 ta gàireachdaich a nis ; oir ni sibh bròn a-
 26 gus gul. Is an-aoibhinn duibhse 'nuair a
 labhras daoine maith umaibh : oir is ann
 mar sin a rinn an aithriche ris na fàidhibh
 27 bréige. Ach a deirim ribhse ta 'g éisd-
 eachd, Gràdhaichibh bhur naimhde, dean-
 aibh maith orrasan le'm fuathach sibh :
 28 Beannaichibh iadsan a ta 'gur mallach-
 adh, agus deanaibh urnuigh air son na
 muinntir a ta buntuinn gu naimhdeil ribh.
 29 Ris an ti a bhuaileas tu air aon ghial, cum
 an gial eile ; agus do'n ti a bheir t'fhall-
 uing dhiot, na bac do chòta mar an ceud-
 30 na. Tabhair do gach neach a dh'iarras
 ort ; agus o'n neach a bheir uait do mhaoin,
 31 na iarr air ais i. Agus mar a b'àill libh
 daoine dheanamh dhuibh, deanaibhse mar
 32 an ceudna dhoibh-san. Oir ma ghràdh-
 aicheas sibh iadsan aig am bheil gràdh
 dhuibh, ciod am buidheachas a ta agaibh ?
 oir gràdhaichidh peacaich féin an dream
 33 aig am bheil gràdh dhoibh. Agus ma ni

sibh maith do'n mhuinntir a ni maith dhuibh, ciod am buidheachas a ta agaibh? oir ni peacaich an ni so féin mar an ceudna.

34 Agus ma bheir sibh iasachd dhoibhsan o'm bheil dùil agaibh ri fhaotainn a rìs, ciod am buidheachas a ta agaibh? oir bheir peacaich féin iasachd do pheacachaibh, chum's gu'm faigh iad uiread a rìs.

35 Ach gràdhaichibhse bhur naimhde, agus deanaibh maith, agus thugaibh iasachd, gun dùil a bhi agaibh ri ni sam bith 'na éiric: agus bithidh bhur duais mòr, agus bithidh sibh 'nur cloinn do'n Ti a's àirde; oir a ta esan tabhartach dhoibhsan a ta mi-thaingéal

36 agus olc. Bithibhse uime sin tròcaireach,

37 mar a ta bhur n-Athair tròcaireach. Agus na tugaibh breth, agus cha toirear breth oirbh: na dìtibh, agus cha dìtear sibh; thugaibh maitheanas, agus bheirear maith-

38 eanas dhuibh. Thugaibh uaibh, agus bheirear dhuibh; deadh thomhas, air a gheinneadh, agus air a chrathadh ri chéile, agus a' cur thairis, bheir daoine ann bhur n-uchd; oir leis an tomhas le'n tomhais sibh, tomhaisear dhuibh a rìs.

1 CAIB. XI.—Agus tharladh air dha bhi ann an ionad àraidh ri h-urnuigh, 'nuair a sguir e, gu'n dubhairt neach àraidh d'a dheisciobluibh ris, A Thighearna, teagaisg dhuinne urnuigh dheanamh, mar a theag-

- 2 aisg Eoin d'a dheisciobluibh féin. Agus thubhairt e riu, 'Nuair a nì sibh urnuigh, abraibh, Ar n-Athair a ta air nèamh, Gu naomhaichear t'ainm. Thigeadh do rìogh-
- 3 achd. Deanar do thoil, mar air nèamh, gu ma h-amhluidh sin air thalamh. Tabh-air dhuinn o là gu là ar n-aran lathail.
- 4 Agus maith dhuinn ar peacanna: oir a ta sinne féin a' maitheadh do gach aon air am bheil fiachan againn. Agus na leig ann am buaireadh sinn, ach saor sinn o'n olc.
- 5 Agus thubhairt e riu, Cò agaibhse aig am bi caraid, agus a théid d'a ionnsuidh air meadhon-oidhche, agus a their ris, A charaid, thoir dhomh trì builinnean air
- 6 iasachd; Oir thàinig caraid dhomh a m' ionnsuidh as a shlighe, agus cha'n 'eil ni
- 7 agam a chuireas mi 'na làthair. Agus gu'm freagair esan o'n taobh a stigh agus gu'n abair e, Na cuir dragh orm: tha 'n dorus a nis air a dhùnadh, agus tha mo chlann maille rium san leabaidh; cha'n
- 8 fhaigh mi éirigh agus an toirt duit. A ta mi ràdh ribh, ged nach éirich e agus nach toir e dha, air son gur e 'charaid e; gidh-eadh air son a liosdachd, éiridh e agus bheir e dha mheud 's a ta dh'uireasbhuidh air.
- 9 Agus a ta mise ràdh ribh, Iarraibh, agus bheirear dhuibh: siribh, agus gheibh sibh: buailibh an dorus, agus fosgailear dhuibh.

- 10 Oir gach neach a dh'iarras, glacaidh e:
 agus an ti a shireas, gheibh e: agus do'n
 11 ti a bhuaileas, fosgailear. Ma dh'iarras
 mac aran air aon neach agaibhse ta 'na
 athair, an toir e dha clach? no ma dh'iarr-
 as e iasg, an toir e nathair dha an àit éisg?
 12 No ma dh'iarras e ubh, an toir e scorpion
 13 da. Air an aobhar sin ma 's aithne dhuibh-
 se a ta olc, tiodhlacan maithe a thoirt d'ur
 cloinn, nach mòr is mò na sin a bheir bhur
 n-Athair nèamhaidh an Spiorad naomh
 dhoibhsan a dh'iarras air e?

EOIN.

- 1 CAIB. III.—Agus bha duine do na Phair-
 isich, d'am b'ainm Nicodemus, a bha na
 2 uachdaran air na h-Iudhaich: Thàinig
 esan chum Iosa san oidhche, agus thubhairt
 e ris, A mhaighstir, tha fhios againn gur
 fear-teagaisg thu a thàinig o Dhia: oir cha'n
 urrainn duine air bith na mìorbhuile so
 d'heanamh a ta thusa a' deanamh, mur bi
 3 Dia maille ris. Fhreagair Iosa agus thubh-
 airt e ris. Gu deimhin deimhin a ta mi ag
 ràdh riut, mur beirear duine a rìs, nach feud
 4 e rìoghachd Dhé fhaicinn. Thubhairt Nico-
 demus ris, Cionnus a dh'fheudas duine bhi
 air a bhreith 'nuair a ta e aosda? am bheil
 e comasach air dol a stigh an dara uair do
 bhroinn a mhàthar, agus a bhi air a
 5 bhreith? Fhreagair Iosa Gu deimhin

deimhin a ta mi ag ràdh riut, mur bi duine air a bhreith o uisge, agus o'n Spiorad, cha'n urrainn e dol a steach do rìoghachd Dhé.

6 An ni sin a ta air a bhreith o'n fheoil, is feoil e; agus an ni sin a ta air a bhreith o'n

7 Spiorad, is spiorad e. Na gabh iongantas gu 'n dubhairt mi riut, Is éigin duibh bhi

8 air bhur breith a rìs. Tha a' ghaoth a' séideadh far an àill leatha, agus tha thu a' cluinntinn a fuaim, ach cha 'n eil fhios agad cia as a tha i teachd, no c' àit a tha i dol: is ann mar sin a tha gach neach a tha air a bhreith o'n Spiorad.

9 Fhreagair Nicodemus agus thubhairt e ris, Cionnus a dh'fheudas na nithe so bhi?

10 Fhreagair Iosa agus thubhairt e ris, Am bheil thusa a'd' fhear-teagaisg Israeil, agus

11 nach aithne dhuit na nithe so? Gu deimhin deimhin a ta mi ag ràdh riut, gu bheil sinne a' labhairt an ni a's fios duinn, agus a' toirt fianuis air an ni sin a chunnaic sinn; agus

12 cha ghabh sibhse ar fianuis. Ma dh'innis mi dhuibh nithe talmhaidh, agus nach creid sibh, cionnus a chreideas sibh ma dh'innseas

13 mi dhuibh nithe nèamhaidh? Agus cha deachaidh aon neach suas do nèamh, ach an ti a thàinig a nuas o nèamh, Mac an

14 duine a ta air nèamh. Agus mar a thog Maois suas an nathair san fhàsach, is ann mar sin is éigin do Mhac an duine bhi air a

15 thogail suas: Chum's ge b'e neach a chreid-

eas ann, nach sgriosar e, ach gu'm bi a' bheatha mhaireannach aige.

- 16 Oir is ann mar sin a ghràdhaich Dia an saoghal, gu'n d'thug e aon-ghin Mhic féin, chum's ge b'e neach a chreideas ann, nach sgriosar e, ach gu'm bi a' bheatha shiorr-
 17 uidh aige. Oir cha do chuir Dia a Mhac do'n t-saoghal, chum gu'n dìteadh e 'n saoghal, ach a chum gu'm biodh an saogh-
 18 al air a shaoradh trìdsan. An ti a chreideas ann, cha dìtear e? ach an ti nach creid, tha e air a dhìteadh cheana, chionn nach do chreid e an ainm aoin-ghin Mhic Dhé.
 19 Agus is e so an dìteadh, gu'n d' thàinig an solus do'n t-saoghal, agus gu'n do ghràdhaich daoine an dorchadas ni's mò na'n solus, a chionn gu'n robh an gnìomharan olc.
 20 Oir gach neach a ta deanamh uile, tha e toirt fuath do'n t-solus, agus cha 'n'eil e teachd chum an t-soluis, air eagal gu'm biodh
 21 'oibre air an cronachadh. Ach an ti a ni 'n fhìrinn, thig e chum an t-soluis, chum's gu'm bi 'oibre follaiseach, gur ann an Dia a rinneadh iad.

-
- 25 CAIB. X.—Fhreagair Iosa iad, Dh'innis mi dhuibh, agus cha do chreid sibh? na h-oibre a ta mi deanamh an ainm m'Athar, tha iad sin a' toirt fianuis mu m' thimchioll.
 26 Ach cha 'n'eil sibhse a' creidsinn; oir cha'n ann do m' chaoraich sibh, mar thubhairt

27 mi ribh. Tha mo chaoraich-sa ag éisd-
 eachd ri m' ghuth, agus is aithne dhomh
 28 iad, agus leanaidh iad mi: Agus bheir mi
 a' bheatha mhaireannach dhoibh, agus cha
 sgriosar iad am feasd, ni mò a spionas
 29 neach air bith as mo làimh iad. M'Athair
 a thug dhomhsa iad, is mò e na na h-uile:
 agus cha'n urrainn neach air bith an spion-
 30 adh á làimh m'Athar. Mise agus an
 31 t-Athair, is aon sinn. Uime sin thog na
 h-Iudhaich clachan a rìs chum a chlachadh
 32 Fhreagair Iosa iad, Nochd mi dhuibh mòr-
 an a dh'oibribh maithe o m'Athair; cia
 do na h-oibribh sin air son am bheil sibh
 33 ga m' chlachadh? Fhreagair na h-Iudh-
 aich e, ag ràdh, Air son oibre maith cha
 'n'eil sinn ga d' chlachadh; ach air son
 toibheim, agus air son, air bhi dhuitse a' d'
 dhuine, gu bheil thu deanamh Dé dhiot
 34 féin. Fhreagair Iosa iad, Nach 'eil e
 sgrìobhta ann bhur lagh-sa, Thubhairt mi,
 Is dée sibh.
 35 Ma thubhairt e Déé riusan, dh'ionnsuidh
 an robh focal dé, agus nach feudar an
 36 sgrìobtuir a bhriseadh; An abair sibh
 ris-san, a naomhaich an t-Athair, agus a
 chuir e chum an t-saoghail, Tha thu a'
 labhairt toibheim; air son gu'n dubhairt
 37 mi, Is mi Mac Dhé? Mur dean mi oibre
 38 m'Athar, na creidibh mi. Ach ma ni,
 ged nach creid sibh mise, creidibh na

h-oibre, chum gu'm bi fios agaibh agus gu'n
 creid sibh gu bheil an t-Athair annamsa,
 39 agus mise annsan. Uime sin dh'iarr iad
 a rìs a ghlacadh: ach chaidh e as an
 40 làimh. Agus chaidh e rìs do'n taobh thall
 do Iordan, do'n ionad anns an robh Eoin
 air tùs ri baisteadh; agus rinn e còmhnuidh
 41 an sin. Agus thàinig mòran d'a ionnsuidh,
 agus thubhairt iad, Cha do rinn Eoin aon
 mhìorbhuil; ach bha na h-uile nithe thubh-
 42 airt Eoin mu'n duine so fìor. Agus chreid
 mòran san àit sin air.

EOIN.

1 CAIB. XI.—A nis bha duine àraidh gu
 tinn, d'am b'ainm Lasarus o Bhetani, baile
 2 Mhuire agus Mharta a peathar. (B'i
 Mhuire sin a dh'ung an Tighearn le oladh
 luachmhoir, agus a thiormaich a chosa le
 a folt, aig an robh a bràthair Lasarus gu
 3 tinn.) Uime sin chuir a pheathraiche fios
 d'a ionnsuidh, ag ràdh, A Thighearn,
 feuch, tha 'n ti a's ionmhuinn leat tinn.
 4 'Nuair a chual' Iosa so, thubhairt e, Cha
 'n'eil an tinneas so chum bàis, ach a chum
 glòire Dhé, chum gu'm bi Mac Dhé air
 5 a ghlòrachadh d'a thaobh. A nis b'ion-
 mhuinn le Iosa Marta, agus a piuthar, agus
 6 Lasarus. Uime sin an uair a chual' e gu'n
 robh esan tinn, dh'fhan e fathast dà là
 anns an ionad an robh e.

- 7 'Na dhéigh sin thubhairt e r'a dheisciob-
 8 luibh, Rachamaid a rìs do Iudea. Thubh-
 airt a dheisciobuil ris, A Mhaighstir, a nis
 dh'iarr na h-Iudhaich do chlachadh; agus
 9 am bheil thu dol a rìs an sin? Fhreagair
 Iosa, Nach 'eil dà uair dheug san là? Ma
 dh'imicheas duine anns an là, cha tuislich
 e, oir tha e faicinn soluis an t-saoghail so.
 10 Ach ma dh'imicheas duine anns an oidhche,
 tuislichidh e, do bhrìgh nach 'eil an solus
 11 ann. Na nithe so thubhairt e: agus 'na
 dhéigh sin a deir e riu, Tha ar caraaid La-
 sarus 'na chodal; ach a ta mise a' dol
 chum's gu'n dùisg mi as a chodal e.
- 12 An sin thubhairt a dheisciobuil, A Thigh-
 earn, ma tha e 'na chodal, bithidh e slàn.
 13 Gidheadh labhair Iosa m'a bhàs; ach
 shaoil iadsan gu'n do labhair e mu thim-
 14 chioll fois codail. An sin thubhairt Iosa
 15 riu gu soilleir, Fhuair Lasarus bàs: Agus
 a ta mi subhach air bhur sonsa nach robh
 mi an sin (chum's gu'n creid sibh;) ach
 16 rachamaid d'a ionnsuidh. An sin thubh-
 airt Tomas, d'an goirear Didimus, r'a
 choimh-dheisciobluibh, Rachamaid-ne mar
 an ceudna, chum's gu'm faigh sinn bàs
 maille ris.
- 17 An sin an uair a thàinig Iosa, fhuair se
 e an déigh dha bhi cheana ceithir làithean
 18 san uaigh. (A nis bha Betani fagus do
 Ierusalem, mu thimchioll cùig stàide

19 deug uaith.) Agus thàinig mòran do na
h-Iudhaich chum Mhatra agus Mhuire,
gu comh-fhurtachd a thoirt doibh a thaobh
20 am bràthar. An sin an uair a chuala
Marta gu'n robh Iosa a' teachd, chaidh i
'na chòdhail : ach shuidh Muire san tigh.

21 An sin thubhairt Marta ri Iosa, A
Thighearn, nam biodh tusa an so, cha 'n
22 fhaigheadh mo bhràthair bàs. Ach a ta
fhios agam a nis féin, ge b'e air bith nithe
a dh'iarras tu air Dia gu'n toir Dia dhuit
23 iad. Thubhairt Iosa rithe, Eiridh do bhrà-
24 thair a rìs. Thubhairt Marta ris, Tha
fhios agam gu'n éirich e a rìs san aiseirigh
25 air an là dheireannach. Thubhairt Iosa
rithe, Is mise an aiseirigh, agus a' bheatha ;
an ti a chreideas annam-sa, ged gheibh-
26 eadh e bàs, bithidh e beò : Agus ge b'e
neach a ta beò, agus a' creidsinn annamsa,
cha'n fhaigh e bàs am feasd. Am bheil
27 thu creidsinn so ? Thubhairt i ris, Tha, a
Thighearna : creideam gur tusa Criosd,
Mac Dhé, a bha gu teachd chum an
t-saoghail.

28 Agus air dhi na nithe so a ràdh,
dh'fhalbh i, agus ghairm i a piuthar Muire
os ìosal, ag ràdh, Thàinig am Maighstir,
29 agus tha e ga d' ghairm. 'Nuair a chual
ise sin, dh'éirich i gu grad, agus thàinig i
30 d'a ionnsuidh. A nis cha robh Iosa fath-
ast air teachd do'n bhaile, ach bha e

- 31 anns an àit an do choinnich Marta e. An sin na h-Iudhaich a bha maille rithe san tigh, agus a' toirt comh-fhurtachd dhi, 'nuair a chunnaic iad Muire gu'n d'éirich i gu grad, agus gu'n deachaidh i mach, lean iad i, ag ràdh, Tha i dol chum na h-uaighe, a chaoineadh an sin.
- 32 An sin an uair a thàinig Muire do'n àit an robh Iosa, agus a chunnaic i e, thuit i aig a chosaibh, ag ràdh ris, A Thighearna, nam biodh tusa an so, cha 'n fhaigheadh
- 33 mo bhràthair bàs. Uime sin an uair a chunnaic Iosa i a' gul, agus na h-Iudhaich a thàinig maille rithe a' gul mar an ceudna, rinn e osna 'na spiorad, agus chuir se e féin
- 34 fuidh àmhghar. Agus thubhairt e, C'àit an do chuir sibh e? Thubhairt iad ris,
- 35 A Thighearn, thig agus faic. Ghuil Iosa.
- 36 An sin thubhairt na h-Iudhaich, Feuch,
- 37 cionnus a ghràdhaich se e? Agus thubhairt cuid diubh, Nach feudadh an duine so a dh'fhosgail sùilean an doill, a thoirt fa'near nach faigheadh eadhon am fear so bàs?
- 38 Uime sin thàinig Iosa, ag osnaich a rìs ann féin, chum na h-uaighe. Agus b'uaimh i, agus bha clach air a' cur oirre.
- 39 Thubhairt Iosa, Togaibh a' chlach. Thubhairt Marta, piuthar an duine mhairbh, ris, A Thighearn, tha nis droch bholadh
- 40 dheth; oir is e so an ceathramh là. A

- deir Iosa rithe, Nach dubhairt mi riut, Ma chreideas tu, gu'm faic thu glòir Dhé?
- 41 An sin thog iad a' chlach (o'n àit anns an robh an duine marbh air a chur.) Agus thog Iosa suas a shùilean, agus thubhairt e, Athair, tha mi toirt buidheachais duit
- 42 gu'n d'éisd thu rium. Agus bha fhios agam gu bheil thu 'g éisdeachd rium a ghnàth: ach thubhairt mi e air son an t-sluaigh a tha 'nan seasamh a m' thimchioll, chum gu'n creid iad gu'n do chuir thusa
- 43 uait mi. Agus an uair a labhair e na nithe so ghlaodh e le guth mòr, A Lasa-
- 44 ruis, thig a mach. Agus thàinig esan a bha marbh a mach, agus a chosan agus a làmhnan ceangailte leis an eudach mhairbh: agus bha 'aghaidh ceangailte mu'n cuairt le neapaicin. A deir Iosa riu, Fuasglaibh e, agus leigibh leis imeachd.

MATA.

- 1 CAIB. XIII.—Air an là sin féin chaidh Iosa mach as an tigh, agus shuidh e ri taobh
- 2 na fairge. Agus chruinnich sluagh mòr d'a ionnsuidh, air chor as air dol a steach do luing dha, gu'n do shuidh e, agus sheas an
- 3 sluagh uile air an tràigh. Agus labhair e mòran do nithibh riu ann an cosamhlachdaibh, ag ràdh, Feuch, chaidh sìoladair a
- 4 mach a chur sìl. Agus ag cur an t-sìl da, thuit cuid dheth ri taobh an ròid, agus thàì-

- 5 nig na h-eunlaith agus dh'ith iad e. Thuit
 cuid air ionadaibh creagach, far nach robh
 mòran talmhainn aige : agus air ball dh'fhàs
 e suas, do bhrìgh nach robh doimhneachd
 6 talmhainn aige. Ach air éirigh do'n ghréin,
 dhothadh e, agus do bhrìgh nach robh
 7 freumh aige, shearg e as. Agus thuit cuid
 am measg droighinn : agus dh'fhàs an
 8 droighinn suas, agus mhùch se e. Ach
 thuit cuid eile am fearann maith, agus thug
 e toradh a mach, cuid a cheud uiread, cuid
 a thri fichead, cuid a dheich thar fhichead
 uiread 's a chuireadh.
- 18 Eisdibh air an aobhar sin ri cosamhlachd
 19 an t-sìoladair. An uair a chluinneas neach
 air bith focal na rìoghachd, agus nach
 toir e fa'near e, thig an droch spiorad,
 agus bheir e air falbh an nì a chuireadh
 'na chridhe : is e so esan anns an do chuir-
 20 eadh an sìol ri taobh an ròid. Ach esan
 a fhuair sìol ann an àitibh creagach, is e so
 an ti a chluinneas am focal, agus a ghabhas
 21 e air ball le gairdeachas ; Gidheadh cha'n
 'eil freumh aige ann féin, ach fanaidh se
 ré tamuill : agus an uair a thig trioblaid
 no geur-leanmhuinn air son an fhocail, air
 22 ball gheibh e oilbheum. Esan mar an
 ceudna a ghabh sìol am measg an droigh-
 inn, is e so an ti a ta cluinntinn an fhocail :
 agus a ta ro-chùram an t-saoghail so, agus
 mealltaireachd beartais a' mùchadh an

- 23 fhocail, agus bithidh e gun toradh. Ach an ti ud a ghabh sìol ann an deadh fhearann, is e sin an neach a ta cluinntinn an fhocail, agus 'ga thoirt fa'near, neach mar an ceudna ta giùlan toraidh, agus a ta tabhairt a mach cuid a cheud uiread, cuid a thri fichead, agus cuid eile a dheich thar fhichead uiread 's a chuireadh.
- 44 A rìs, a ta rìoghachd nèimh cosmhail ri ionmhas air fhòlach am fearann: ni an déigh fhaotainn, a dh'fhòlaich duine, agus air sgàth a ghairdeachais air a shon, dh'imich e agus reic e 'na bha aige uile, agus
- 45 cheannaich e am fearann sin. A rìs, is cosmhail rìoghachd nèimh ri ceannaiche àraidh ag iarraidh neamhnuide maiseach:
- 46 Agus air amas da air aon neamhnuid ro luachmhoir, dh'imich e agus reic e 'na bha
- 47 aige, agus cheannaich e i. A rìs, a ta rìoghachd nèimh cosmhail ri lìon air a thilgeadh san fhairge, agus a chruinnich
- 48 do gach uile sheòrsa éisg: Agus air dha bhi làn, tharruing na h-iasgairean e chum na tràighe, agus air suidhe dhoibh, chruinnich iad na h-éisg mhaithe ann an soithich-
- 49 ibh, ach thilg iad na droch éisg a mach. Is ann mar sin a bhitheas ann an deireadh an t-saoghail: théid na h-aingil a mach, agus dealaichidh iad na droch dhaoine á measg
- 50 nam fireanach; Ach tilgidh siad iad san

àmhunn theintich : an sin bithidh gul agus giosgan fhiacal.

LUCAS.

- 15 CAIB. XII.—Agus thubhairt e riu, Thug-
aibh an aire, agus gleidhibh sibh féin o
shannt : oir cha 'n ann am mòr-phailteas
nan nithe ta e sealbhachadh tha beatha an
16 duine. Agus labhair e cosamhlachd riu,
ag ràdh, Thug fearann duine shaoibhir
17 àraidh bàrr pailte uaith. Agus smuainich
e ann féin, ag ràdh, Ciod a nì mi, a chionn
nach 'eil agam àit anns an cruinnich mi mo
18 thoraidh? Agus thubhairt e, Nì mi so-
leagaidh mi mo shaibhlean, agus togaidh
mi *saibhlean* a's mò ; agus cruinnichidh mi
annta sin mo thoraidh uile, agus mo
19 mhaoin. Agus their mi ri m' anam, An-
am, a ta agad mòran do nithibh maithe air
an tasgaidh fa chomhair mòrain bhliadhna ;
20 gabh fois, ith, òl, is bi subhach. Ach
thubhairt Dia ris, Amadain, air an oidhche
so féin iarrar t'anam uait : an sin cò dha a
bhuineas na nithe sin a dh'ulluich thu?
21 Is ann mar sin a ta 'n ti a thaisgeas ionmhas
dha féin, agus nach 'eil saoi bhir a thaobh
Dhé.

-
- 11 CAIB. XV.—Agus thubhairt e, Bha aig
12 duine àraidh dithis mhac. Agus thubhairt
am mac a b'òige dhiubh r'a athair, Athair,

- thor dhomhsa a' chuid-roinn a thig orm do d' mhaoin. Agus roinn e catorra a
- 13 bheathachadh. Agus an déigh beagain do làithibh, chruinnich am mac a b' òige a chuid uile, agus ghabh e a thurus do dhùthaich fad air astar, agus an sin chaith e a mhaoin le beatha struidheasaich.
- 14 Agus an uair a chaith e a chuid uile, dh'éirich gorta ro-mhòr san tìr sin; agus thòisich e ri bhi ann an uireasbhuidh.
- 15 Agus chaidh e agus cheangal se e féin ri aon do shaor-dhaoineibh na dùthcha sin: agus chuir e d'a fhearann e, a bhiadhadh
- 16 mhuc. Agus bu mhiann leis a bhrù a lìonadh do na plaosgaibh a bha na mucan ag itheadh; oir cha d'thug neach air bith
- 17 dha. Agus an uair a thàinig e chuige féin, thubhairt e, Cia lìon do luchd tuarasdail m'athar-sa aig am bheil aran gu leòir agus ra' sheachnadh, 'nuair a ta mise a' bàsachadh le gorta? Eiridh mi, agus
- 18 théid mi dh'ionnsuidh m'athar, agus their mi ris, Athair, pheacaich mi 'n aghaidh
- 19 fhlaithheanais, agus a'd' làthair-sa. Agus cha 'n fhiu mi tuilleadh gu'n goirte do mhac-sa dhìom: dean mi mar aon do d' luchd tuarasdail.
- 20 Agus dh' éirich e, agus chaidh e dh' ionnsuidh 'athar. Ach air dha bhi fathast fad uaith, chunnaic 'athair e, agus ghabh e truas mòr dheth, agus ruith e, agus thuit

- 21 e air a mhuineal, agus phòg se e. Agus
thubhairt am mac ris, Athair, pheacaich mi
an aghaidh fhlaithheanais, agus a'd' làth-
air-sa, agus cha'n fhiu mi tuilleadh gu'n
22 goirte do mhac dhiom. Ach thubhairt an
t-athair r'a sheirbhisich, Thugaibh a mach
a' chulaidh a's fearr, agus cuiribh uime i,
agus cuiribh fàinne air a làimh, agus bròg-
23 an air a chosaibh. Agus thugaibh an so an
laogh biadhta, agus marbhaibh e; agus
24 itheamaid agus biomaid subhach: Oir bha
mo mhac so marbh, agus tha e beò a rìs;
bha e cailte, agus fhuaradh e. Agus
thòisich iad air bhì subhach.
- 25 A nis bha a mhac bu shine mach san
fhearann; agus an uair a thàinig e, agus a
thàr e 'm fagus do'n tigh, chual e 'n ceòl
26 agus an dannsa. Agus ghairm e chuige
aon do na h-òglaich, agus dh'fheòraich
27 e ciod bu chiall do na nithibh sin. Agus
thubhairt esan ris, Thàinig do bhràthair;
agus mharbh t' athair an laogh biadhta,
28 chionn gu'n d'fhuair e rìs e slàn fallain. Agus
ghabh esan fearg, agus cha b'àill leis dol a
stigh: air an aobhar sin thàinig 'athair a
29 mach, agus chuir e impidh air. Ach
fhreagair esan agus thubhairt e r'a athair,
Feuch, a taims' a' deanamh seirbhis duit
an uiread so do bhliadhnaibh, agus uair
air bith cha do bhris mi t'àithne, gidheadh
cha d'thug thu meann riamh dhomh, chum

gu'm bithinn subhach maille ri m' chàird-
 30 ibh. Ach an uair a thàinig do mhac so,
 a dh'ìth suas do bheathachadh maille ri
 strìopaichibh, mharbh thu'n laogh biadhta
 31 dha. Agus thubhairt e ris, A mhic, tha
 thusa a ghnàth maille rium, agus na h-uile
 32 nithe a's leamsa, is leatsa iad. Bu chòir
 dhuinn a bhi subhach, agus aoibhneach :
 oir bha do bhràthair so marbh, agus tha
 e beò a rìs ; agus bha e cailte, agus fhuar-
 adh e.

19 CAIB. VII.—Agus ghairm Eoin d'a ionn-
 suidh dithis àraidh d'a dheisciobluibh, agus
 chuir e iad gu h-Iosa, ag ràdh, An tusa
 esan a bha ri teachd, no'm bi sùil againn
 20 ri neach eile? Agus air teachd do na
 daoineibh d'a ionnsuidh, thubhairt iad, Chuir
 Eoin Baiste sinne a d' ionnsuidh, ag ràdh,
 21 An tusa an ti a bha ri teachd, no'm bi sùil
 againn ri neach eile? Agus anns an uair
 sin féin leighis e mòran o 'n euslaintibh
 agus o'm plàighibh, agus o dhroch spiorad-
 aibh, agus thug e'n radharc do mhòran a
 22 bha dall. Agus fhreagair Iosa, agus thu-
 bhairt e riu, Imichibh-sa agus innsibh do
 Eoin na nithe a chunnaic agus a chuala sibh,
 gu'm bheil na doill a' faicinn, na bacaich
 ag imeachd, na lobhair air an glanadh, na
 bodhair a' cluinntinn, na mairbh air an
 dùsgadh, an soisgeul air a shearmonach-

- 23 adh do na bochdaibh. Agus is beannaichte
 esan nach faigh oilbheum annamsa.
- 24 Agus an uair a dh'fhalbh teachdairean
 Eoin, thòisich e air labhairt ris an t-sluagh
 mu thimchioll Eoin, Ciod an ni a chaidh
 sibh a mach do'n fhàsach a dh'fhaicinn? an
- 25 i cuile air a crathadh le gaoith? Ach ciod
 e an ni a chaidh sibh a mach a dh'fhaicinn;
 an e duine air a sgeadachadh ann an eu-
 dach mìn? feuch, iadsan a ta sgeadaichte
 le eudach rìomhach, agus a' caitheadh am
 beatha gu sòghail, is ann an cùirtibh nan
- 26 rìgh a ta iad. Ach ciod e an ni a chaidh
 sibh a mach a dh'fhaicinn? an e fàidh?
 seadh, a ta mi ag ràdh ribh, agus ni 's mò na
- 27 fàidh. Is e so an ti mu'm bheil e sgrìobh-
 ta, Feuch, cuiream mo theachdair roimh
 do ghnùis, a dh' ulluicheas do shlighe romh-
- 28 ad. Oir a ta mi ag ràdh ribh, 'Nam measg-
 san a rugadh le mnaibh, cha'n 'eil fàidh
 a's mò na Eoin Baiste: gidheadh an ti a's
 lugha ann an rìoghachd Dhé is mò e na
- 29 esan. Agus dh' fhìreanaich am pobull uile
 a chual e, agus na cìs-mhaoir Dia, air
 dhoibh bhi air am baisteadh le baisteadh
- 30 Eoin. Ach chuir na Phairisich agus an
 luchd-lagha cùl ri comhairle Dhé d'an
 taobh féin, am feadh nach do bhaisteadh
 iad leis.

- lachd so ri dream àraidh bha 'g earbsadh asda féin gu 'n robh iad 'nam fireanaibh, agus a bha deanamh tàir air dream eile:
- 10 Chaidh dithis dhaoine suas do'n teampull a dheanamh urnuigh; fear diubh 'na Phairiseach, agus am fear eile 'na chis-mhaor. Sheas am Phairiseach leis féin, agus rinn e urnuigh mar so, A Dhé, tha mi toirt buidheachais duit nach 'eil mi mar a ta daoine eile, 'nan luchd foireigin, eucorach, adhaltrannach, no eadhon mar
- 12 an cis-mhaor so. Tha mi a' trasgadh dà uair san t-seachdain, tha mi toirt deachaimh as na h-uile nithibh a ta mi sealbh-
- 13 achadh. Agus air seasamh do'n chis-mhaor fada air ais, cha b'àill leis fiu a shùil a thogail suas gu nèamh, ach bhuail e 'uchd, ag ràdh, A Dhia, dean tròcair
- 14 ormsa ta 'm pheacach. A ta mi ag ràdh ribh gu'n deachaidh am fear so sìos d'a thigh air fhìreanachadh ni 's mò na'm fear ud eile: oir ge b'e neach a dh'àrdaicheas e féin, islichear e; agus ge b'e a dh'islicheas e féin, àrdaichear e.

EOIN.

- 1 CAIB. XIV.—Na biodh bhur cridhe fuidh thrioblaid: tha sibh a' creidsinn ann an Dia, creidibh annamsa mar an ceudna.
- 2 Ann an tigh m'Athar-sa tha iomadh àite-còmhnuidh: mur biodh e mar sin dh'inn-

sinn-sa dhuibh : tha mi dol a dh'ulluchadh
 3 àite dhuibh. Agus ma théid mi agus gu'n
 ulluich mi àit dhuibh, thig mi ris, agus
 gabhaidh mi sibh a m' ionnsuidh féin, chum
 far am bheil mise, gu'm bi sibhse mar an
 4 ceudna. Agus is aithne dhuibh c'àit am
 bheil mi dol, agus is aithne dhuibh an
 5 t-slighe. A deir Tomas ris, A Thighearna,
 cha 'n'eil fhios againn c'àit am bheil thu
 dol, agus cionnus a dh'fheudas eòlas na
 6 slighe bhi againn? A deir Iosa ris, Is
 mise an t-slighe, agus an fhìrinn, agus a'
 bheatha : cha tig aon neach chum an Athar
 ach triom-sa.

12 Gu deimhin deimhin a ta mi ag ràdh ribh,
 An ti a chreideas annamsa, na h-oibre a ta
 mise a' deanamh, ni esan mar an ceudna,
 agus ni e oibre a's mò na iad so, do bhrìgh
 13 gu bheil mise dol chum m'Athar ; Agus ge
 b'e ni a dh'iarras sibh a'm' ainm-sa, ni mise
 sin : chum's gu'm bi an t-Athair air a
 14 ghlòrachadh anns a' Mhac. Ma dh'iarr-
 as sibh ni air bith a'm' ainm-sa, ni mise e.
 15 Ma's toigh libh mise, coimhidibh m' àith-
 16 eanta. Agus guidhidh mise an t-Athair,
 agus bheir e dhuibh Comhfhurtair eile,
 chum's gu fan e maille ribh gu bràth ;
 17 Spiorad na fìrinn, neach nach urrainn an
 saoghal a ghabhail, do bhrìgh nach 'eil e
 ga fhaicinn, agus nach aithne dha e : ach
 is aithne dhuibhse e, oir tha e fantuinn

18 maille ribh, agus bithidh e annaibh. Cha'n fhàg mi sibh 'nur dilleachdaibh; thig mi d'ur n-ionnsuidh.

27 Tha mi fàgail sìth agaibh, mo shìths' a ta mi tabhairt duibh: cha'n ann mar a bheir an saoghal, a tha mise tabhairt dhuibh. Na biodh bhur cridhe fuidh

28 thrioblaid, agus na biodh eagal air. Chuala sibh mar thubhairt mi ribh, Tha mi falbh, agus thig mi rìs d'ur n-ionnsuidh. Nam biodh gràdh agaibh dhomhsa, bhiodh aoibhneas oirbh, a chionn gu'n dubhairt mi, Tha mi dol chum an Athar; oir is

29 mò m' Athair na mise. Agus a nis dh'innis mi dhuibh so roimh dha teachd gu crìch, chum 'nuair a thig e gu crìch gu

30 creideadh sibh. A so suas cha labhair mi mòran ribh: oir a ta uachdaran an t-saoghail so a' teachd, agus cha 'n'eil ni air bith

31 aige annamsa. Ach a chum's gu'm bi fios aig an t-saoghal gur ionmhuinn leam an t-Athair; agus mar a thug an t-Athair àithne dhomh, mar sin a ta mi a' deanamh. Eiribh, rachamaid á so.

1 CAIB. XIX.—An sin air an aobhar sin
2 ghlac Pilat Iosa, agus sgiùrs se e. Agus dh'fhigh na saighdearan crùn droighinn, agus chuir iad air a cheann e, agus chuir
3 iad falluinn phurpuir uime, Agus thubhairt iad Fàilt' ort, a rìgh nan Iudhach.

- 4 agus bhuail iad le'm basaibh e. An sin chaidh Pilat a mach a rìs agus a deir e riu, Feuch, a ta mise 'ga thoirt a mach d'ur n-ionnsuidh, chum's gu'm bi fios agaibh nach
- 5 'eil mise faotainn coire sam bith ann. An sin thàinig Iosa mach, agus an crùn droighinn air, agus an fhalluinn phurpuir uime. Agus a deir Pilat riu, Feuch an
- 6 duine. Uime sin an uair a chunnaic na h-àrd shagairt agus na maoir e, ghlaodh iad, ag ràdh, Ceus e, ceus e. A deir Pilat riu, Gabhaibh-sa e, agus ceusaibh e: oir cha'n 'eil mise a' faotainn coire sam bith
- 7 ann. Fhreagair na h-Iudhaich e, Tha lagh againne, agus a réir ar lagha-ne is còir a chur gu bàs, air son gu'n d'rinn e
- 8 Mac Dhé dheth féin. Uime sin an uair a chuala Pilat a' chainnt sin, bu mhòid a
- 9 bha dh'eagal air: Agus chaidh e steach a rìs a dh'àit a' bhreitheanais, agus a deir e ri h-Iosa, Cia as duit? ach cha d'thug
- 10 Iosa freagradh air. An sin a deir Pilat ris, Nach labhair thu riumsa? nach 'eil fhios agad gu bheil cumhachd agamsa do cheusadh, agus gu bheil cumhachd agam
- 11 do chur fa sgaoil? Fhreagair Iosa, Cha bhiodh cumhachd air bith agad a'm' aghaidh-sa, mur tugtadh dhuit o'n àird e; air an aobhar sin an ti a thug mise thairis dhuit, tha aige-san am peacadh a's mò.
- 12 Agus o sin suas dh'iarr Pilat a chur fa

- sgaoil: ach ghlaodh na h-Iudhaich ag ràdh, Ma leigeas tu 'm fear so fa sgaoil, cha charaid do Cheasar thu: ge b'e neach a ta ga dheanamh féin 'na rìgh, tha e
- 13 labhairt an aghaidh Cheasair. Uime sin an uair a chuala Pilat a' chainnt sin, thug e mach Iosa, agus shuidh e air a' chaithir-bhreitheanais, anns an ionad d'an goirear an Leac-ùrlair, ach anns an Eabhra, Gabata.
- 14 Agus b'e là-ulluchaidh na càisge e, agus mu thimchioll na seathadh uaire: agus a deir e ris na h-Iudhaich, Feuch bhur
- 15 rìgh. Ach ghlaodh iadsan a mach, Beir uainn, beir uainn, ceus e. A deir Pilat riu, An ceus mi bhur rìgh-sa? Fhreagair na h-àrd shagairt, Cha'n 'eil rìgh againne
- 16 ach Ceasar. An sin air an aobhar sin thug e thairis dhoibh e, gu bhli air a cheusadh. Agus ghlac iad Iosa, agus thug iad
- 17 leo e. Agus chaidh e mach, a' giùlan a chrann-ceusaidh, do'n ionad d'an goirear àit a' chloiginn, d'an ainm san Eabhra
- 18 Golgota. An sin cheus iad e, agus dithis eile maille ris, fear air gach taobh, agus
- 19 Iosa sa' mheadhon. Agus sgrìobh Pilat mar an ceudna tìodal, agus chuir e air a' chrann-cheusaidh e. Agus b'e an sgrìobhadh, IOSA O NASARET RÌGH NAN IUDHACH.
- 20 Uime sin leugh mòran do na h-Iudhaich an tìodal so: oir bha'n t-àit anns an

- do cheusadh Iosa fagus do'n bhaile : agus bha an sgrìobhadh an Eabhra, an Greugais,
- 21 agus an Laidin. An sin thubhairt àrd shagairt nan Iudhach ri Pilat, Na sgrìobh, Rìgh nan Iudhach ; ach gu'n dubhairt e féin, is mi rìgh nan Iudhach ; Fhreagair
- 22 Pilat, An nì a sgrìobh mi sgrìobh mi e.
- 23 An sin an uair a cheus na saighdearan Iosa, ghlac iad a thrusgan (agus rinn iad ceithir earrannan, earrann do gach saighdear,) agus a chòta mar an ceudna ; agus bha'n còta gu'n fhuaigheal, air fhigheadh
- 24 o bhràigh sìos gu h-ìomlan. Thubhairt iad uime sin eatorra féin, Na reubamaid e, ach tilgeamaid croinn air, cò aig a bhitheas e : chum gu'n coimhliontadh an sgriobtair a deir, Roinn iad mo thrusgan eatorra, agus thilg iad croinn air mo bhrat. Air an aobhar sin rinn na saighdearan na nithe
- 25 so. A nis sheas làimh ri crann-ceusaidh Iosa, a mhàthair agus piuthar a mhàthar, Muire bean Chleophais, agus Muire Mag-
- 26 dalen. Uime sin an uair a chunnaic Iosa a mhàthair, agus an deisciobul a b'ion-mhuinn leis 'na sheasamh a làthair, thubhairt e r'a mhàthair, A bhean, feuch do
- 27 mhac. An sin a deir e ris an deisciobul, Feuch do mhàthair. Agus o'n àm sin a mach thug an deisciobul sin leis i d'a thigh féin.
- 28 An déigh so air do Iosa fios a bhi

- sgaoil: ach ghlaodh na h-Iudhaich ag ràdh, Ma leigeas tu 'm fear so fa sgaoil, cha charaid do Cheasar thu: ge b'e neach a ta ga dheanamh féin 'na rìgh, tha e
- 13 labhairt an aghaidh Cheasair. Uime sin an uair a chuala Pilat a' chainnt sin, thug e mach Iosa, agus shuidh e air a' chaithir-bhreitheanaich, anns an ionad d'an goirear an Leac-ùrlair, ach anns an Eabhra, Gabata.
- 14 Agus b'e là-ulluchaidh na càisge e, agus mu thimchioll na seathadh uaire: agus a deir e ris na h-Iudhaich, Feuch bhur
- 15 rìgh. Ach ghlaodh iadsan a mach, Beir uainn, beir uainn, ceus e. A deir Pilat riu, An ceus mi bhur rìgh-sa? Fhreagair na h-àrd shagairt, Cha'n 'eil rìgh againne
- 16 ach Ceasar. An sin air an aobhar sin thug e thairis dhoibh e, gu bhi air a cheusadh. Agus ghlac iad Iosa, agus thug iad
- 17 leo e. Agus chaidh e mach, a' giùlan a chrann-ceusaidh, do'n ionad d'an goirear àit a' chloiginn, d'an ainm san Eabhra
- 18 Golgota. An sin cheus iad e, agus dithis eile maille ris, fear air gach taobh, agus
- 19 Iosa sa' mheadhon. Agus sgrìobh Pilat mar an ceudna tìodal, agus chuir e air a' chrann-cheusaidh e. Agus b'e an sgrìobhadh, IOSA O NASARET RÌGH NAN IUDHACH.
- 20 Uime sin leugh mòran do na h-Iudhaich an tìodal so: oir bha'n t-àit anns an

- do cheusadh Iosa fagus do'n bhaile : agus bha an sgrìobhadh an Eabhra, an Greugais,
- 21 agus an Laidin. An sin thubhairt àrd shagairt nan Iudhach ri Pilat, Na sgrìobh, Rìgh nan Iudhach ; ach gu'n dubhairt e féin, is mi rìgh nan Iudhach ; Fhreagair
- 22 Pilat, An nì a sgrìobh mi sgrìobh mi e.
- 23 An sin an uair a cheus na saighdearan Iosa, ghlac iad a thrusgan (agus rinn iad ceithir earrannan, earrann do gach saighdear,) agus a chòta mar an ceudna ; agus bha'n còta gu'n fhuaigheal, air fhigheadh
- 24 o bhràigh sìos gu h-ìomlan. Thubhairt iad uime sin eatorra féin, Na reubamaid e, ach tilgeamaid croinn air, cò aig a bhitheas e : chum gu'n coimhliontadh an sgriobtair a deir, Roinn iad mo thrusgan eatorra, agus thilg iad croinn air mo bhrat. Air an aobhar sin rinn na saighdearan na nithe
- 25 so. A nis sheas làimh ri crann-ceusaidh Iosa, a mhàthair agus piuthar a mhàthar, Muire bean Chleophais, agus Muire Mag-
- 26 dalen. Uime sin an uair a chunnaic Iosa a mhàthair, agus an deisciobul a b'ion-mhuinn leis 'na sheasamh a làthair, thubhairt e r'a mhàthair, A bhean, feuch do
- 27 mhac. An sin a deir e ris an deisciobul, Feuch do mhàthair. Agus o'n àm sin a mach thug an deisciobul sin leis i d'a thigh féin.
- 28 An déigh so air do Iosa fios a bhi

- aige gu'n robh na h-uile nithe a nis air an crìochnachadh, chum gu'n coimhliontadh
- 29 an sgriobtuir, a deir e, Tha tart orm. A nis bha an sin soitheach làn do fhìon geur; agus air dhoibhsan spong a lìonadh do'n fhìon gheur, agus a chur air hisop, shìn
- 30 iad chum a bheoil e. An sin an uair a ghabh Iosa am fìon geur, thubhairt e, Tha e crìochnaichte: agus air cromadh a chinn da, thug e suas a spiorad.
- 31 An sin chum nach fanadh an cuirp air a' chrann-cheusaidh air an t-sàbaid, a chionn gu'm b'è là an ulluchaidh a bha ann, (oir bu latha mòr an latha sàbaid sin,) dh'iarr na h-Iudhaich air Pilat gu'n rachadh an luirg-nean a bhriseadh, agus gu'n tugtadh air
- 32 falbh iad. An sin thàinig na saighdearan, agus bhris iad luirgne a' cheud fhir agus
- 33 luirgne an fhir eile, a cheusadh maille ris. Ach air dhoibh teachd chum Iosa, an uair a chunnaic iad gu'n robh e cheana marbh, cha
- 34 do bhris iad a luirgne-san. Ach lot fear do na saighdearaibh a thaobh le sleagh, agus air ball thàinig a mach fuil agus uisge.
- 35 Agus thug an ti a chunnaic sin fianuis; agus a ta 'fhianuis fìrinneach: agus a ta fhios aige gu bheil e labhairt na fìrinn,
- 36 chum gu'n creideadh sibhse. Oir rinn-eadh na nithe so chum gu'n coimhliontadh an sgriobtuir, Cha bhrisear cnàimh

- 37 dheth. Agus a rìs a deir sgriobtuir eile,
Amhaircidh iad air-san a lot iad.
- 38 'Na dhéigh so, dh'iarr Ioseph o Arimatea
(a bha 'na dheisciobul aig Iosa, ach am
folach air eagal nan Iudhach) air Pilat
comas corp Iosa a thoirt leis : agus leig Pilat
sin leis : Thàinig e air an aobhar sin, agus
39 thug e leis corp Iosa. Thàinig mar an
ceudna Nicodemus (a thàinig air tùs gu
Iosa san oidhche) agus thug e leis mu
thimchioll ceud pund do mhirr agus do al-
40 oes air am measgadh feadh a chéile. An
sin ghabh iad corp Iosa, agus cheangail iad
e ann an lìon-eudaichibh, maille ris an spìos-
raidh, mar is gnàth leis na h-Iudhaich
41 adhlac a dheanamh. A nis bha lios anns
an àit an do cheusadh e ; agus anns an lios
uaigh nuadh, anns nach do chuireadh aon
42 duine riamh. Air an aobhar sin air son ul-
luchaidh càisge nan Iudhach, do bhrìgh
gu'n robh an uaigh am fagus, chuir iad
Iosa an sin.

MATA.

- 1 CAIB. XXVII.—An déigh na sàbaid, aig
briseadh na fàire air a' cheud là do'n
t-seachduin, thàinig Muire Magdalen, agus
a' Mhuire eile, a dh'fhaicinn na h-uaighe.
- 2 Agus feuch, bha crith-thalmhainn mhòr
ann ; oir thàinig aingeal an Tighearna
nuas o nèamh, agus air teachd dha char-

- uich e a' chlach o'n dorus, agus shuidh e
 3 oirre. Agus bha a ghnùis mar dhealanach,
 4 agus 'eudach geal mar shneachda. Agus
 air eagal roimhe chrìothnaich an luchd
 coimhid, agus chaidh iad an riochd mairbh.
- 5 Ach fhreagair an t-aingeal agus thubhairt
 e ris na mnaibh, Na biodh eagal oirbhse:
 oir a ta fhios agam gu bheil sibh ag iarr-
 6 aidh Iosa, a chaidh cheusadh. Cha 'n'eil
 e 'n so; oir dh'éirich e, mar a thubhairt
 e: thigibh, faicibh an t-àit an robh an
 7 Tighearna 'na luidhe. Agus imichibh gu
 luath, agus innsibh d'a dheisciobluibh gu'n
 d'éirich e o na marbhaibh: agus, feuch,
 tha e dol roimhibh do Ghalile, an sin chi
 sibh e, feuch, thubhairt mise ribh e.
- 8 Agus dh'imich iad gu luath o'n uaigh, le
 h-eagal agus mòr ghairdeachas, agus ruith
 9 iad a dh'innseadh d'a dheisciobluibh. Agus
 ag imeachd dhoibh-san a dh'innseadh d'a
 dheisciobluibh, feuch, thachair Iosa féin
 orra, ag ràdh, Fàilte dhuibh. Agus thàin-
 ig iad am fagus da, agus rug iad air a
 chosaibh, agus rinn iad aoradh dha.
- 10 An sin thubhairt Iosa riu, Na biodh eagal
 oirbh: imichibh, abraibh ri m' bhràith-
 ribh iadsan a dhol do Ghalile, agus an
 11 sin chi iad mi. Agus an uair a bha iad-
 san ag imeachd, feuch, thàinig cuid do'n
 luchd faire do'n bhaile, agus nochd iad
 do na li-àrd shagartaibh gach ni a thachair.

- 12 Agus air cruinneachadh dhoibhsan an ceann a chéile maille ris na seanairibh, agus air gabhail comhairle dhoibh, thug
- 13 iad mòran airgid do na saighdearaibh, Ag ràdh, Abraibh-sa gu'n d'thàinig a dheisciobuil anns an oidhche, agus gu'n do ghoid iad e, an uair a bha sinne 'nar codal.
- 14 Agus ma chluinneas an t-uachdaran so, cuiridh sinne impidh air, agus ni sinn sibhse tèaruinte. Agus ghabh iad an t-airgiod, agus rinn iad mar a theagaisgeadh dhoibh : agus a ta a' chainnt so air a h-aithris am measg nan Iudhach gus an là'n diugh.
- 16 An sin chaidh an t-aon deisciobul deug do Ghalile, do'n bheinn far an d'orduich
- 17 Iosa dhoibh. Agus an uair a chunnaic iad e, rinn iad aoradh dha: ach bha cuid
- 18 aca fo amharus. Thàinig Iosa, agus labhair e riu, ag ràdh, Thugadh dhomhsa gach uile chumbachd air nèamh agus air talamh.
- 19 Uime sin imichibh-sa, agus deanaibh deisciobuil do gach uile chinneach, 'gam baisteadh ann an ainm an Athar, agus a' Mhic,
- 20 agus an Spioraid naoimh: A' teagasg dhoibh gach uile nithe a dh'àithn mise dhuibh a choimhead: Agus feuch, a ta mise maille ribh a ghnàth, gu deireadh an t-saoghail. Amen.

GNIOMHARA.

- 1 CAIB. II.—Agus an uair a thàinig là na
caingis, bha iad gu léir a dh'aon inntinn ann
2 an aon àit. Agus thàinig gu h-obann toirm
o nèamh, mar shéideadh gaoithe ro thréin,
agus lìon i an tigh uile far an robh iad 'nan
3 suidhe. Agus dh'fhoillsicheadh dhoibh
teanganna sgoilte, mar do theine, agus
4 shuidh e air gach aon diubh fa leth: Agus
lìonadh iad uile leis an Spiorad naomh, agus
thòisich iad air labhairt le teangaibh eile, a
réir mar a thug an Spiorad comas labhairt
5 dhoibh. Agus bha a' gabhail còmhnuidh
ann an Ierusalem, Iudhaich, daoine cràbh-
ach, do gach uile chinneach fuidh nèamh.
6 A nis an uair a sgaoileadh an t-iomradh
so, thàinig an sluagh an ceann a chéile,
agus bha iad fuidh amhluidh, do bhrìgh
gu'n cuala gach aon iad a' labhairt 'nan
7 cànan fèin. Agus bha iad uile fuidh
uamhas agus ghabh iad iongantas, ag ràdh
r'a chéile, Feuch, nach Galileich iad sin
8 uile a ta labhairt? Agus cionnus a ta sinne
'gan cluinntinn gach aon 'nar cànan fèin,
9 anns an d'rugadh sinn? Partaich, agus Me-
dich, agus Elamaich, agus luchd-àiteachaidh
Mhesopotamia, Iudea, agus Chapadocia,
10 Phontuis, and Asia, Phrigia, agus Pham-
philia, na h-Eiphit, agus chrìoch na Li-

- bia timchioll Chirene, agus coigrich o'n
11 Ròimh, Iudhaich agus Proselitich, Muinntir Chrete, agus Arabia, tha sinn 'gan cluinntinn a' labhairt 'nar teangaibh féin
12 gnìomhara mòralach Dhé. Agus bha iad uile fuidh uamhas, agus ann an iomachomhairle, ag ràdh gach aon r'a chéile,
13 Ciod is ciall da so? Ach thubhairt dream eile a' fanaid, Tha na daoine so làn do fhìon ùr.
14 Ach air seasamh do Pheadar maille ris an aon fhear deug, thog e a ghuth, agus thubhairt e riu, Fheara Iudea, agus sibhse uile a luchd-àiteachaidh Ierusalem, biodh fios so agaibh, agus éisdibh ri m' bhriathraibh-se: Oir cha 'n'eil iad so air mhisg, mar a ta sibhs' a' meas, oir is i an treas
16 uair do'n là a ta ann. Ach is e so an ni
17 a dubhradh leis an fhàidh Ioel: Agus tarlaidh anns na làithibh deireannach, (arsa Dia) dòirtidh mise do m' Spiorad air gach uile fheòil; agus ni bhur mic agus bhur nigheana fàidheadaireachd, agus chi bhur n-òganaich seallanna, agus bruadaraidh
18 bhur seann daoine bruadaran: Agus dòirtidh mise air m'òglaich, agus air mo bhanoglaich do m' Spiorad anns na làithibh sin, agus ni iad fàidheadaireachd:
19 Agus nochdaidh mise iongantais anns na nèamhaibh shuas, agus comharan air an talamh shìos; fuil, agus teine, agus duibh-

- 20 neul deataich. Iompaichear a' ghrian gu dorchadas, agus a' ghealach gu fuil, mun tig latha mòr agus comharaichte sin an
- 21 Tighearna. Agus tarlaidh, ge b'e neach a ghairmeas air ainm an Tighearna, gu'n tearnar e.
- 22 Fheara Israeil, éisdibh ris na briathraibh so: Iosa o Nasaret, duine a dhearbhadh le Dia 'nur measga, le cumhachdaibh, agus le mìorbhuilbh, agus le comharaibh, a rinn Dia leis-san 'nur meadhon-sa, mar a
- 23 ta fhios agaibh féin; An duine so, a thugadh thairis le comhairle chinntich agus roimh-eòlas Dé, ghlac sibhse, agus le làmh-aibh dhroch dhaoine cheus agus mharbh
- 24 sibh e: Neach a thog Dis suas, air dha piantan a' bhàis fhuasgladh: do bhrìgh nach robh e'n comas gu'n cumtadh esan
- 25 leis: Oir a deir Daibhidh m'a thimchioll, Chunnaic mi an Tighearn romham a ghnàth, oir a ta e aig mo dheas làimh,
- 26 chum nach gluaisteadh mi. Air an aobhar so rinn mo chridhe gairdeachas, agus rinn mo theanga aoibhneas: tuilleadh fòs, gabhaidh m'fheoil còmhnuidh fhoisneach ann
- 27 an dòchas: Do bhrìgh nach fàg thu m'an-am shìos ann an ifrinn, ni mò a dh'fhuilingeas tu do d' naomh Aon féin gu faic e
- 28 truailidheachd. Dh'fhoillsich thu dhomh-sa slighean na beatha; lìonaidh tu mi do shubhachas le d' ghnùis.

- 29 Fheara agus a bhràithre, leigibh leamsa
labhairt gu dàna ribh mu'n phrìomh-athair
Daibhidh, araon gu'n d'fhuair e bàs, agus
gu'n d'adhlaid e, agus gu bheil 'uaigh
30 maille ruinne gus an là 'n diugh : Air an
aobhar sin air dha bhi 'na fhàidh, agus fios-
rach gu'n do mhionnaich Dia le mionnaibh
dha, do thoradh a leasraidh, [a réir na
feòla, gu togadh e suas Chrìosd,] gu suidhe
31 air a rìgh-chaithir-san. Air dhasan so
a roimh-fhaicinn, labhair e mu aiseirigh
Chrìosd, nach d'fhàgadh 'anam ann an
ifrinn, agus nach fac 'fheoil truaillidheachd.
32 An t-Iosa so thog Dia suas, air am bheil
sinne uile 'nar fianuisibh.
- 33 Uime sin air dha bhi air àrdachadh le
deas làimh Dhé, agus gealladh an Spior-
aid naoimh fhaotainn o'n Athair, dhòirt
e mach an nì so, a tha sibhse nis a' faicinn
34 agus a' cluinntinn. Oir cha deachaidh
Daibhidh suas chum nan nèamh : ach a
deir e féin, Thubhairt an Tighearn ri m'
Thighearn, Suidh air mo làimh dheis,
35 Gus an cuir mi do naimhde 'nan stòl fuidh
36 do chosaibh. Uime sin biodh fios gu
cinnteach aig tigh Israeil uile gu'n d'rinn
Dia 'na Thighearn agus 'na Chrìosd, an
37 t-Iosa so féin, a cheus sibhse. A nis an
uair a chual' iad so, bha iad air am bioradh
'nan cridhe, agus thubhairt iad ri Peadar,
agus ris a' chuid eile do na h-abstolaibh,

- Fheara agus a bhràithre, ciod a ni sinn?
- 38 An sin thubhairt Peadar riu, Deanaibh aithreachas, agus bithibh air bhur baisteadh gach aon agaibh ann an ainm Iosa Crìosd, chum maitheanais peacaidh, agus gheibh
- 39 sibh tìodhlac an Spioraid naòimh. Oir a ta 'n gealladh dhuibhse, agus d'ur cloinn, agus do na h-uile a ta fad o làimh, eadhon a mheud 'sa ghairmeas an Tighearn ar Dia.
- 40 Agus le mòran do bhriathraibh eile rinn e fianuis agus dh'earalaich e iad, ag ràdh, Saoraibh sibh féin o'n ghinealach fhiar so.
- 41 An sin bhaisteadh iadsan a ghabh r'a fhocal gu toileach: agus an là sin féin chuireadh
- 42 riu timchioll thri mìle anam. Agus bhuan-aich iad gu seasmhach ann an teagasg nan abstol, agus ann an comh-chomunn, agus ann am briseadh arain, agus ann an urnuighibh. Agus thàinig eagal air gach anam: agus rinneadh mòran do mhìorbhuilibh agus do chomharaibh leis na h-abstolaibh.
- 13 CAIB. XII.—Agus air gabhail luinge do Phòl agus d'a chuideachd o Phaphos, thàinig iad gu Perga na Pamphilia: agus air do Eoin am fàgail, phill e gu Ierusa-
- 14 lem. Ach air dhoibhsan imeachd o Pherga, thàinig iad gu Antioch na Pisidia, agus chaidh iad a steach do'n t-sionagog air la-
- 15 tha na sàbaid agus shuidh iad. Agus an

déigh leughadh an lagha agus nam Fàidhean, chuir uachdaran na sionagoig d'an ionnsuidh, ag ràdh, F'heara agus a bhràithre, ma tha focal earail agaibh do'n t-sluagh, abraibh e.

- 16 An sin an uair a sheas Pòl suas agus a smèid e orra le 'làimh, thubhairt e, F'heara Israeil, agus sibhse air am bheil eagal Dé,
 17 éisdibh. 'Thagh Dia a' phobull so Israeil ar n-aithriche, agus dh'àrdaich e'm pobull 'nuair a bha iad air choigrich ann an talamh na h-Eiphit, agus le làimh àrd thug e iad
 18 a mach aisde. Agus mu thimchioll ùine dhà fhichead bliadhna ghiùlain e le'm beus-
 19 aibh anns an fhàsach. Agus an uair a sgrios e seachd cinnich ann an tìr Chanaain, roinn
 20 e am fearann orrasan le crannchur. Agus 'na dhéigh sin mu thimchioll ceithir cheud agus leth-cheud bliadhna, thug e dhoibh
 21 breitheamhna, gu Samuel am fàidh. Agus 'na dhéigh sin dh'iarr iad rìgh : agus thug Dia dhoibh Saul mac Chis, duine do thréibh
 22 Bheniamin rè dhà fhichead bliadhna. Agus air dha esan atharrachadh, thog e suas Daibhidh gu bhi 'na rìgh dhoibh ; d'an d'thug e mar an ceudna fianuis, ag ràdh, Fhuair mi Daibhidh mac Iese, duine a
 23 réir mo chridhe féin, a ni m'uille thoil. Do shliochd an duine so thog Dia suas do Israel a réir a gheallaidh, Slànuighear, eadhon Iosa.

- 24 Air do Eoin roimh a theachd-san, baist-
eadh an aithreachais air tùs a shearmon-
25 achadh do phobull Israeil uile. Agus mar
a choimhlion Eoin a thriall, thubhairt e, An
ti a ta sibh a' saolsinn is mise, cha mhi e.
Ach feuch, a ta neach a' teachd a'm'
dhéigh, nach fiu mi brògan a chos fhuas-
26 gladh. Fheara agus a bhràithre, a chlann
fine Abraham, agus a mheud agaibh air
am bheil eagal Dé, 's ann chugaibh-sa a
27 chuireadh focal na slàinte so. Oir iadsan
a ta chòmhnuidh ann an Ierusalem, agus
an uachdarain, air dhoibh bhi aineolach
airsan, agus air foclaibh nam Fàidh a ta
air an leughadh gach sàbaid, le esan a dhìt-
28 eadh choimhlion siad iad. Agus ged
nach d'fhuaireadh iad coire bàis air bith ann,
dh'iarr iad air Pilat gu'n cuirteadh esan
29 gu bàs. Agus an uair a choimhlion iad
na h-uile nithe bha sgriobhta mu thimchioll,
thug iad a nuas o'n chrann e, agus chuir
30 iad ann an uaigh e. Ach thog Dia suas o
31 na marbhaibh e: Agus chunncas e rè mòr-
ain làithean leo-san a chaidh suas maille ris
o Ghalile gu Ierusalem, dream a ta 'nam
32 fianuisibh dhasan do'n t-sluagh. Agus a ta
sinne a' soisgeulachadh dhuibhse a' gheall-
aidh, a rinneadh do na h-aithrichibh;
33 Gu'n do choimhlion Dia so dhuinne an
clann, air dha Iosa thogail suas; mar a ta
e sgriobhta mar an ceudna san dara Salm,

- Is tu mo Mhac-sa, an diugh ghin mi thu.
- 34 Agus mar dhearbhadh gu'n do thog e suas e o na marbhaibh, gun e a philltinn air ais tuilleadh chum truailidheachd, thubhairt e mar so, Bheir mise dhuibh tròcaire cinnteach Dhaibhidh.
- 35 Uime sin a deir e mar an ceudna ann an Salm eile, Cha'n fhuiling thu do d' Aon
- 36 naomh gu'm faic e truailidheachd. Oir an déigh do Dhaibhidh a ghinealach féin a riarachadh a réir toil Dhé, choidil e, agus chuireadh e chum 'aithriche, agus chunn-
- 37 aic e truailidheachd: Ach an ti a thog Dia suas, cha'n fhac e truailidheachd.
- 38 Uime sin biodh fhios agaibhse, fheara agus a bhràithre, gur ann tre'n duine so a ta maitheanas peacaidh air a shearmon-
- 39 achadh dhuibh: Agus trìdsan a ta gach neach a chreideas air a shaoradh o na h-uile nithibh, o nach robh e'n comas duibh
- 40 bhi air bhur saoradh le lagh Mhaois. Thugaibh aire uime sin, nach tig oirbh an ni a
- 41 ta air a ràdh anns na Fàidhibh, Feuchaibh, a luchd-tarcuis, agus gabhaibh iongantas, agus rachadh as duibh: oir oibricheam-sa obair ann bhur làithibhse, obair nach creid sibh idir, ged chuireadh duine an céill
- 42 duibh e. Agus an uair a chaidh na h-Iudhaich a mach as an t-sionagog, ghuidh na Cinuich gu'n rachadh na briathra so a labhairt riu féin an t-sàbaid 'na dhéigh

- 43 sin. A nis an uair a sgaoil an coimhthional,
lean mòran do na h-Iudhaich agus do na
proselitich chràbhach Pòl agus Barnabas :
agus labhair iadsan riu, agus chuir iad
impidh orra fuireach ann an gràs Dhé.
- 44 Agus air an latha sàbaid a b'fhaisge, is
beag nach do chruinnich am baile gu
45 h-iomlan a dh'éisdeachd ri focal Dé. Ach
an uair a chunnaic na h-Iudhaich na
slòigh, lionadh iad le h-eud, agus labhair
iad an aghaidh nan nithe sin a labhradh
le Pòl, a' labhairt 'nan aghaidh agus a'
46 tabhairt toibheim. An sin dh' fhàs Pòl
agus Barnabas dàna, agus thubhairt iad,
B'éigin focal Dé bhi air a labhairt ribhse
air tùs: ach do bhrìgh gu'n do chuir sibh-
se cùl ris, agus gur i bhur breth oirbh féin
nach fiu sibh a' bheatha mhaireannach,
feuch, a ta sinne a' pilltinn chum nan
47 Cinneach. Oir is ann mar sin a dh'àithn
an Tighearna dhuinn, ag ràdh, Chuir mi
thu mar sholus do na Cinnich, chum gu'm
bitheadh tu mar shlàinte gu iomall na
48 talmhainn. Agus an uair a chuala na
Cinnich so, rinn iad gairdeachas, agus
ghlòraich iad focal an Tighearn; agus
chreid a mheud 'sa bha orduichte chum
49 na beatha maireannaich. Agus sgaoileadh
focal an Tighearna feadh na tìre uile.
- 50 Ach bhrosnaich na h-Iudhaich na mnà
chràbhach agus urramach, agus daoine

- uaisle na caithreach, agus thog iad geur-
 leanmhuinn air Pòl agus Barnabas, agus
 thilg iad a mach as an crìochaibh iad.
- 51 Ach chrath iadsan duslach an cos dhiubh
 'nan aghaidh, agus thàinig iad gu Iconium.
- 52 Agus bha na deisciobuil air an lìonadh le
 h-aobhneas, agus leis an Spiorad naomh.
- 25 CAIB. XVI.—Agus mu mheadhon oidh-
 che air do Phòl agus do Shilas urnuigh
 a dheanamh, sheinn iad laoidh-mholaidh
 do Dhia; agus chuala na priosanaich iad.
- 26 Agus gu h-obann bha crith-thalmhainn
 mhòr ann, air chor as gu'n do chrathadh
 bunaitean a' phrìosain; agus air ball
 dh'fhosgladh na dorsan uile, agus dh'fhuas-
 27 gladh cuibhreacha gach neach aca: Agus
 air do fhear-coimhead a' phrìosain dùsgadh
 á codal, agus air faicinn dorsa a' phrìosain
 fosgailte, tharruing e a' chlaidheamh, air
 tì e féin a mharbhadh, a' saòilsinn gu
 28 robh na priosanaich air teicheadh. Ach
 ghlaodh Pòl le guth àrd, ag ràdh, Na
 dean cron sam bith ort féin; oir tha sinn
 29 uile an so. Agus air gairm soluis dasan,
 leum e steach, agus thàinig e air chrith,
 agus thuit e sìos an làthair Phòil agus
 30 Shilais; Agus air dha an tabhairt a mach,
 thubhairt e, A mhaighstirean, ciod is còir
 domh a dheanamh chum gu saorar mi?
 31 Agus thubhairt iadsan, Creid anns an
 Tighearn Iosa Crìosd, agus saorar thu

32 féin, agus do thigh. Agus labhair iad fo-
 cal an Tighearn ris, agus riusan uile a
 33 bha 'na thigh. Agus air dha an toirt leis
 air an uair sin féin do'n oidhche, nigh e
 an creuchdan; agus bhaisteadh e féin,
 agus a mhuinntir, gun dàil.

EOIN.

28 CAIB. v.—Na gabhaibh iongantas deth
 so: oir a ta 'n uair a' teachd, anns an
 cluinn iadsan uile a ta sna h-uaighibh a
 29 ghuth-san: Agus théid iad a mach, iad-
 san a rinn maith, chum aiseirigh na bea-
 tha; agus iadsan a rinn olc, chum aiseir-
 30 igh an damnaidh. Cha'n 'eil mise comas-
 ach air ni sam bith a dheanamh uam féin:
 mar a chluinneam, bheiream breth; agus
 a ta mo bhreitheanas ceart; do bhrìgh
 nach 'eil mi 'g iarraidh mo thoile féin,
 31 ach toil an Athar a chuir uaith mi. Ma
 bheir mise fianuis a m' thimchioll féin, cha
 32 'n'eil m' fhianuis fìor. Tha neach eile a'
 toirt fianuis a m' thimchioll, agus a ta
 fhios agam gur fìor an fhianuis a tha e
 33 deanamh mu m' thimchioll. Chuir sibhse
 chum Eoin, agus thug e fianuis do'n
 34 fhìrinn. Ach cha 'n'eil mise a' gabhail
 fianuis o dhuine: ach a ta mi ag
 ràdh nan nithe so, chum gu 'm bi
 35 sibhse air bhur tearnadh. B'esan an
 lòchran lasrach agus dealrach: agus bha

- sibhse toileach car tamuill gairdeachas
 36 a dheanamh 'na sholus. Ach a ta agamsa fianuis a's mò na fianuis Eoin : oir na h-oibre a thug an t-Athair dhomhsa chum gu'n crìochnaichinn iad, tha na h-oibre sin féin a tha mise a' deanamh, a' toirt fianuis a m' thimchioll, gu'n do chuir an t-Athair uaith
 37 mi. Agus an t-Athair féin a chuir uaith mi, thug e fianuis a m' thimchioll. Cha chuala sibh riamh a ghuth, ni mò a chunnaic sibh a choslas. Agus cha'n 'eil 'fhocal-san agaibh a' gabhail còmhnuidh annaibh ; oir an ti sin a chuir esan uaith, cha 'n'eil sibh 'ga chreidsinn.
- 39 Rannsaichibh na sgriobtuirean, oir a ta sibh a' saoil sinn gu bheil a' bheatha mhair-eannach agaibh anntasan, agus is iad sin a
 40 ta toirt fianuis a m' thimchioll-sa. Gidheadh cha'n àill libh teachd a m' ionnsuidh-sa, chum gu'm faigheadh sibh beatha.
- 41 Cha'n 'eil mise a' gabhail urraim o dhaoine-
 42 ibh. Ach is aithne dhomh sibhse, nach
 43 'eil gràdh Dhé agaibh annaibh. Thàinig mise an ainm m' Athar, agus cha'n 'eil sibh a' gabhail rium : ma thig neach eile na'
 44 ainm féin, gabhaidh sibh ris-san. Cionn-us a dh'fheudas sibh creidsinn, a ta gabhail urraim o chéile, agus nach 'eil ag iarraidh an urraim a thig o Dhia a mhàin?
- 45 Na saoilibh gu'n dean mise bhuir casaid ris an Athair : tha aon a tha deanamh casaid

oirbh, Maois, anns am bheil sibh a' cur
 46 bhur dòchais. Oir nan creideadh sibh
 Maois, chreideadh sibh mise: oir sgrìobh
 47 esan a m' thimchioll. Ach mur creid sibh
 a sgrìobhadh-san, cionnus a chreideas sibh
 mo bhriathra-sa?

I. TESAL.

13 CAIB. IV.—Ach cha b'àill leam, a
 bhràithre, sibh a bhi aineolach thaobh na
 muinntir sin a tha 'nan codal, chum nach
 dean sibh bròn, eadhon mar dhaoine aig
 14 nach 'eil dòchas. Oir ma chreideas sinn
 gu'n d' fhuair Iosa bàs, agus gu'n d'éirich
 e ris, amhuil sin mar an ceudna an dream
 a choidil ann an Iosa, bheir Dia maille
 15 ris. Oir so a deireamaid ribh a réir
 focal an Tighearna, nach bi againne a tha
 beò, agus a dh'fhàgar gu teachd an Tigh-
 earna, toiseach orrasan a tha 'nan codal:
 16 Oir thig an Tighearna féin a nuas o nèamh
 le àrd-iolaich, le guth an àrd-aingeil, agus
 le trompaid Dhé: agus éiridh na mairbh
 17 ann an Criosd air tùs: An déigh sin sinne
 a bhios beò, agus a dh'fhàgar, togar suas
 sinn maille riusan anns an neulaibh, an
 còdhail an Tighearna san athar; agus mar
 sin bithidh sinn gu sìorruidh maille ris an
 Tighearn.



